



**SI MAN OGEN** : Jesaya 6:8-13

**T E M A** : KUDALANKEN SI KUAKUKEN

**T U J U N** : Gelah Moria:

- Nuriken pengakun Jesaya ngaloi pendilo Dibata.
- Ngasup mengevaluasi pendalankenna kerna pendilo Dibata man bana (*minat pelayanan*).

**METODE PA** : Evaluasi

### **Kata Penaruh.**

Tekad nta pe komitmen megati kal ibelasken nta pe iakuken kalak i bas sada-sada dahin. I bas bahan Perpulangan Jabu-jabu bage pe PA Moria-nta lanai kita terjeng diskusi kerna oratenta i bas Pustaka Si Badia tapi lit piga-piga aksi ras tekad si ibelasken kita, si nuate silakoken i bas geluhta. Apai ka tahun si lepas, tahun 2023, perayakenta maka kita sebage 'jemaat jadi pelaku aktif i bas pelayanan'. Rikutken si e lit ka piga-piga kita milih kerna minat pelayanenta, kuga ndia ulih kai si akuken kita paksa si e?

Kerina si iakuken enda ndai, kuga nge pendalankenta? Kai nge tantangan nta pe rungga-rungga si man alanken? Kuga ka kita ndarami dalam puluh i bas erbage tantangan si man alankenta guna nehi pengakunta e? Enda me si arus silakoken i bas PA pemena tahun 2024 enda. Evaluasi dirinta secara pribadi gelah i bas ndalani tahun enda reh ngenana ate Dibata kegeluhenta selaku ajar-ajarNa. La terjeng kata saja si belasken tapi lit aksi si lakoken si jadi ulih ras buah Kata Dibata si aloken kita.

### **Mpebagesi Pengangkan Kerna Ogen.**

Nabi Jesaya erdahin i Israel i bas abad pewaluhken ope Kristus. Dahinna la saja ernubuat kerna paksa si reh tapi pe mperdiateken kegeluhen si sangana jadi i bas bangsa e. I bas kerina dampar kegeluhen: sosial, politik bage pe i bas keagaman arus isehkenna kai nina Dibata. I bas situasi kegeluhen bangsa enda, si enggo nulak Dibata, mpersembahkan persembahkan man gana-gana bage pe pemimpinna enggo erpekat ras bangsa sideban. Lanai ia tek Dibata ngenca si banci nelamatkan ia. Idilo Dibata me Jesaya guna ndahiken sura-suraNa. Teridah percakapen Jesaya:

- a. 'Aku, suruhlah aku' enda me sada kalimat pengakun Jesaya iadepen malekat i bas pengidahna. Pengakun kenca ngaloken penungkunen Tuhan si ibegina:
- 'Ise ndia Kusuruh? Penungkunen enda sendalanan ras kai si enggo iidah Jesaya kerna kecibal bangsa Israel, melala si arus man pekenan. Dibata perlu kalak si jadi suruh-suruhanNa.
  - Ise ndia nggit maba berita i bas aku nari? Lit berita si man pesehenken, janah langa tentu kerina kalak nggit nehkenca. Sabap enggo reh urakna kalak si ngikutken Dibata, ndalanken si benar ras bujur.

Teridah lit percakapen si mehuli ibahan Dibata i bas ndilo Jesaya jadi nabiNa. Tentuna sope penungkunen enda isehken, enggo nge lebe iperlengkapi Dibata Jesaya alu njumpaisa. I bas perjumpanna e enggo tambah pengangkan Jesaya kerna sura-sura Dibata. I bas ngaloken tugas Dibata e, perlebe Jesaya ipebadiaken i bas dosa-dosana nari (6:6). Ertina, enggo me lit asamna ndahiken kai si iarapken Dibata. Penandaina dirina selaku kalak perdosa ras ngaloken pengalemi dosa i bas Dibata nari erbahansa alu dem semangat ras ketetapan ukur ialokenna dahin e. Banci sibandingkan ras Abram ngaloi pendilo Dibata, minter berkat i bas pendilo Dibata (Kej. 12:1-4). La bagi Musa (Kel. 5:10-12) ras bagi Jeremia (Jer. 1:6) si tangtangna nulak pendilo e.

- b. Isuruh, iutus me Jesaya lawes nehken berita e man bangsa enda. Janah ikataken Dibata maka berita si isehken Jesaya enda itulak bangsa e nge. Labo diatena pendilo si isehken Jesaya. Ipebetehken man Jesaya maka jadi me keruntuhen nandangi bangsa enda. La saja Kerajaan Utara (Israel) italuken Asur tapi pe Kerajaan Selatan (Juda) italuken Babil alu ngeruntuhken Jerusalem. Seh maka ibaba me ia ku pembuangan. Alu bage kutana enggo tading mesuni sabap lanai iiani.

Bage me Jesaya ngaloken pendilo i bas Dibata nari. Idahikenna dahin nehken berita pengukumen man bangsa enda i bas kelasetianna man Dibata. Tentuna pendilo Dibata e ialoi (irespon) Jesaya alu tutus. Janah pasti nge ilakokenna kai si iakuken e alu tutus. I bas pendilo Dibata, iperlengkapi Dibata ia alu kengasupen sabap enggo ipebadiaken Dibata dirina. Janah Dibata nehken, nikapken ras ngataken kai kin si arus isehken Jesaya man bangsa si mbelin e.

## **Pengkenaina.**


Komitmen nta pe kai siakuken sekalak jelma, arusna me enggo angka ras iertina. Gelah la sempat erkadiola i bas pengakun bage pe la terlakonna kai si enggo ialoken. Janah Dibata pe seh sura-suraNa sabap suruh-suruhanNa ngasup ndalanken sinisurakenNa. I bas ndalankenca, arus kepe tutus, ertanggungjawab, labo asal ngaku saja tapi labo tutus ndalankenca. Sabap banci saja erkiteken iakuken janah ialokonna sada-sada dahin, lanai lit dalam nta pe kesempatan man kalak sideban. Si banci saja adi sideban ndai ngalokenca enggo sikap ibahanna tapi perbahan siakuken, lolo me dahin e.

Tahun 2023 si lepas, gerejanta enggo mereken kesempatan man kerina ngawan GBKP termasuk Moria i je, gelah jadi pelaku aktif pelayanan. Enggo me si buat baginta rikutken erbage talenta ras minat pelayanenta. Kuga nge ndia enggo pendalanken ras ulihna (pencapaianta)?

## **Evaluasi/Grafik**

(Catatan : *erbahan grafik perkembangan keaktifan dirinta selaku ngawan GBKP i bas tahun 2022 ras 2023 bage pe sura-sura tahun 2024. Si ituliskan minat pelayanenta, enggo nge silakoken entah seri denga nge bagi tahun 2022?*)

Contoh Jemaat pelaku aktif/minat pelayanan: \_\_\_\_\_



*Pdt. Suenita Simulingga, MTh*



**SI MAN OGEN** : Lukas 4:38-41

**T E M A** : IPASU - PASU GUNA JADI PASU - PASU

**T U J U N** : Gelah Moria:

- Niksiki kai si ilakoken mami Simon kenca ipepalem Jesus.
- Merekem dirina jadi pasu-pasu man jelma si enterem.

**METODE PA** : Menginventarisir

### **Kata Penaruh.**

Rikutken sasaren pelayanen GBKP tahun 2024 berkarya dan berguna untuk orang lain, i bas Garis-garis Besar Pelayanan (GBP) GBKP ituliskan maka: *Kontribusi Gereja terhadap masyarakat hendaknya holistik, yaitu meliputi aspek spiritual dan material (rohani dan jasmani). Niat baik kontribusi tersebut hendaknya telah tampak sejak perencanaan/penganggaran sampai ke tahap implementasi, pelaporan dan evaluasi. Gereja perlu memberi dan berbagi sumberdaya spiritual dan material kepada masyarakat, bangsa dan Negara. Secara spiritual, Gereja perlu peka mendengarkan persoalan-persoalan dalam masyarakat dan secara berkala menyatakan sikap serta memberi rekomendasi untuk mengatasi persoalan-persoalan tersebut. Secara material, Gereja perlu ikut aktif memperkuat infrastruktur ekonomi masyarakat dan apabila diperlukan, menjadi koordinator dalam menghimpun sumber daya masyarakat demi membantu/menolong komponen-komponen masyarakat yang menderita/terpinggirkan. Gereja harus selalu memperhatikan golongan yang paling lemah secara spiritual dan material dalam masyarakat.*

Rikutken uraian enda tangkas maka Gereja lanai ngerana terjeng program internal (guna jemaat GBKP) tapi arus ernanam kempak masyarakat si rulo (eksternal). Gereja jadi pancur pasu-pasu kempak jelma si enterem. Bage me orat geluh Gereja si ideal. Sabap Gereja e me sira ras terang doni.

### **Mpebagesi Pengangkakan Kerna Teks.**

Kitab Lukas itulis Lukas kira-kira tahun 60-63 Masehi. Lukas e me kalak Junani si mbaru jera. Lukas me ngenca si labo kalak Jahudi si nulis Berita Si Meriah (Injil). Tema Injil Lukas e me Yesus, Juruselamat si Ilahi dingen

manusiawi. Alu tema enda tangkas ituriken maka Jesus e me Dibata sejati ras manusia sejati. Lukas 4:38-41 isina e me turi-turin kerna nterem jelma ipepalem Jesus. Jesus i Kota Kapernaum (*Ibrani; Kefar Nahum, "Kampung Nahum"*) e me sada ingan tading i tepi *Laut Galilea*. Genduari tading reruntuhen saja, iingani menaken tahun 150 SM seh kira-kira tahun 750. Kota enda isingetken i bas Padan Si Mbaru: i bas kitab Lukas isingetken maka kota enda e me rumah piga-piga ajar-ajar Jesus: Petrus, Andreas, Jakobus ras Johanes, bagepe pemungut cukai Matius. I bas Injil Matius (Mat. 4:13) ingan enda e me rumah Jesus.

Lit 3 (telu) bagin isi teks enda e me:

a. Jesus jumpa ras mami Simon.

Kenca Jesus dung ngajar i Rumah Pertoton ndarat ia dengen berkat ku rumah Simon. I bas rumah e mami Simon sakit mekelek (demam tinggi). Tentu enggo itandai kade-kade mami Simon maka Jesus e me sekalak Tabib Agung. E maka minter ipindokenna segelah Jesus mpepalem mami Simon e.

b. Mami Simon ipasu-pasu dengen jadi pasu-pasu.

Pemindonna e iayuken Jesus. E maka idahi Jesus mami Simon, tedis la deherken ingan medemna, jenari ipelawesNa penakit e. Kuasa Jesus i bas perkuah ateNa erdahin i bas mami Simon. Pinakitna minter malem. Tuhu la ituriken kerna kiniteken mami Simon si megati ibelasken Jesus i bas mpepalem sekalak jelma (bdk. Mrk. 10:52; Luk. 7:50). Tapi teridah maka mami Simon sekalak si erkiniteken. Kenca ia malem minter ia keke, kuskas ia nikapken pangan dengen ngelai Jesus ras kalak ndai kerina. Kenca ipepalem Jesus, ielaina me Jesus ras kalak si lit i bas rumah e. Tangkas maka mami Simon ngelai (*beribadah*) rikutken kai si banci ilakokenna. Em pengataken bujurna man Jesus. Kenca ia ndatken pasu-pasu arah malem pinakitna minter ia jadi pasu-pasu man kalak si deban alu kuskas nikapken pangan.

c. Nterem jelma ipepalem Jesus.

Berita kerna mami Simon enggo malem i bas pinakitna nari enggo mbar i Kota Kapernaum. E maka kenca matawari enggo sundut, kerina kalak maba kade-kadena si erbage-bage pinakitna man Jesus. Ipepalem Jesus kerina alu namaken tanNa i babo kalak si penakiten e. Setan-setan pe ndarat dengen ngaku maka Jesus e me Anak Dibata (perkatan setan enda isuriangi Jesus erdandanken IA ersura-sura kalak tek man bana labo erkiteken kiningasupenNa mpepalem pinakit tapi erkiteken i bas IA

lit kegeluhen si rasa lalap). Ieteh setan-setan e maka Jesus e me Kristus, si engkelini si ipadanken Dibata. Alu perkatan setan enda tangkas maka Jesus e me Imam Si Mbelin si mpersadaken manusia ras Dibata. I bas Kristus lit jaminen kegeluhen si rasa lalap.

### **Pengkenaina.**

“Ipasu-Pasu Guna Jadi Pasu-Pasu”. I bas kegeluhenta enda kita enggo leben ngalo, e me keselamatan idur Dibata nari. Jaminen keselamatan e enggo si aloken i bas kinitekenta man baNa (bdk. Joh. 3:16). Kenca lit jaminen keselamatenta umputenna e me kita pe mere arah perbahanenta man kalak si deban (bdk. Jak. 2:17). Tole Dibata mereken pemere-pemere si deban, umpamana: talenta, gegeh, perukuren, kiniliten ras sidebanna. Alu si e me kerina Moria (banci secara pribadi bagepe secara komunitas) erkarya dinging erguna kempak kalak sideban. Moria muat bagin lako nampati keperlun rohani ras jasmani masyarakat si rulo si lit i bas inganta tading. Secara material, Moria ikut aktif ‘memperkuat’ infrastruktur ekonomi masyarakat ras di kune iperlukan, jadi koordinator i bas mpepulung sumber daya masyarakat guna nampati masyarakat si kelsehen /terpinggirken. Moria arus tetap kepate kempak golongan lemah secara spiritual ras material i tengah-tengah masyarakat.

Selamat tetap ngaloken pasu-pasu idur Dibata nari ras selamat jadi pasu-pasu nandangji jelma si enterem. Soli Deo Gloria.

### **Menginventarisir.**

Inventarisir pasu-pasu bas geluhta

No.	Pasu-pasu Dibata enggo si aloken	Perbahanenku enggo jadi pasu-pasu	Tole nari si ateku ku aloken si jadi pasu-pasu
1			
2			
3			

*Pdt. Ch. Sinulingga, M.Th*

Kenca dung kita menginventarisir pasu-pasu Dibata bas geluhta banci siterusken nonton link:

[https://youtu.be/97xZbxrmHhs?si=eclD\\_ukgjZmgz6rS](https://youtu.be/97xZbxrmHhs?si=eclD_ukgjZmgz6rS)



**SI MAN OGEN** : Kejadin 2:18-23  
**TEMA** : ITEPA GUNA NAMPATI  
**TUJUN** : Gelah Moria:

- Nggargari tujuan Dibata nepa diberu.
- Mbiasaken geluhna guna nampati.

**METODE PA** : Sharing kelompok

### **Kata Penaruh.**

Dibata nepa doni enda ras kerina isina alu erbage-bage tempas, biak ras gunana. Lit 2 dampar i bas Dibata nepa doni ras isina. Sipemena, bicara mbue pe erbagenana tinepa e, manusia itepa si perpu dina janah la lit teman si cocok man manusia e. Sipeduaken, Dibata mereken kerina tinepaNa man manusia e guna ikuasai ras gelah inanamina tapi kerina e la ngkuhi kegeluhen manusia bage pe la mereken keriahen man manusia ndai. Si jadi penungkenen, engkai maka la lit si cocok? Kai kin si perlu man manusia e?

### **Mpebagesi Pengangkalan Kerna Ogen.**

Natap situasi Adam, maka nina Dibata *"La mehuli adi manusia nggeluh si sada - si sada. Kubahanlah teman si cocok man bana, guna nampati ia"* (ay.18). Ikataken teman si cocok guna nampati (bhs. Indonesia, penolong yang sepadan). Si jadi kata kunci e me ibahan teman si cocok alu tujuan guna nampati, ertina Adam la ngasup ndahiken tanggungjawabna si sada. Teman si jadi penampat, e me si iperlukenna, si nampati ia. I bas si enda banci ibadingken Masmur 33:20, uga bangsa Israel erbahan Dibata jadi gegehna, Dibata Penampat man bana, Tuhan saja bahanna pengarapenna, IA kap Penampat dinggen si ngkawali. Uga Dibata jadi Penampat man bangsa Israel bage me gambaren teman si cocok guna nampati manusia e (Adam).

**Ayat 19**, biasana adi sesekalak mereken gelar, ertina si mereken gelar e erkuasa nandangi si ndatken gelar, alu bage tupung Adam erbahan gelar man kerina rubia-rubia ras perik ertina manusia erkuasa nandangi tinepa e.

**Ayat 20**, bicara melala pe erbagenana tinepa Dibata, tapi sada pe langa lit jadi teman si cocok, i bas ia pe kuasa e, la akapna cocok, sabap aminna

radu-radu tinepa Dibata, manusia ras rubia-rubia la setara, la ngasup nampati manusia e.

**Ayat 21-22**, nuriken kerna proses uga Dibata erbahan ras namaken teman man Adam. Ibahan Dibata entabeh pertunduhna, e maka ibuatNa sada tulan rang-rangna, itutupNa alu jukut, ijadikenNa sekalak diberu e maka itaruhkenNa man manusia e. I bas si enda teridah maka Dibata jine sinentuken, si mpersadaken manusia (dilaki ras diberu), labo lit arih-arih entah pe penungkenen Dibata man Adam kerna uga teman sinisurakenna, tapi tuhu-tuhu Dibata sinentuken, si mpersadaken dingen naruhken Hawa man Adam.

**Ayat 23**, teridah uga riahna ukur Adam ngidah Hawa, nina "Enda nge maka enggo cocok ras aku", kata cocok i jenda nuduhkan, la lit kurangna ras la lit si man pandangan, guna nampati ia (jadi penampatna). Kata tulanna i bas tulanku, jukutna i bas jukutku nari ngataken maka aminna pe proses e ibahan Dibata tupung Adam tunduh tapi Dibata jine mereken pengertin man bana, e maka ngena atena dingen cocok iakapna.

I bas diri Hawa lit dirina e maka ibahan diberu gelarna, diberu ertina *'ibuat i bas dilaki nari'*, alu bage ndehara ras perbulangenna tuhu-tuhu sada. Ersada guna ndahiken dahin bagi si enggo iaturken Dibata.

### **Pengkenaina.**

Dibata nepa manusia (dilaki ras diberu) selaku mahluk sosial, ertina la ngasup nggeluh si sada, perlu ia erteman sabap mbelin kal tanggungjabap si arus ilakokenna, umpamana mpekena-kena doni enda, mpekena-kena jabu, erdahin i bas perpulungen, erbahan mehuli guna ingan i ja tading. Ngelitken keperlun diri jine sada pe la ngasup, erbahan bajuna pe labo ia beluh, termasuk ngukuri kegeluhenna si sada pe labo ia ngasup. E maka perlu ia teman si cocok guna jadi penampat teman e me manusia, labo rubia-rubia entah tinepa sidebanna.

Manusia ibereken Dibata jadi teman manusia, e me jadi penampat, labo terjeng guna nehi keperlun sada pihak tapi perlu nandangi sada ras sidebanna. Kalak si tek arus nggejabken maka itamaken Tuhan ia i doni enda jadi penampat man temanna, enda teridah i bas si sampat-sampaten, radu ras erdahin, si tumpak-tumpaken, si hamaten sada ras sidebanna.

I bas bahan PA-nta ikataken maka Penampat e, e me diberu (ndehara) jadi pendamping, jadi teman si sejajar ras dilaki (perbulangenna). Sendalanan ras Konfesi GBKP ngataken maka dilaki ras diberu itepa Dibata segambar ras

IA. Dilaki ras diberu ncidahkan 2 jenis si pelain-lain. Labo gelah ipebelin-belin si la seri tapi guna ipersada guna sikuhen. I bas persadan e me manusia ndai ndatkan pasu-pasu alu ertuah jadi enterem, ndemi dengen naluken doni enda ras ngkuasai kerina nurung, perik ras rubia i daraten (Kejadin 1:28).

Kata teman si cocok ertina bali, sebanding, seimbang. Encidahken tugas ras tanggungjabap si bali belinna i bas ndehara ras perbulangen, aminna pe kinatana belinen otoritas perbulangen selaku Imam, kepala ibandingken ras ndehara selaku penampat (bd.Tema). E maka marilah si babai geluh ras pusuhta jadi penampat, silakoken alu meteruk ukur, mejingkat, meriahlah ukurta sabap metanggung kita jadi penampat. Selaku penampat tentu i bas kita lit gegeh ras kengasupen. Radu ras Perbulangen ertanggungjabap nehi VISI Dibata.

### **Brainstorming (curah Pendapat):**

1. Tep-tep kalak nuriken alu jujur kerna penggejapen i bas pengelamenna selaku diberu, i tengah jabu, Gereja, sangkep nggeluh ras i bas ingan erdahin adi ibandingken ras dilaki.
2. Kenca enggo nuri-nuri, apai nge buen si positip entah negatipna, turikenlah !
3. Enggo nge teridah maka Diberu jadi teman si sejajar ras Dilaki?

*Pdt. Jennie E. Keliat, STh.*



- SI MAN OGEN** : Lukas 1:29-38  
**T E M A** : NGENDESKEN DIRI JADI PERKAKAS DIBATA  
**T U J U N** : Gelah Moria:
- Nuriken kuga pendilo Dibata man Maria.
  - Nuratken perbahanen si jadi pasu-pasu i bas erbage-bage dampar.
- METODE PA** : Sharing kelompok

### **Kata Penaruh.**

Ngendesken diri (menyerahkan diri) ertina lanai ertahan nandangi sura-sura diri jine. Seri ras sekalak si ngelakoken salah jenari ngendesken dirina man polisi, ertina enggo sikap ia ngaloken kai tindakan si ilakoken man bana. Bage me kalak si ngendeskan dirina man Dibata, ia arus ngikuti kai sura-sura Dibata. Arah tema-nta ituriken maka kalak si ngendesken dirina man Dibata ipake jadi perkakasNa. Perkakas ertina alat entah pe kelengkapan dahin si iperluken Dibata. Alu bage Dibata si ngaturken kai si ilakokenNa man kalak si enggo ngendesken dirina man Dibata. Kai si arus silakoken guna encidahken kita enggo ngendesken dirinta man Tuhan, jenari kuga ka kegeluhenta adi enggo ngendesken diri man Tuhan? Enda me si ateta si cakapken arah bahan PA-nta i bas wari enda.

### **Mpebagesi Penganggan Kerna Ogen.**

Bahan PA-nta nuriken kerna malaikat si iutus Dibata njumpai Maria guna meritaken kerna ketubuhan Juruselamat arah ia. Paksa si e Maria ertunangen ras Jusup. Ertunangen ertina enggo teriket secara hukum maka Maria enggo ikataken calon ndehara Jusup, tapi langa ia erjabu ras. Malekat nuriken maka mehuli me kulana dinging ipupusna sekalak anak dilaki gelar Anak e pe enggo ikatakenna e me Jesus. Anak e, e me Anak Dibata si meganjangna, IA me pagi Raja bagi niniNa Daud, IA me Raja man kesusuren Jakup, janah kinirajanNa la erkeri-kerin. Dibata mereken perkuah atena man Maria arah nuruh ia jadi dalam Dibata nehken pasu-pasu ntah pe keselamatan man enterem jelma.

Megi berita enda, nungkun Maria: "kuga enda banci jadi , sabap aku si nguda-nguda denga?" Ertina Maria tersungkun-sungkun, ugalah banci lit

anakna adi langa ia erjabu entah ertunangen denga. Secara psikologi" semangat, mbiar, dengen erbage penungkunen turah bas pusuh. Sabap ietehna peradaten si lit maka rikutken kebiasaan kalak Jahudi, adi lit singuda-nguda mehuli kulana langa erjabu, ukumenna ibenteri alu batu. Apai ka Maria enggo ertunangen, banci jadi tunangenna ras keluargana kerina jadi imbangna. Ertina lanai bo lit "taneh kerah" adi mehuli kulana langa erjabu. La lit si mehulina kune jadi si e man bana.

Malaikat Tuhan mpetetap ukur Maria maka nusur dengen ringan me Kesah Si Badia man Maria. Ituduhkan malekat maka lit kalak sideban (Elisabeth) si enggo natang tuah aminna pe enggo metua. Ranan malekat enda erbahanca pang Maria muat keputusan seh maka kerina resiko si pasti ijumpaina, la lit sitik pe mpengaruhi keputusan Maria. Tempa la lit pertimbangan kai pe iberekenna man malaikat. Nina man malaikat si maba berita nda : "Kuendesken diringku man Tuhan, janah jadilah bas aku bagi si ikatakenNdu e!" Lang me banci nge min ndai, enta kuarihken lebe ras tunangenku entah ras orangtuaku, nina! Tapi enda me kepeken adi enggo bulat keputusenna, ia jine sikap ngalaken kerina resiko si terjadi erkiteken keputusan si enggo ibuatna. Enda me si ikataken ngendesken diri man Tuhan, lanai lit pertimbangan kai pe, janah aminna kai pe si jadi tetap ngelakoken sue ras kai si enggo iputusken e. Alu bage, Maria enggo mereken dirina sepenuhna (secara total) man Tuhan guna ipake sue ras si isurakenNa. Ketetapan ukur salih jadi komitmen mereken diri jadi perkakas Dibata.

## **Pengkenaina.**

Tahun enda gerejanta mpersingeti kita gelah nggeluh erkarya ras erguna man kalak sideban. Bagi Maria ngendesken diri jadi perkakas Dibata. Bage ka me kita Moria idilo ras ipake Dibata guna jadi perkakasNa ndahiken dahinNa. Ngerana kerna perkakas, biasana reh rusurna ipake tentu reh telapna, reh terpakaina, dengen reh buena gunana. Adi la rusur ipake perkakas tentu reh mantulna dengen reh la terpakana ngenca banci. Contohna, piso (perkakas dapur), adi la rusur ipake tentu mantul dengen teritipen (tembesin), lanai kita merhat makesa. Bage me pe Moria si enggo ngendesken dirina man Tuhan tentu rusur ipake Tuhan gelah tetap erguna. E maka labo banci kita jungut-jungut aminna bas kai pe kita ipake Tuhan, subuk i bas Sektor, i bas Runggun, dahin Moria bage pe dahin keluarga. Alu bage kegeluhen kinitekenta banci inanami kalak sideban jadi pasu-pasu.

Si jadi penungkunen: enggo kin ndia kita ngendesken dirinta man Tuhan guna ipakeNa jadi perkakasNa? Arah kai kin ndia banci si cidahken maka kita ipake Dibata jadi perkakasNa? Tentu arah kai pe banci; mulai pengerana si maba kemalemen ate, perukuren si mereken serpang puluh (ide kreatif), perbahanen si tuhu-tuhu nampati, entah pe arah hasil karya si banci inanami kalak sideban. Labo menukah ngendesken diri man Tuhan, apaika selaku ndehara, nande, si tuhu-tuhu mbue kesibuken i tengah-tengah jabu. Tapi adi enggo erkomitmen, tentu banci nge silakoken kerina dahin pelayanenta alu mehuli; i gereja, keluarga bage pe i bas ingan sidebanna. La lit si metahat i bas Dibata, si penting kininggienta ngendesken diri.

### **Sharing Kelompok (Kombinasi umur: si nguda ras si metua)**

1. Mari si sharingken, kuga nge sedekah enda gambarena pengendesken dirinta man Tuhan guna ipake jadi perkakasNa!
2. Kai saja pengalamenta, si enggo silakoken guna encidahken maka kita enggo jadi pasu-pasu man sekelewetta? Janah kai denga si banci silakoken!

*Pdt. Liza Selvina br Tarigan*





**SI MAN OGEN** : Epesus 4:1-7  
**T E M A** : KU PINDO MAN BANDU, SIKELENG KELENGENLAH KAM!

**T U J U N** : Gelah Moria:

- Nuriken pemindon Paulus nandangi perpulungen.
- Nuratken ras ngelakoken perbahanen sikeleng-kelengen.

**METODE PA** : Sharing ras aksi

### **Kata Penaruh.**

Rusur ikataken kita enda 'anak-anak Dibata.' Tangkas identitasta e me pengikut Kristus. Sinaksiken keleng ateNa si enggo isehkenNa ku doni enda. Tapi megati jadi i bas perpulungen anak-anak Dibata e enggo urak keleng ate. Lit perpulungen e enggo ngukuri dirina jine, tempa la lit keperlunna nandangi teman sada perpulungen. Biak erdiate enggo ndauh i bas ia, apai ka ngukuri kiniulin kalak sideban. Megati pe si begi turah perubaten i bas perpulungen erkiteken la seri pengangkan. Perubaten e ipebelin-belin seh dungna sigeluten, la nggit sialem-alemen. Perubaten e tampukna ku bas perpecahen. Gejala kai nge si teridah adi lit perpulungen rubat belin seh lanai terbahan purpursage?

Gelah perpulungen e tetap njagai persadan selaku anak-anak Dibata, perlu lalap ipersingeti lako sikeleng-kelengen. Naksiken keleng ate Kristus i tengah-tengah perpulungen.

### **Mpebagesi Pengangkan Kerna Ogen.**

"Ku pindoken man bandu, si keleng-kelengenlah kam." Enda sada persinget i bas Paulus nari man perpulungen i Epesus. Persinget e erpalasken keleng ate Kristus. Tujun persinget e gelah perpulungen e tetap ersada ras njagai persadan amin pe talenta ibereken Tuhan man bana pelain-lain rikutken kengasupen ras pendahinna sekalak-sekalak. Perpulungen Epesus igelari Paulus selaku anak-anak Dibata, si enggo ipasu-pasu Dibata alu mereken erbage-bage pemere pertendin, si ipekeke Dibata janah ipekundulNa i bas ingan si meganjangna. Selaku anak-anak Dibata lit hakna jadi ahli waris Dibata bali ras kalak Kristen Jahudi sideban. Perpulungen Epesus arus encidahken ras naksiken orat geluh anak-anak Dibata e me :

*Sipemena, meteruk ukur.*

Perpulangan Epesus idilo jadi anak-anak Dibata labo erkiteken ulin ia asangkan kalak sideban, tapi erkiteken perkuah ate Dibata. Erkiteken si e perpulangan e la banci megombang (sombong) man ise pe, erpengakap maka ulin entah pe ganjangan ia asangkan kalak sideban. Megombang e la mpersadaken, tapi banci jadi perpecahen. Meteruk ukur e me sikap ngergaken kalak si daban.

*Sipeduaken, lemah lembut.*

Lemah lembut e biak Dibata, si ipenusurNa man anak-anakNa. Sikap lemah lembut e la mpebelin-belin kesalahen kalak apai ka ngukumsa. Tapi nuduhkan ras mabai kalak si erbahan kesalahen ku bas dalam si payo bagi si ngena ate Tuhan. Bagi si enggo inanami Paulus, tupung ia ersura-sura munuh ras engkernepen kalak Kristen. Ijumpai Jesus ia tupung perdalannya ku Damaskus, i je ipetandaken Jesus diriNa. IsuruhNa Ananias njumpai ia, mabaisa ku bas dalam si ituduhkan Tuhan. Labo ia iukum tapi ibabai ku bas pengangkan si payo kerna Jesus. Lemah lembut e pe nuduhkan pusuh si bersih i bas ermediate ras nampati iperdiatekenna keperluan temanna janah buatna baginna nampatisa.

*Sipeteluken, saber.*

Ngasup ngampar bana ras la minter merawa amin pe isalah-salahken teman. Tupung Paulus nuriken kerna perkuah ate Kristus nge si erbahansa manusia terkelin, minter ia ilawan kalak Kristen Jahudi. Amin pe kalak e enggo Kristen, pengangkannya lenga bali ras pengangkan Paulus. Tetap denga nge akapna erkiteken ndalanken hukum Taurat maka selamat. E maka iperimbangna Paulus ras ngajuk kalak Kristen Jahudi sideban gelah ula ngikutken kata Paulus. Ikatakenna pe maka Paulus e nehken pengajaren sesat. I bas ngalaken persoalen si e Paulus tetap saber. Labo ia sinik, tapi iusur-usurna arih-arih. La iperimbangna kalak si njadikan ia imbangna. Pengajaren si payo kerna Kristus e tetap nge ipesehna. Jadi, saber i je nuduhkan kualitas kiniteken man Kristus. Situhuna, biak meteruk ukur, lemah lembut dengen saber e me buah kekelengen si rehna i bas Kristus nari. Nina Paulus, kekelengen Kristus e enggo lit i bas kam. E maka nggeluhlah i bas kekelengen e. E me si erbahansa persadan perpulangan e reh paguhna. La turah perpecahen amin pe megati lit persoalen. Lanai lit sigeluten, si lit e me sialemen salah. E maka kerina persoalen banci idungi ras lit lalap perdamen. Litna perdamen i bas perpulangan e me bukti perpulangan ersada ras Dibata bage pe ersada ras saphi-saphi perpulangan.

## **Pengkenaina.**

Keleng ate Kristus biakna empersadaken. Keleng ate ngeruntuhken elem-elem ras segat ate. Keleng ate nggit ngakuken ras ngalemi salah. Kita anak-anak Dibata lalap erpersukuten man Dibata, si erbahansa kita ngasup ngaloken teman si la seri pe pengangkanna ras kita. Megati pe teman e ndaram-ndarami kesalahenta. Tapi labo e erbahansa kita rimbang ras ia. Si pelajari biak ras karakterna, janah sialoken ia uga litna. Kalak si erkeleng ate, nggit ngergaken teman ras jadi teman man kerina perpulungen. Di kune lit persoalen sada perpulungen e, kita si erkekelengen e mediate janah rusaha erbahan perdamen.

Man banta kalak Kristen e perlu lalap lit penungkunen: i bas ndalani kegeluhenta si teptep wari erdalan denga nge aku i bas keleng ate Dibata? Perbahanenku sue denga nge ras sura-sura Dibata? Geluhku tetap denga nge ipimpin Kesah Si Badia? Kai gunana penungkunen e man banta? Perlu si eteh, maka kekelengen e la terjeng kata-kata. Kekelengen e aktif, teridah arah perbahanen. Kekelengen e banci inanami kalak sideban bage me seninanta i negeri Palestina si ngajuk kita i bas HDS enda. Si nggeluh i bas kekelengen Dibata e uga pe turah i je perdamen. E maka, tetaplah kita sikeleng-kelengen! Sabap kita enggo ipersada bas jabu Dibata. Sada bapanta, janah kita enda ersenina ras erturang. Biak keleng ate ersenina ras erturang tetap si pebelin.

## **Sharing ras Aksi:**

Moria ibagi ku bas kelompok. Teptep kelompok banci 3-4 kalak. I bas kelompok e mari situriken pengalamenta i bas ndalani kegeluhen perpulgenta.

1. Pernah nge kam la siangkan ras temanndu sada perpulungen, bas la siangkan e uga sikapndu, uga banndu cara ndungi persoalen e.
2. Si suratken sada bentuk kekelengen si banci silakoken nandangi teman sada perpulungen.

*Pdt. Nurbety br Ginting, M.Th.*



**SI MAN OGEN** : Heber 13:4-5

**T E M A** : TETAP NGERGAKEN PERJABUN

**T U J U N** : Gelah Moria:

- Nuriken kecibal jabu i lebe-lebe Dibata.
- Nggejapken uga ergana jabuna i lebe lebe Dibata.

**METODE PA** : Meditasi dan aksi

### **Kata Penaruh.**

Sigejapken entah lang i bas paksa enda keluarga jadi sasaren tantangan jaman si erbahansa melala jabu lanai siangkan. Melala jabu si lanai nggeluh i bas tanggungjabap guna njagaisa radu ras, janah keegoisen si erbahansa jabu e rayung. Lit jabu idominasi pihak peteluken, umpamana orangtua si erban i bas jabu anak-anakna. Persoalen si deban; ekonomi ras relasi sosial si enggo urak, la ngasup ngamper bana, pinakit sosial si jadi i bas lingkungan terpengaruh ku bas jabu e maka perjabun e pe lanai meherga, janah lanai lit nilai kiniteken i bas jabu. Lanai siergan, komunikasi lanai mejile, turah me perselingkuhen ras lanai siteken. Si jadi korban e me anak-anak ras jabu e jine sabap si jadi tontonen teptep wari e me perpecahen, perang dingin, perubaten si erbahansa jadi beban mental. PA-nta wari enda tole ngajuk kita tetap ngergaken perjabun.

### **Mpebagesi Pengangkan Kerna Ogen.**

Judul perikop ogenta e me "cara ndalanken si ngena ate Tuhan." Salah sada e me ngergaken perjabun. Sabap melala jabu lanai ngergaken perjabun. E maka iajuk perbulangen ras ndehara i bas perjabun e la banci melket, ertina la lit si encedaken perjabun (perkawinan monogami). Perjabun Kristen Badia e maka arus tetap ijaga kebadian e. Tangkas kal ikataken i bas kitab Heber enda maka labo manusia si ngukum kalak si nggit erlua lua, si encedai perjabunna tapi Dibata. Jabu e Dibata si nepasa janah si masu-masusa. "Dibata pagi ngukumsa kalak si erlagu langkah la mehuli bage pe kalak si erlua-lua." Perbahanen erlua-lua e umpamana selingkuh, janah la setia man ndehara entah perbulangen. Perbahanen si bage ciga ate Dibata. Enda perbahanen dosa ras arus iukum. Enda me si man kebiarenken

kalak si erkiniteken, hukumen i bas Dibata nari (itungung i bas api kegelapen, jabu e pe gelap jadinya, lanai lit i je dame sejahtera, kesetian, pengampunan si erbahansa jabu e kerah dengen lanai turah i bas si mehuli.

Sipeduaken kitab Heber mpersingeti maka teptep kalak Kristen ola merangap nandangi duit, ermengkahlah atendu asa si lit i bas kam. Sabap nina Dibata asa ndigan pe la kam kutadingken asa ndigan pe la kam kupulahi. Kegeluhen si merangap erbahansa kai pe iakap lanai meherga. Merangap e dosa, sabap lanai meherga akapna Dibata. Duit akapna banci ngaturken kerina geluhna. Kalak si merangap si tuhuna tundalkenna Dibata. Kalak si bage pe iukum me pagin. Siniarapken i bas perbulangen e me kap ngatake bujur sabap Tuhan nge si ncukupken kerina keperluan geluh anak-anakNa. Kerina jelma perlu duit, tapi olamin sempat duit e si ngatur kegeluhenta. Lit sada ketetapan ukur sinibereken "asa ndigan pe la kam kutadingken, asa ndigan pe la kam kupulahi". Tuhan si tetap natang kegeluhen kalak si ernalem man bana. Bias i bas si sitik, melala pe la keru. Bas pertoton siniajarken Tuhan Yesus pe: bereken man kami nakan si cukup bas wari sendah enda, bage pe ola aru atendu kerna pangan, inemen ras uis si pagin sabap ieteh Dibata kerina si iperluken (band. Matus 6:31-32). Jadi perayaken geluh si pemena e me ndarami kai si ngena ate Dibata. Si ngena ate Dibata e me ngergaken perjabun dengen erpengarapen man baNa saja. Alu kata sideban: setia man perbulangen entah ndehara ras setia man Tuhan. Kata Dibata mpelimbarui kegeluhen jabu, gelah tetap malang man Tuhan.

## **Pengkenaina.**

Erbage bage biak si la payo i bas perjabun si perlu si pedauh i bas jabunta nari e me: percabulan, erlua lua, hubungan sejenis (homoseksual ras lesbian) prostitusi bage pe pornografi. I bas perjabun si ibangun i bas pasu-pasu Dibata perlu mpelajari biak pasangenta, ula lupa janjinta tupung pemasu-masun. Masalah ekonomi, karakter si la mehuli, la nggit berubah si e kerina banci jadi tantangenta i bas mbangun perjabunta. Nina Pdt. Julianto Simajuntak, perjabun e perlu irawat (merawat perkawinan) biak si mehuli terus ipupuk, isiram, ipompa gelah reh belinna. Karakter si la mehuli, keegoisen, perlu iruah desken ngeruah dukut, ikut ras uratna gelah ulanai lit tading. Alu bage jabu e mehuli, mejie reh dekahna.

Guna si e me perlu kita tetap nggeluh i bas Tuhan gelah ula kita ngeliami perjabunta. Pasangenta e me anugrah Tuhan si patut tetap siergai ras

sikelengi seh rasa lalap. Ngalemi salah e me jadi pergegeh guna lanai ngidah kekurangan pasangenta tapi nutupi kekurangan ras kelemahenna. Tergantung kita genduari kai si ban singkatan SMS : SELANGKAH MENUJU SELINGKUH entah SETIA MENUJU SELAMAT. Sada persinget si perlu ipergermetken: *"kalau anda mau menyelamatkan masa depan, kuburlah masa lalu anda,"* termasuk ngkubur nomor mantan pacar, gelah ulanai ngganggu ku bas masa depan perjabunta. Selamat ribut rukun i bas Tuhan.

### **Meditasi Ras Aksi.**

1. Lit sekalak si mabai acara guna erbahan meditasi
2. Kerina Moria si pulung kundul mencayang ras la sidegesen
3. Rende *"Bapa Engkau Sungguh Baik"* iulih-ulih jannah nginget ayo perbulangen ras anak-anak i bas tengah jabu.
4. Kenca bage ertoto notoken perbulangen ras anak-anak i bas tengah jabu (ertoto alu ersora) idungi alu pertoton Tuhan.

### **Rende : Bapa engkau sungguh baik**

Bapa Engkau sungguh baik kasihMu melimpah di hidupku  
Bapa ku bert'rimakasih berkatMu hari ini yang Kau sediakan bagiku  
Kunaikkan syukurku buat hari yang Kau b'ri  
Tak habis habisnya kasih dan rahmadMu  
S'lalu baru dan tak pernah terlambat pertolonganMu  
Besar setiaMu di s'panjang hidupku

### **Aksi Man Pasangenta:**

**Kenca si e tuliskan i bas sada kertas berwarna:** 5 si mehuli bas perbulangenndu, jenari kenca seh i rumah bereken man bana kertas ndai jannah kataken; *"sayang, enda ndai kutuliskan 5 karakterndu si mehuli."*

**Si lanai lit perbulangenna:** taruhkan bunga 'jjarah ku pusara perbulangenndu.

*Pdt Natallidna Tarigan, MTh*



**SI MAN OGEN** : 1 Samuel 1:9-18

**T E M A** : PAGUH I BAS PENGARAPEN

**T U J U N** : Gelah Moria:

- Nuriken kinipaguhen Hana i bas erpengarapen man Dibata.
- Nuratken tanda-tanda nande si paguh erpengarapen man Dibata.

**METODE PA** : Study Kasus

### **Kata Penaruh.**

Rikut kecibal sosial masyarakatta, anak i bas perjabun tuhu-tuhu iarapken ras itimai. Anak jadi penerus generasi/merga i bas jabu e. Lit pupus entah lang mbelin ngaruhna ku bas kegeluhen perjabun. Lit denga jabu si sirang erkiteken la lit anak i bas perjabun. Lit ka perjabun la meherga, la iakapna lit tujuan perjabunna erkiteken la lit anakna. Banci jadi turah persoalen-persoalen i bas perjabun erkiteken langa lit pupus. Erbage-bage si ilakoken medis gelah pasangan e ndatken pupus, tapi langa mereken ulih. Bagi ninta rusur tubuh entah mate lit i bas kuasa Tuhan e maka pasangan si langa ndatken pupus tetap paguh erpengarapen bagi Hana nande Samuel.

### **Mpebagesi Pengangkan Kerna Ogen.**

Keluarga Elkana tading i Rama e me i bas suku Efraim nari. Ndeharana lit dua, Hana ras Penina. I bas kalak Israel kebiasaan erjabu dua kali (poligami) erkiteken ndecharana sintua la banci mupus. Bage me kemungkinen Elkana, erkiteken Hana la lit pupusna e maka erjabu ka ia ras Penina. Keleng kal ate Elkana man Hana. Amin bage gia mesui ate Hana sabap Penina erbahan mesui pusuhna. Teptep tahun Elkana maba keluarganya ersembah ku Rumah Pertoton i Silo dengen mpersembahkan persembahen man Tuhan. Kesempatan e tentu jadi keriahen i bas kerina anggota jabu Elkana. Tapi i je ka me kesempatan Penina mpeganjang ukurna, isaling-salingina Hana erkiteken la lit pupusna. Megati kal Hana tangis, erkiteken mesui atena ibahan kiduana e. Tambah kiniseranna sabap tupung e pe lit pengangkan maka adi diberu la banci mupus e man kemelanken, iakap kena sumpah, entah pe kena hukuman Dibata. Sekali jadi tupung keluarga Elkana nehken persembahen ku Rumah Pertoton, itungkasken Hana ceda atena, janahna

tangis ertoto ia man Tuhan alu mengisngis, ipindona gelah Tuhan ngenehen kesusahenna, nginget ia, mperdiateken kecibalna. Arah pertoton Hana enda nuriken maka la ia meherga, ilupaken, janah kiniseran jadi ayam-ayam geluh kune la mupus. Perasan enda ipetangkas Hana i bas ayat 15-16, maka ceda kal atena dingen susah kal akapna.

I bas Hana ertoto, erpadan pe ia maka adi ibere Tuhan ia mupus anak, iendeskenna me anak e man Tuhan. Enda tanda maka Hana tuhu-tuhu erpengarapen man Tuhan, iendesken anak e jadi sekerajangen Tuhan, bukna pe la ipangkas. Etanda maka ia tuhu-tuhu erpadan man Tuhan (ernazar). Ertoto ras er-nazar labo maksa Tuhan, e jadi sada bukti ketutusenna i bas ertoto. Rikut undang-undang Musa maka tanda nazar, la banci mangkas entah encukur buk sekalak si enggo erpadan (nazir) (Bilangan 6:5,14). Tujun pertoton Hana mindo anak, labo gelah Penina lanai erbahan mesui pusuha, entah ngubah kecibalna selaku diberu si la banci mupus. Tujunna mindo ganjangen asa si e gelah banci anakna e ipersembahkan man Tuhan. Bage me kinigenggeng Hana ertoto ngendesken perbebenna man Tuhan.

### **Pengkenaina.**

Kinatana gundari enterem ka nge si idah pasangan si enggo ndekah erjabu seh belasen tahun, tapi langa ndatken pupus. I bas tengah-tengah perpulungenta pe enggo me rusur itotoken gelah jumpa tuah, anak dilaki ras anak diberu. Banci jadi keluarganta kurang mediate, masyarakat pe langa payo pengangkanna kerna pemere Tuhan, si penting tetap erpengarapen, erpengendes man Tuhan, alu sabar setia ngidah sura-sura Tuhan. Tetap ertoto bage pe ndalanken si ngena ate Tuhan. Dikune pe langa kita ndatken pupus, labo ertina Tuhan la mbegiken pertotonta. Banci jadi Tuhan ersura-sura mereken tuah i bas jabunta labo arah mupus (lahir dari rahim sendiri). Sabap mbue ka nge anak-anak tubuh ku doni enda, itadingken entah la ialoken orangtuana. Dibata alu kebujuren ras keleng-ateNa man kerina manusia, ngasuhi ras engkelengi anak-anak si bage kecibalna. IberekenNa kesempatan man keluarga-keluarga si langa ndatken tuah, guna ngasuhi ras mpebelin-belin anak e. Tuhu Dibata e adil ras bujur, man bana kita erpengendes ras erpengarapen.

Megenggeng ras erpengarapen man Tuhan jadi gegeh, si erbahanca aman. Pengarapen mpengasup kita megenggeng i bas kiniseran ras ertoto la erngadi-ngadi.

## **Study Kasus:**

Sekalak Moria si enggo 6 tahun erjabu langa ndatken tuah. Enggo me piga-piga kali ijumpaina dokter ras ngikuti kai si ikataken dokter. Enggo rusur mindo gelah Tuhan mere ia tuah, tapi langa lit ulihna. I bas keluarga megati ia jadi percakapen, simetuana nungkun rusur ndigan aku erkempu. Mulana penungkenen simetuana e labo jadi perbeben man bana tapi kedungenna erbahanca gulut ukurna. Iangkana nge sura-sura simetuana erkempu sabap perbulangenna anak tonggal dilaki. Pernah pe ibegina simetuana ngerana ras perbulangenna, nina: *"banci kin permen ah mupus, ula kari kam ngenca si sada ngasa metua nakku. Aku labo ateku masap kam, la lit kesusurenndu."* Percakapen simetuana ras perbulangenna erbahanca gulut ukurna. I bas perpulungen pe morah kal atena mbegi-mbegi temanna Moria nuriken kerna anak-anakna. Lit si sangana erlajar erdalan, deba erlajar ngerana, deba pertawa, perngandung ras sidebanna. Ralo kerina rananna ras meriah akapna nuriken anak-anakna. Nina sekalak Moria: *"kam ndigan nande sope, seru lho punya bayi."* La ijababna penungkenen temanna ndai, cirem saja ia. Lit ka idahna Moria si deban sangana natang tuah, nina i bas ukurna: *engkai maka aku la bagi ia sangapna? Engkai maka lalap la ibegiken Dibata pertotonku? Kai kin dosaku?"* Tole nina i bas ukurna: *"aku labo bali ras temanku Moria enda kerina"*. Dungna enggo mekisat ia reh ku perpulungen.

1. Adi si gargari pusuh Moria si langa ndatken tuah enda, uga nge akapndu perasanna? Adi lit i bas paksa enda si langa natang tuah, suruh nuri-nuri.
2. Uga caranta nampati adi lit i bas tengah-tengahta bagi Moria si lenga ndat pupus enda. Bahan langkah-langkah konkrit i bas nampati ia.

*Pdt. Sariyani br Barus, M.Th.*



**SI MAN OGEN** : Rut 1:1-6

**T E M A** : I BAS TUHAN AKU MEGEGEH

**T U J U N** : Gelah Moria:

- Nuriken perjuangan Naomi i bas ndalani kegeluhenna.
- Ngangkai kegeluhen *Single Parent*.

**METODE PA** : Sharing & Aksi

### **Kata Penaruh.**

Peneliti unggas (Ornitolog) ngatakenca maka la lit perik si matana mesinting bali ras rajawali. Mata rajawali ngasup ngidah puluhen kilometer tupung kabang i datas langit. Rajawali ngasup ngidah rubia-rubia si tading i bas peren-peren, rubia-rubia si njoler i bas paya, aringgeneng i bas batang kayu, nurung-nurung i bas lau maler ntah lawit. Mata rajawali ngasup nandai rupa. Lain ka ras manusia. Man manusia la ibereken Dibata mata bali ras mata rajawali gelah kita malang man baNa. Kinilangasupenta nuduhkan 'Kemahakuasan' Dibata nandangi geluhta janah e ka dalanna kita erkemalangen man baNa. Dibata Perancang Agung bas kegeluhen anak-anakNa (band. Jeremia 1:4-5). Dibata enggo ngukuri ras nepa geluhta alu sempurna. Melala perbeben jadi bas geluh, erbahanca latih dinggen kelsehen. PA-nta wari enda tole mabai kita megegeh i bas si e.

### **Mpebagesi Pengangkian Kerna Ogen.**

Kitab Rut e me sada kitab si *cukup unik*, ipake gelar sekalak diberu (Rut) i bas jaman si la ngergaken diberu bage pe Rut labo sekalak diberu Israel. Ia kalak Moap, salah sada musuh bangsa Israel. Amin gia peran Naomi ras Boas cukup penting, labo ipake gelar salah sada i bas kalak enda.

**Rut 1:1-6**, nuriken sada *turi-turin geluh* si pagit, Naomi jadi pemeran utamana. I je teridah uga pemeliharaan Tuhan ras perkuah ateNa nandangi terombo keturunan Mesias. Lit kelihen si mesangat i bas jaman hakim-hakim (menaken kematen Josua seh ku bas pemerintahen raja Saul). Teptep bangsa Israel ngelakoken pelanggaren man Tuhan, i je lit ukumen i bas Tuhan nari. Bage gia Dibata nuruh hakim-hakim jadi penyelamat bangsaNa. Kelihen si mesangat enda me erbahanca lit perpindahan jabu Elimelek i

Betlehem nari ku Moap (dauhna  $\pm$  80 km, erdalan nahe  $\pm$  7-10 wari). Erti Bethlehem eme "rumah roti" si arusna ingan si melala i je pangan, tapi si terjadi sebalikna, kelihen si mesangat. Perukuren guna pindah ku Moap rehna i bas keluarga Elimelek (erti gelarna: "Allahku adalah raja.") Erti gelarna enda la inanami Elimelek ras keluargana, sabap jadi kalak pertandang i kuta kalak, la kentisik tapi ndekah. I bas perdalanen geluh tading i kuta Moap, labo kepeken keriahen ukur idatken keluarga enda, tapi erbage-bage kiniseran si man alanken.

### **Perbeben sinialaken Naomi paksa e, e me:**

1. *Kematen perbulangen.* Elimelek e me perbulangen Naomi. La ieteh kai si erbahanca, mate me Elimelek. I negeri Moap mbelin kal pengarapen man bana maka 'Moap' jadi ingan nerusken kegeluhen man ndehara ras anak-anakna. I je me ia ngalaken perbeben jadi mbalu i kuta kalak.
2. *Kematen anak-anak.* Pengalaman Naomi berulang man permenna (ndehara Mahlon ras Kilyon si muat diberu Moap) e me Orpa ras Rut. I bas 10 tahun dekahna (perbulangen ntah anak) tading i Moap, sempurna kal kiniseran Naomi (itadingken perbulangen ras 2 anakna si dilaki). Kai si inanami Naomi tuhu-tuhu perbeben si mberat. Adi la kin lit pertahanan geluh si nteguh, banci jadi lanai lit arapen geluh i bas Naomi. Kai nari gunana nerusken geluh alu erjuang i kuta kalak adi lanai bo lit keluarga? Nggeluh erpala-pala ras sidebanna.
3. *Geluh Arus Iterusken.* I bas budaya Jahudi, diberu e la meherga adi lanai lit perbulangen ras anak-anak. Naomi enggo mbalu (la erperbulangen ras la lit anak). Ia tuhu-tuhu musil. Arah kecibal geluhna banci saja la iergaken, seh banci ijadiken budak. Lanai lit arapen Naomi erjabu sabap ia enggo metua (1:11-12). I bas jaman e, la lit dilaki nuduhkan la lit perlindungan si banci idatkenna.

I bas kerina kiniseran Naomi, lit denga pengapul man bana e me dua permainna si nemani ia. Gia Orpa mulih ku kutana tapi Rut tetap setia ngikutken simetwana. Rut ngikutken bibina erkiteken ietehna maka adi duana ia ngalaken kegeluhen si pagit pasti lit kengasupen (ay. 16). Naomi muat keputusan mulih ku kutana Bethlehem. Mulih ku Bethlehem bali kap mulih kempak Tuhan, ndahi Tuhan dingen tading ras Tuhan. I je nari me Naomi ngaloken gegeh ras pasu-pasu Dibata. Ibabana diberu kalak Moap ikut ras ia. Mbar beritana kerehen Naomi ras Rut ku Bethlehem tapi lit ka nge ncakapkenca. Erkiteken kiniteken man Tuhan bage pe kinigenggengen erbahanca Rut ras Naomi tetap ngasup ndalani kegeluhenna.

## **Pengkenaina.**

Erbabu e me pilihan ras keputusan manusia tapi jadi orangtua tunggal (*single parent*) e me bagin si la terukuri manusia. Sekalak diberu si jadi *single parent* ngalaken perbeben si mberat: *kebenen teman geluh*, ngalaken jelma si enterem, masalah ekonomi keluarga ras sidebanna. Selaku 'single parent' iperluken sada komitmen arus megegeh ras nguasai diri gelah ula kelsehen. Ia arus ngasup ngelakoken *peran ganda (sebagai ayah yang mencari nafkah dan sebagai ibu yang membesarkan serta mendidik anak)*. La saja urusen i bas rumah, i bas jelma si enterem selaku diberu si enggo mbalu megati la ialoken alu positif. Erbage situasi geluh si man alanken, si pagit, si macem nta entebu. Uga pe kecibal kegeluhen e, ula tadingken Tuhan. Arus si akui maka enterem jelma berhasil i bas geluhna gia la erbapa (mis. Barack Obama, presiden Amerika Serikat pe-44-ken). Dibata mpekena-kena diberu balu-balu ras anak melumang (Jeremia 49:11). Kita selaku kalak si tek arus mbela diberu balu-balu bage pe anak-anakna (Jesaya 1:17). Timotius ididik nini ras nandena jadi kalak si tutus erkiniteken man Tuhan. Ertina, lit potensi arah diberu si enggo mbalu i bas ndidik anak-anakna, mabai geluhna erguna man jelma si enterem. Bagem iperluken Moria si kuh jabuna mereken dukungan man Moria si '*single parent*' gelah lit ketahanan ras komitmen i bas ia nehken tanggungjabapna subuk ku bas jabu, ku tengah-tengah perpulungen bage pe ku bas jelma si enterem. Arus si akui maka nanam lit e la terakap, kenca lanai lit maka enggo tergejap. Ise pe labo pernah ersura itadingken pasangan geluhna, tapi adi enggo jadi lanai banci isilahken. Dukungen ras pendampingen man *single parent* mereken pengaruh si mehuli gelah igejapkenna maka Dibata tetap nemani ras ngkawali geluhna.

## **Sharing ras aksi:**

1. Uga nge pengidahta kerna budaya si rusur menghambat kegeluhen *single parent*?
2. Kai nge si banci ilakoken Moria si kuh jabuna nandangi *single parent* gelah lit ketahanan geluh i bas ia?

*Pdt. Lestari br Bukit*



**Minggu,  
24-30  
Maret  
2024**

*Okultisme*

**SI MAN OGEN** : Esekiel 13:17-21

**T E M A** : KUASA DIBATA ERDOLAT

**T U J U N** : Gelah Moria:

- Nggargari perbahanen-perbahanen si ciga ate Dibata.
- Mbiasaken nggeluh i teruh Kuasa Dibata.

**METODE\PA** : Kesaksian

### **Kata Penaruh.**

Okultisme ertina tek man kuasa-kuasa gelap. Kuasa e iakap si banci mereken gegeh ras serpang pulah man manusia, i bas kerina dampar geluhna si labo rehna i bas Dibata nari. Kuasa gelap e terbuni, la kerina kalak banci ngidahsa ras nurikensa. Engkai maka lit denga kalak si teriket ku bas praktek okultisme? Banci saja lit sura-surana, umpamana gelah pedas bayak, gelah pedas naik pangkat, gelah pedas sehat, gelah dat teman nggeluh, gelah kulana kebal. Tapi lit ka erkiteken mbiar, lit akapna rusur si ngganggu i bas geluhna si erbahansa ia la teneng. Ingan kuasa gelap e banci i bas benda-benda/jimat, binatang, batang kayu, kuburen manusia ras sidebanna. Ingan-ingan e niakap lit kuasana si banci mereken gegeh ras serpang pulah i bas ngalaken perbebenna. Mari si perdiatoken praktek okultisme si lit i bas ogenta enda.

### **Mpebagesi Pengangkan Kerna Ogen.**

Manusia si ermasap-masap, e me pendilo Tuhan man nabi Esekiel. Isuruh Tuhan nabi enda mperdieteken nabi-nabi diberu si perguak si erdahin i tengah-tengah bangsa Israel. Paksa e lagu langkah bangsa Israel encedai pusuh Dibata janah sura-suraNa kin pe ngukum bangsa enda. Iidah Dibata maka lit nabi palsu si diberu si ersura-sura nebu-nebu bangsa Israel si diberu. I bas ia nebu-nebu e ipakena alat/barang-barang si ipake diberu. Ipakena jimat ku bas pergelangen tan bage pe makeken tudung/kerudung man diberu-diberu si ndahi ia. Tudung i bas budaya timur e simbol kemakmuren ras kemenangan. Tudung e ibahanna mejile alu namai perhiasenna, sikap man tatapen. Jimat i bas pergelangen tanna e nuduhkan geluh la kekurangan (makmur). Nabi perguak e, nami-nami diberu-diberu

Israel gelah make tudung si enggo tama perhiasenna. Ikatakenna, adi pake tudung e kerina ia mejile ras mehaga. Ertina, labo ia pagi ndekah rate gulut, amin pe pagi kena ukumen. Nabi perguak e rusaha gelah diberu diberu Israel tek man katana. Dungna, kalak Israel tetap erbahan si jahat, lanai bo piga si tutus er-Dibata. Kenca nabi perguak e erbelas, dat upah ka ia i bas kalak Israel e nari, e maka la erngadi-ngadi ia nuriken kata guak si tempa mehuli man beginken. Kai si ikataken nabi perguak e tuhu-tuhu petembil ras kai si ikataken nabi Dibata. Situhuna, bage ibahanna guna kepentingenna jine, lako ndatken piga ngkrauk gandum ras piga-piga ncepik roti.

Nabi Dibata jine nuriken maka adi bangsa e la ngendesken dirina man kalak Babel, maka kerina dilaki kalak Israel e ikerneppen ras diberu-diberu Israel ipenusur erga dirina, lanai jadi kalak si mehaga. Adi sedekah enda ingan kundulna i bas ingan si mehaga, ipaksa me pagi kundul i taneh, bukna iserbuti, nuduhken kecedan ate erkiteken la iergakenna dirina jine. Enda gambaren kalak si iperbudak. Nabi Dibata e ngatakensa bangsa enda pagi ibuang ras ngenanami si mesui kurang lebih 70 tahun. E labo waktu si kentisik.

E maka isuruhNa Nabi Esekiel ernubuat kerna kecibal nabi perguak e. *"Cilaka me kam o diberu-diberu tukang nubuat!"* Ku sintapken me tudung penangkalIndu janah ku bere bangsaKu pulah i bas kuasandu nari seh rasa lalap. Kenca bage itehndu maka aku kap Tuhan. Labo ate Dibata senang adi bangsaNa reh dauhna nadingken IA. E maka di kune lit kalak si mabai bangsaNa ku dalin si papak segat kal ateNa. Nabi diberu si perguak e la banci lang mela akapna sabap irigat-rigatken Dibata tudung si rusur ipakena nebu-nebu bangsaNa, isintapkenNa jimat si lit i bas pergelangen tanna. Ibebasken Dibata me pagi bangsaNa i bas kuasa nabi diberu si perguak e. Labo ngasup nabi perguak e ngelawan Kuasa Dibata. Kerina jimat ras pemetehna kernep nge pagi. Labo lit kuasa si deban si ngasup njului Kuasa Dibata e. Mate geluh manusia pe kerina lit i bas kuasaNa.

## **Pengkenaina.**

Labo kepe nai ngenca lit praktek okultisme, seh asa genduari lit denga kalak si makesa, umpamana; diberu si sangana natang tuah ibaba-babana gunting, leketkenna bas bas bajuna, namaken lasuna tonggal i bas dompet gelah ula bene senna, nama jerango i bas bura anak-anak, erbahan lapik ras mereken besi mersik man anak perana si atena lawes erlajang. Lit ka si

make susuk, gelah teridah tetap nguda, make pelaris ras erbahan paju-pajuhen gelah lancar usaha. Lit denga ka kalak si tek man roh nini tudung si enggo mate banci maba tuah entah si la mehuli adi la mehamat man bana. E maka ikuburen rusur ibereken cimpa matah, belo, isap, mumbang ras sidebanna encidahken kehamaten. Anak singuda genduari tek denga nandangi ramalen bintang (horoskop), ngenen garis tan, main jelangkung seh banci kerina kesurupen.

Kerina si make kuasa gelap situhuna erkiteken la tandaina alu payo Dibata si erdolat nandangi kegeluhenna. Si make kuasa gelap e biasana mekisat ertoto, la tek nandangi Kata Dibata, e maka la ia biar-biaren nulak KataNa. Murah depresi, merawa ras rubat i bas jabu. Kerina perbahanen si bage ciga ate Dibata. Janah kalak si bage, labo banci dat bagin i bas kinirajan Dibata adi la ia mulih ku Dibata. Kuasa Dibata belinen asangkan kerina kuasa si lit i babo doni enda. Man bana saja kita ernalem. Biasakenlah tep-tep wari erpengendes man baNa. Sialoken me kedamen si tuhu-tuhu.

### **Kesaksian:**

1. Moria 2 seh 3 kalak nuriken kesaksinna pernah iajuk kalak gelah make kuasa gelap. Adi ikutkenndu uga ulihna, adi la ikutkenndu kai alasenna?
2. Dibata erdolat (erkuasa, keputusenNa si jadi) i bas geluhta. Uga dage sikapta ku lebe wari enda?

*Pdt. Nurbety br Ginting, MTh*





**SI MAN OGEN** : Masmur 71:17-18

**T E M A** : NURIKEN PERBAHANEN DIBATA  
SI MEJIN

**T U J U N** : Gelah Moria:

- Nggargari perbahanen Dibata si mejin.
- Jadi usihen encidahken perbahanen Dibata si mejin nandangsi Saitun.

**METODE PA** : Diskusi ras aksi

### **Kata Penaruh.**

Adi lit kesempatendu guna nuri-nuri kerna perdalanen geluh enda, kerna kai nge atendu si turikenndu? Banci jadi, piga-piga kita nuriken kerna perbeben nggeluh si la erkeri-kerin, sulitna ekonomi, perjuangan nekolahkan anak ras njagai isi jabu. Banci jadi, lit ka piga-piga si nuriken kerna kesuksesen nggeluh, ntah usaha bage pe karir. Tentu, kerina turi-turin nggeluh enda banci ituriken. Tapi bicara terjeng je ngenca, kita ngerana kerna dirinta jine. Tempa-tempa kita ngenca si erdahin ras ngusahaken kerinana maka e jadi. Ogenta wari enda, e me belas-belas sekalak pemasmur si enggo metua, si milih guna nuriken kerna kuasa ras kinimbisan Dibata i bas geluhna.

### **Mpebagesi Penganggan Kerna Ogen.**

Metua dengen ubanen, dua kata si lit i bas teksta enda nuduhkan situasi nggeluh pemasmur. Kata metua nuduhkan umur si nggedang, pengalamen si mbue, bage pe cara rukur si mbages. Kata ubanen nuduhkan buk si enggo mbentar. Duana kata enda, metua ras ubanen, ncidahkan kegeluh si enggo ngalaken erbage perdalanen dengen pengalamen nggeluh. Macem, pagit, ntebu, bage pe teriluh entah tawa, erbage rupa situasi nggeluh enggo inanami pemasmur. E maka arah ogenta Masmur 71:17-18 enda, teridah pengakun pemasmur kerna kegeluhenna si dem alu pengarak-pengarak Dibata. Benaken kin kitik-kitik nari Dibata si ngajari. Dingen seh asa metua dengen ubanen, pemasmur tetap nggejapken keleng ate ras perbahanen Dibata si mejin (luar biasa, mehuli). I bas cakap Indonesia, pemasmur ngakuken "perbuatan-Mu yang ajaib." Perbahanen Dibata belinen asangkan kebeluhen ras kengasupen manusia ngukuri si mehuli kerna kegeluhenna. Enda me sada cara rukur si mabai ketenengen. Bicara jumpa perbeben

dingen percuban, pemasmur nuluh ku pudu, nginget-inget kerina perbahanen ras penampat Dibata. Dibata enggo nampati tahun-tahun kegeluhenna, si ngalaken sada persoalen ku persoalen sideban si la erngadi-ngadi. Tapi Kuasa Dibata tergejap kal nampati benaken kitik-kitik nari seh asa metua dingen ubanen. Dibata tetap ngajari dingen mere kepentaren guna mentasi kerina. Cara rukur si bagenda, ngerehken pengarapen maka Dibata tetap erkuasa dingen nampati seh ku paksa-paksa seterusnya. Jenari pemasmur ngumputi pengakunna alu sada pemindon man Dibata gelah i bas geluhna si enggo metua dingen ubanen Dibata tetap serta, nina "ola kal aku tadingken." Enda bentuk pemindon si jujur kal, sabap alu ertambahna umur nggeluh, enggo metua, maka gegeh i bas daging kula pe reh urakna. Ayat 18 enda dem alu aru ate kerna umur si enggo metua. Daging kula lanai bagi si gelgel, gegeh enggo erbaleng, pengidah ras pemegi reh urakna ras sidebanna. Kalimat "ola kal aku tadingken" e me pemindon si reh arah pusuh nari. Megati i bas kegeluhen enda, lit pengakap maka kalak si enggo metua tempa lanai lit ertina, sabap lanai iakap erguna janah jadi beban. E maka itadingken dingen ilupaken piah nterem kalak si metua kelungunen i bas paksa metuana. I bas si e pemasmur maba kebiaren ras kearun atena man Dibata. I bas Dibata kerina meherga, amin pe enggo metua. Alu bage, pemasmur ngakuken maka alu penemani ras pengarak-ngarak Dibata, kalak si enggo metua dingen ubanen, tetap erguna dingen ngasup ersaksi kerna kuasa ras kinimbisan Dibata. Enda me sura-sura si mbelin i bas pemasmur. Umur si metua dingen ubanen labo jadi alangen guna nuriken keleng ate Dibata. Arah penemani Dibata pemasmur ermomo, ersaksi nuri-nuri kerna kuasa ras kinimbisan Dibata man sinursur si nandangi reh. Sinursur e me si nerusken kegeluhen. Tujunna gelah sinursur pe ngantusi, nggejapken dingen ngasup ngakuken kinimbisan Dibata bas geluhna.

### **Pengkenaina.**

*"Older in years, strong in faith,"* ertina umur meganjang, megegeh bas kinitekan, enda sada slogan si tepat guna nuriken kerna kecibal orangtua si enggo bengket ku kategorial saitun. Orang tuanta saitun enggo mentasi mbue tahun, dingen reh warina reh tambahna kiniteken ras pengarapenna. Bagem totonta kerna kerina saitun GBKP. Alu bage, kecibal saitun i tengah-tengah pelayanen GBKP nambahi semangat man sinursurna. Melala kal si banci ipelajari i bas saitun nari. Bagi si ikateken Job 12:12-13, nina: "I bas kalak si enggo metua lit kepentaren, tapi i bas Dibata lit kepentaren ras

gegeh. Pengertin pe lit nge i bas kalak si enggo metua; tapi i bas Dibata lit pengertin ras gegéh guna ndalankensa.” Tepat kal pengakun pemasmur enda jadi pengakun orang tuata saitun, sabap i bas Dibata reh gegéhna ia kerina. Janah kita pe reh ngasupna ngergaken saitunta sabap kepentaren, pengertin lit i bas saitun erkiteken Dibata si mereken gegéh man bana. Perbahanen Dibata si mbisa e enggo igejapken Saitun janah mbelin pengarapenta si e banci iturikenna nandangi kesusuren si nandangi reh. Bicara nulih kita ku pudi, semalna Saitun meriah kal niakapna nuri-nuri kerna kinata kegeluhen. Adi ndube turi-turin si ituriken Saitun e me erbage turi-turin kegeluhen umpamana Kak Tangko Bunga ras debanna. Gundari ajuklah Saitun nuriken kerna Dibata, i bas Saitun nuri-nuri oratna kita mereken diri ras pusuhta guna megikensa, arah si e Saitun nggejapken ia merga ras erguna, kita pe ngalaken mbue pemeteah i bassa nari. Selamat hari jadi man saitun!

### **Aksi:**

1. Amin kita lenga Saitun menurut umur, kuga nge kita ngidah ras nggejapken perbahanen Dibata i bas geluhta?
2. Cakapken bas PA Moria, kerna aksi si banci ilakoken guna mere semangat man saitun. Banci ka pe ngundang Saitun guna ikut PA Moria, janah mere kesempatan guna nuri-nuri kerna kiniulin Dibata i bas geluhna.

*Pdt. Joice Rja br Sitepu, M.Th*



Inget ras ersikaplah. Minggu si reh si  
pepulang kolekte extra guna dana Peduli  
Kasih Moria



**SI MAN OGEN** : Matius 18:10; 3 Johanes 1:4  
**TEMA** : NGERGAKEN ANAK  
**TUJUN** : Gelah Moria:

- Nuriken palas ras ulih ngergaken anak-anak.
- Mpepulang perbahanen si ngergaken anak.

**METODE PA** : Sharing

### **Kata Penaruh.**

Anak e me sekalak dilaki entah diberu si lenga mbelin (dewasa) entah pe lenga ndalani pubertas. Adi Undang-undang Republik Indonesia No. 23 Tahun 2002 kerna Perlindungan Anak, ningetken maka anak e me sekalak si lenga umurna 18 tahun, termasuk si i bas bertin denga. Pendapat enda pe sue ras pandangan UNICEF si mereken batasen usia anak e me 0 seh 18 tahun. I bas Keputusan Presiden RI No. 36 tahun 1990 kerna hak anak, isingetken maka anak pe lit hak dasarna selaku manusia. Amin gia bage tetap denga perlu iperdiateken secara kusus sabap kebutuhen anak beda denga kal ras kalak dewasa.

Perlu si eteh maka anak pe situhuna pribadi istimewa si teptep bagin badanna ijadiken Dibata, si ibentuk Dibata i bas bertin nandena nari (bdk. Mas 139:13), e maka anak pe pribadi si unik ras meherga. Geluh manusia meherga iadepen Tuhan. Termasuk i je geluh kalak dewasa bage pe geluh anak-anak.

### **Mpebagesi Pengangkan Kerna Ogen.**

Matius 18:10, masuk ku bas perikop "Perumpaman kerna biri-biri si bene" (ay. 10-14) si ngerana kerna kiniulin Dibata guna maba perpulangan si bene gelah bengket mulihi ku Kinirajan Surga. Isi perumpaman e me kerna Kinirajan Surga. Lit penyesat si la banci bengket ku je janah lit si bene banci terdat guna bengket ku je. Lit penungkunen ajar-ajar Jesus i bas Matius 18:1, ise si mbelinna i bas Kinirajan Surga? I bas njabap penungkunen enda idilo Jesus sekalak danak-danak. IturikenNa maka adi ate bengket ku bas

Kinirajan Surga maka arus tuhu-tuhu robah dengen bali ras danak-danak (ay. 3); janah si mbelinna i bas Kinirajan Surga e me kalak si mpeteruk bana bali ras danak-danak (ay. 4); ise si ngaloken danak-danak i bas gelarKu, ialokenna kap Aku (ay. 5). Jesus ngangkatken kerna danak-danak erkiteken biak danak-danak si polos, sederhana janah tulus.

I bas ayat 10, ngerana kerna danak-danak si menukah denga kal ngajarisa. Banci iajari ku si jahat bage pe iajari ku si bujur. Adi danak-danak iajari ku si jahat tentu enggo lit i je kesengajan (irencanakan). Janah kalak si bage me si ikataken Jesus gelah iukum alu ngiket kerahungna jenari igedapken ku bas lawit (ay. 6). Bage me beratna ukumen man kalak si atena mabai danak-danak ku si jahat. Man Jesus danak-danak e me si man usihen i bas ketulusan ras bersih perukuren. Teridah arah kininggiten guna ngaloken kalak sideban alu la ersarat (suku, agama, kedudukan la penting man danak-danak, kerina banci jadi temanna main-main); pedas malem pusuhna (mengampuni ras ngelupaken salah kalak man bana); tek man perkatan kalak mbelin, la arus ibuktiken (bdk. Heb 11:1) janah biak si bagenda me perlu iergai dengen ihamati bage pe ilindungi. Danak-danak me warga kerajaan.

Surat 3 Johanes 1:4, encidahken kerna kegeluhen erkiniteken kalak Kristen si arus tergejap man si enterem. Salah sada sosok si bage e me Gayus (ay. 1,3). Keriahen ukur orang tua adi anak-anak nggeluh i bas kebenaran ertina lit kiniteken si aktif labo terjeng teori kerna aturen ras larangen tapi payo kin ilakoken/idalanken. Lit tantangan i bas ndalanken si ngena ate Dibata amin gia bage tetaplah dalanken kebenaran ras kebujuren. Penggejapen orang tua si enggo ngajarken anak-anakna i bas kebenaran Kata Dibata lit kebanggan ras keriahen ukur sabap anakna jadi pribadi si ngelakoken Kata Dibata. Enda me keriahen dengen kesangapen si tuhu-tuhu. Anak gambaren orangtua, anak si nggeluh i bas kebenaran. Kebujuren e me mbelin ipengaruhi ku bas pengajaran orangtua. Enda me ulih ngergaken anak. Si jadi keriahen labo terjeng ulih siidatkenna i bas doni tapi pe i bas ngasup ndalanken Kata Dibata.

## **Pengkenaina.**

Anak e me kertas si enggo lit tulisen ras warnana. I bas orang tua ngajarken Kata Dibata, iarapken anak reh ngasupna nandai dirina, selaku pemere Dibata. I bas ia lit kengasupen erbahan si mehuli. Jadi tuduhkanlah perbahanen ras sikapta si mehuli man bana. Perbahanenta man anak jadi

gambaran perbahanenta man Dibata. Orang tua me si perlebena ngergaken anak i bas jabu alu mereken kesempatan ras tanggungjabap gelah anak banci muat bagin mpekena-kena jabu. Arah si e pe ia banci erlajar kerna tanggungjabap misalna iendesken bana dahin sederhana guna ilakoken alu rutin. Pengergan nandangi anak banci pe ilakoken alu megiken rananna. Iikutken ia i bas runggu keluarga bage pe isungkun ia kerna sura-surana, la banci orangtua mutuskenca si sada. Arus ibuka percakapen ras anak. La lit anak si motu/bodoh/gutul/jahat tapi si lit anak si kurang ndatken bimbingan, pengajaren ras pengergan. I bas HUT KAKR si pe-134-ken, iarapken Moria ngergaken anak i bas kecibalna si perlu dukungan arah kalak dewasa i sekelewetna. Moria (Nande) me jadi support system si positif i bas 'tumbuh kembang anak-anak KAKR'.

### **Sharing:**

Ibahan kelompok kitik (3-5 kalak) entah pe kelompok mbelin (6-15 kalak). I bas kelompok ibere kesempatan man Moria guna mere pendapat kerna penungkunen:

- a. Turiken pengalamenndu selaku anak: pengajaren orangtua si tetap iingetndu asa genduari si sitik buena lit ngaruhna ku bas geluhndu selaku kalak si enggo dewasa gundari.
- b. Kai atendu siniajarkenndu man anak i tengah jabu gundari?
- c. Uga sura-surandu nandangi anak i bas jabundu (pendidikenna, pendahinna, teman geluhna) enggo nge sue ras sura-sura anak.
- d. Kai si enggo ibahanndu guna njadikan anak i bas jabu nandai diri alu payo. (Adi banci ibahan jadi aksi bersama nandangi KAKR Runggunta/ sektorta).

*Pdt. Erlikasna Purba*



Minggu enda si pepulung kolekte extra guna dana Peduli Kasih  
Moria.....!!!!



**SI MAN OGEN** : Masmur 78:1-8

**T E M A** : NURSURKEN PENGAJAREN SI  
MEHULI

**T U J U N** : Gelah Moria:

- Nuriken pengajaren si mehuli i tengah-tengah Bangsa Israel.
- Ndalanken pengajaren si enggo iturikenna.

**METODE PA** : Studi Kasus

(Cara ngoge Masmur 78:1-8 alu responsorial antara Moria metua 41 tahun *ky* datas, Moria si nguda 40 tahun *ky* terufi).

### **Kata Penaruh.**

Pengalaman nggeluh jadi pelajaran i bas kegeluhenta. Subuk si bagi ukurta bage pe pengalaman si la bagi ukurta. Pengalaman e banci ituriken jadi pelajaran ka ku sapih-sapih Moria bage pe kesusurenta (anak-anak ras kempu). Nuriken pengalaman si meriah entah la meriah labo mela. Sabap kerina e meherga i bas waktu-waktu kegeluhenta. Jadi pengalaman si meherga termasuk i bas kiniteken, sabap kerina pengalaman e mereken ulih ntah pe pengajaren si meherga. E maka perlu kal ituriken. Janah adi Moria si metua lanai lit si nuriken pengalamenna maka Moria si nguda pe la banci erlajar arah Moria situan asangkan dirina.

### **Mpebagesi Pengangkan Kerna Ogen.**

Ogenta enda nuriken kebiaren penulis (Asap) kerna Bangsa Israel si ngelupaken kai si enggo ibahan Dibata man tinepaNa i doni enda. Lit kebiaren Asap maka manusia enggo meriah akapna ndalani kegeluhenna, dengen lanai ersaksi man ise pe kerna pengalaman kegeluhenna ras Dibata. Erpengarapen Asap gelah pengalaman-pengalaman kegeluhen enda ituriken min nandangi kesusuren-kesusuren si arah pudi (estafet pengajaren). Situasi Bangsa Israel i bas konteksna enda lit i bas kiniseran bekas kinilasetianna, pemberontakenna ndube (rusia jaman si nuria), e maka arapen Asap gelah bangsa e tetap ngidah kesetian Dibata i bas kiniseranna. Ngingetken mulihi uga Dibata mulahi ia i bas kiniseran Mesir, ngarak-ngaraksa i padang gurun seh i Kanaan.

Asap/Asaf (Bin Berekhya Bin Simea) sekalak ahli musik kesusuren Suku Lewi i bas Bani Gerson nari nggeluh i bas jaman Daud. Lit 12 Masmur si isuratkena. Ia ras Heman, kempu Samuel bage pe Etan jadi si rende bage pe si ernubuat i Rumah Pertoton (1 Kronika 25: 1-31; 2 Kronika 5: 12)

**Ayat 1-4:** Begikenlah ajarku nina, ia ngerana selaku kalak si enggo metua, enggo lalan pengalamenna asangkan kalak si megi-megi pengajarena. Lit kemegahen i bas ia nuriken pengalamen kegeluhen Bangsa Israel. Lit pigapiga cara si ilakoken i bas nuri-nurin e me arah Kuan-kuanen, perumpaman jaman si nuria ras nuriken perkara-perkara si enggo jadi. Asap make erbage metode nuri-nuri segelah teraloken kalak simegisa. Isina Dibata tetap ngarak-ngarak bangsaNa i bas kerina dampar kegeluhen enda, subuk i bas meriah bage pe kiniseran kegeluhen. Nina Asap la ateta sibuniken man anak-anakta, sabap adi lanai lit sinurikenca maka generasi si nguda e lanai meteh kai si jadi nandangi nini-ninina, kai dage si banci ipelajarina? E maka perlu kal ituriken pengalamen-pengalamen si nai. Arah e ibereken pesan man si megi-megi kerna uga Dibata tetap ngarak-ngarak bangsaNa seh maka jore bangsa e i bas taneh si enggo isikapken Tuhan man bana.

**Ayat 5-7:** Pedah ras perentah ibereken Tuhan gelah iikutken. Ituriken Asap uga bangsa e arus patuh dengen ngikutken pedah guna kiniulin kegeluhenna. Labo terjeng patuh i bas ngikutkenca, tapi patuh pe guna meritakenca man kalak singudan asangkan ia. I je me teridah gegehna tradisi lisan e. Ibahan kalak si tuan e waktuna guna mereken pedah ras pengajaren man kalak singudan asa ia. Alu cara petala-tala, ercakup-cakap alu mehuli. Sabap kalak singudan e lit nge sura-surana tole meteh dengen erlajar bas kegeluhen enda. Arah si e la bene pengajaren ras pengalamen er-Dibata. Seh ku kesusuren si ersundut-sundut.

**Ayat 8:** "Gelah ola seri...." enda nuratken litna pengalamen pagit entah pe si la bagi ukur. Pengalamen pagit orangtua iturikenna man anak-anakna, jadi persinget gelah ola inanami anakna si pagit bagi si inanami orangtuana. Enda me tujuan bas nuri-nuri pengalamen si nuria jadi kata persinget, penjemba dengen ingan erlajar segelah wari si reh enda reh ulina sentudu ras sura-sura Dibata.

## **Pengkenaina.**

Selaku Moria si enggo tuan asangkan Moria sidebanna, la banci sinik dengen la nggit ngajarken. Adi ia la ermedite nandangi Moria singudan asangkan ia, bali ras la idalankenna tugas tanggungjawabna bagi Kata Dibata enda. Ula

min lit bas ukurna kata-kata "turiken pe man kai? Labo kari begikenna.... me enggo tehndu uga Moria si nguda genduari e? Turiken pe kari lawanna ka kita" i je me terbeluh cara komunikasi si mehuli. Sabap Moria si enggo metua e enggo ngenanami mbue pengalamen nggeluh. Dirina pe pernah nge iajari Moria si tuan asangkan ia ndube. E maka perlu nginget pengalamen-pengalamen nggeluh si man turinken rikut carana si payo pe gelah teraloken senina Moria si nguda. Ola kari kata si ni belasken e erbanca kitik ukur Moria si nguda, daramilah cara si tepat guna mpesehsa. Turikenlah penggejapen ras Dibata, seh maka si man turinken e kerna Kuasa Dibata si Mbelin, subuk nampati, ngajari, mpersingeti, ngkawali, nemani ras sidebanna. Man Moria si nguda denga berekenlah cuping ras pusuh guna megjiken ras ngantusi kai situriken Moria si metua.

### **Studi Kasus:**

Nd. Sarangeo umurna 35 tahun, ia Moria si mejingkat, semangat, pengurus Moria ka ia. I bas kinijingkatenna e rusur teridah kurang ermediate nandangi kebaktin-kebaktin si enggo iaturken. I bas jabu pe kurang ermediate man perbulangen ras anak-anak. Kesenangenna saja nge ipebelinna. Adi paksana mejile perukureнна reh ia ku PA Moria, ku sermon PA Moria, bage pe ku Gereja. Tapi adi la bage atena, labo ia idah pe. Beluh ia erbahan 1001 alasan. Erkiteken si e, nterem Moria-Moria e kurang senang man bana. Lit pengakap maka labo atena tutus ndahiken dahin Moria e, dengen la jadi usihen man Pengurus Moria si debanna bage pe saphi Moria. Nd. Germet termasuk Moria si metua, umurna enggo seh 52 tahun. Sekalak si mejingkat dengen tutus i bas kepulungen-kepulungen Moria. Ia pe rusur iperdiatekenna situasi bas Moria e. Teptep pengalamen meherga dengen lit makna ibassa. Erbuena erlajar reh pentarna kap.

### **Diskusi:**

1. Kai nge situhuna arapen Moria si enterem e nandangi Nd. Sarangeo?
2. Kai nge si perlu ilakoken i tengah-tengah Pengurus Moria bage pe antara Moria si metua ras Moria si nguda erpalasken situasi i datas enda ndai?
3. Bicara kam i bas posisi Nd. Germet coba turiken kai si ilakokenndu!

*Pdt. Kristiani F. Br. Tarigan, M.Th*



**SI MAN OGEN** : Roma 16:3-4

**TEMA** : ERBERITA JADI ORAT NGGELUH

**TUJUN** : Gelah Moria:

- Erlajar arah Persila ras Akuila si mere dirina guna er-Berita Si Meriah dengen njagai pengajaren.
- Mpertahanken kiniteken arah kesaksin ras perbahanenna.

**METODE PA** : Story telling (nuri-nuri)

### **Kata Penaruh.**

Sada kalimat si labo asing si begi e me "*Long life education*" ertina erlajar segedang geluh. Konsep erlajar segedang geluh enda icetusken sekalak filsuf Amerika John Dewey, ikatakenna maka segedang geluh manusia melala ndatken pengajaren ras pengalamen si labo ngenca arah pendidiken formal tapi pe arah kerina dampar kegeluhen manusia teptep wari. Konsep enda mabai manusia guna erlajar mpesikap geluhna gelah reh ulina. Janah salah sada inganta erlajar e me arah Gereja tupung kita ngikuti kebaktin minggu, PA, PJJ ras sidebanna. Ngajar ras erlajar e me sada proses si tetap idalanken i bas perjumpa-perjumpa ndai sabap enda me si ipedahken Tuhan Yesus, "Enggo ibereken Dibata man bangKu kerina kuasa i Surga ras i doni. Laweslah ku kerina bangsa manusia bahanlah ia jadi ajar-ajarKu; peridiken ia i bas gelar Bapa, gelar Anak ras gelar Kesah Si Badia, janah ajari ia ngikutken kerina si enggo Ku pedahken man bandu. Janah ingetlah! "Aku tetap kap ras kam seh ku kedungen jaman." E maka Gereja e me ingan "*Pemuridan*" ertina sada proses erlajar si mabai kita reh dewasana secara kiniteken, i je lit perjumpa ras Dibata bage pe ras teman manusia jenari proses enda terus menerus seh maka kita pe banci ka ncidahken usihen si mehuli nandangi sekelewetta.

### **Mpebagesi Pengangkan kerna Ogen.**

Perjumpaan Paulus ras Akuila bage pe ndeharana Persila sekitar tahun 49 M erkiteken situasi politik bas paksa e erbahansa reh belangna Berita Si Meriah. Kalak enda radu erdahin erbahan kemah e maka Paulus kesilang i rumah Akuila ras Persila sada setengah tahun dekahna. Kalak enda ras-ras i bas meritaken Berita Si Meriah janah ibaba Paulus pe Persila ras Akuila ku Epesus. Tupung Paulus nerusken perdalamenna, Persila ras Akuila tading i Epesus. Paksa e lit sekalak Jahudi si tergelar Apolos ngerana kerna Pustaka Si Badia, iajarkenna kerna Jesus alu payo tapi peridin Johannes ngenca ietehna. Meteh kerna si enda, Akuila ras Persila maba Apolos ku rumahna jenari iturikenna man Apolos kerna dalam kegeluhen si ituduhkan Dibata (Perbahanen Rasul 18:24-26). Ulihna Apolos lawes ngepar ku Propinsi Akaya jenari erberita ia i je. Persila ras Akuila jadi orangtua rohani (mentor) man Apolos.

Ikataken Paulus pe maka Persila ras Akuila e me temanna sada dahin i bas Kristus Jesus, janah ia ras keluarga Akuila bagi kalak si erkandu-kandu. Isaksiken Paulus jine uga kalak enda mereken diri guna nampati pelayanan Paulus ras la biar-biaren ngasamken kesahna. Kesah e kegeluhen. Kalak si nggit ngasamken kesahna guna sada dahin, ertina dahin e meherga kal man bana. Dahin erberita, dahin si arus ilakoken aminna uga gia kecibal geluh. Situasi politik paksa e sangana la aman janah pernah pe Paulus ibaba ngadap Gubernur guna iadili (Perbahanen Rasul 18:12-16). Tapi la e jadi alasen kalak enda surut bas erberita. Tupung kalak enda mulihken ku Roma, rumahna pe ipake guna ingan pulung, e maka enterem kalak si labo Jahudi make rumahna guna ingan kebaktin. Paksa si e rumah jadi ingan kebaktin banci ngerehken resiko ras ancamen si mberat. Kekristenen musuh negara. Kalak si mereken rumahna jadi ingan pulung, ia siap imusuhi negara. Jadi mereken rumah jadi sada pemere si meherga kal bas paksa si e. Erkiteken si e me maka Paulus ngataken bujur man kalak enda, ietehna perbahanenna e sada perjuangan si mberat. Kinipangen kalak enda mereken rumahna erkiteken ketetapan ukur bas erkiniteken man Tuhan Jesus.

Persila ras Akuila tetap mpertahanken kinitekenna ras ipakena tiap kesempatan guna erberita. Gia situasi kegeluhen erbahansa kalak enda arus lawes bas sada ingan ku ingan sideban, la turah kebiarenna guna naksiken kinitekenna man Tuhan Jesus. Enggo jadi orat geluhna (*gaya hidup*) erberita, e maka i bas tantangan geluh tetap paguh kinitekenna.

## **Pengkenaina.**

Bas ndalani wari-wari kita pe ngalaken erbage situasi si la bagi ukurta. Kita arus ndarat i bas *zona nyamanta* nari si erbahansa maun ndele kal ateta. Tapi kiniteken si paguh man Tuhan Jesus jadi ulu gegeh guna tetap nehken si ngena ateNa. Ngasup ngidah peluang i bas tantanganen si mbelin, sabap kita enggo erlajar jadi pribadi si setia ras megenggeng gia melala persoalen reh ngupuh kita. Moria e me murid sejati si tetap mereken diri ngelai ras erberita aminna erbage-bage rungga jadi i bas geluhna.

### **Story Telling: Kisah Inspiratif Perempuan Kristen**

Gelarna Merry Riana, itandai selaku sekalak motivator diberu si cukup terkenal, penulis buku ras melala jadi pembicara bas erbage ingan. Ndube ersura-sura nerusken pendidiken i Universitas Trisakti tapi erkiteken kerusuhan '98 la seh sura-surana, emaka berkat ia ku Singapura i Universitas Nanyang guna kuliah. I je me melala peristiwa *jatuh bangun* idalanina. Situasi ekonomi keluarga la bias e maka ia arus ndarami usaha guna nerusken perkuliahenna. Sempat piga-piga kali gagal ras minjam dana beasiswa ku pemerintah Singapura si arus igalari adi enggo lulus kuliah janah erdahin. Kecibal si bage erbahansa tambah megenggengna i bas ndalanken kerina usaha ras dahinna. Sada paksa, kenca enggo melala usaha ras dahin si idalanina lit ulihna, banci igalarina utang man pemerintah Singapura ras ngembangken usahana sideban. Kerna si e ia rusur ngerana uga campur tan Tuhan i bas kerina si idalankenna. Arah perdalanan geluhna megati ia naksiken maka labo bekas gegeh ras beluhna tapi perbahan keleng ate Tuhan saja si erbahan ia ngasup ndatken sura-surana. Pengakun Merry enda, ku tuduhkan keleng ateku man Tuhan alu makeken kerina talenta si ibereken Tuhan guna kiniulin man kalak si deban, ku endesken tole nari diringku ipake Tuhan ndalanken sura-suraNa.

*Story telling Moria:*

*Moria nuri-nuri kerna perdalanan geluh ras keleng ate Tuhan si enggo inanamina.*

*Pdt. Enda Uli br Tarigan*



**SI MAN OGEN** : Filipi 2:4-11

**TEMA** : NGUMBAN PERUKUREN KRISTUS

**TUJUN** : Gelah Moria:

- Nggargari perukuren Kristus.
- Ncidahkan perukuren Kristus i bas geluh tep-tep wari.

**METODE PA** : Meditasi

### **Kata Penaruh.**

Persikapen:

1. Pengurus Moria nikapken lilin, pemusik, song leader ras sekalak pemipin (P) ibadah (niarapken pendeta, vicaris, detaser entah pertua/diaken). Kebaktin enda ilakoken alu mengalir.
2. Kerina Moria nikapken Pustaka Si Badia, KEE ras pulpen, kertas. Kundul alu posisi tegak (la tertande) dengen asa bancina atur jarak ula si degesen sada ras sidebanna.

3. Lagu-lagu bas PA enda enggo ipelajari sope denga ilakoken meditasi.

P : Senina Moria, si bengketi me kebaktin meditasita, si peteneng dirinta, tarik napas alu manjar-anjar, janah buang. Silakoken si e telu kali. Alu dem ketenenggen muliakenlah Tuhan, kataken bujur i bas kerina si enggo ilakokenNa i bas geluhta, mari si tamaken tanta si kemuhen ku tententa janah kataken man tendinta muliahkenlah Tuhan o tendingku (*bereken waktu teneng kentisik janah musik mengalun.*) Bas pusuh si mbagesna nari si penangkih dage enden-nden pujinta "Muliakenlah O Tendingku" (*iendeken 3 kali.*)

*Muliakenlah o tendingku, muliaken Tuhan Dibata o tendingku*

*Muliakenlah, muliakenlah, muliaken Tuhan o tendingku*

P : Senina Moria, Dibata e mulia dengen erkuasa kap. ItandaiNa alu mbages ise kam ras aku. La lit sada pe terligen sada pe lang; seh ku bas perukurenta ietehNa kap. IA me Dibata si Badia, e maka kalak si

nembah man baNa pe arus kap badia. Nulih kita ku bas kecibal geluhta, i bas perbahanen, pengerana ras perukuren si lit, enggo nge ndia badia. Perbahenen si uga nge silakoken sedekah enda? Enggo nge lit kiniersadanta alu mereken dirinta guna kiniulin enterem jelma? Entah keegoisen, la nggit talu, menang sendiri, tole perbahanen-perbahanenta guna kepeutingenta saja ngenca lalap silakoken. Curmini dage perbahanenta sedekah enda, pantas nge ndia kita ikataken anak-anak Dibata?

*Paksa teneng*

*(Song Leader ngendekèn KEE 207:5 alu manjar-anjar)*

*Salahku ku gejak, bas kegeluhenku, penalemenku e tetap perkuah atendu*

*Ref.: Reh aku Tuhan ngadap man bandu, Jesus dudurken taNdu alokenlah aku*

P : Ranan si uga nge rusur ibegi Dibata bas babahta nari. Enggo nge rananta e maba pasu-pasu entah palu-palu, nambahi semangat entah nguraki semangat geluh kalak sideban, mereken dalam puluh entah nambahin baban geluh?

*Paksa teneng*

*(Song Leader ngendekèn KEE 207:5 alu manjar-anjar)*

P : Perukuren si uga nge si idapeti Dibata i bas kita? Uga nge ndia bagesna perukuren Kristus e si umban bas caranta rukur? Rusur sikataken buah perukuren e me perbahanen ras pengerana. Kiniganjangen rukur, rikut ras ngukurken keperluan dinging perbeben geluhta (dirinta saja) mahan bana erbahanca lupa kita rukur kerna kalak sideban. Rukur kerna kiniulin dinging kemulian Dibata pe. Dahilah Dibata, tadingkenlah kerina cara rukur si la payo. Enda aku Tuhan ajari dinging pekena-kenalaha cara rukurku bagi perukurenNdu.....

Siakuken salah Lepakta arah nden-ndeta "Salah ku gejak"

(KEE 207:5, iendeken 2x, Khusus Ref iendeken 4x)

*Salahku ku gejak, bas kegeluhenku, Penalemenku e tetap, perkuah ateNdu*

*Ref.: Reh aku Tuhan ngadap man baNdu, Yesus dudurken taNdu alokenlah aku*

P : Kalak si reh alu pusuh si getem erkiteken salah dosana ialo-alo Tuhan kap. Enggo icidahkenNa si man usihen man banta, iberekenNa geluhNa ras darehNa i Golgolta guna kiniulin, keselamatanen manusia. Jesus kap Sumbul si erbahanca kegeluhenta badia, e maka katakenlah bujur man Bapa si erbahanca melikas kerina dosa si ndube segelah si aloken kesenangan e sabap lit kap sada sumbul e, e me Jesus.

*Rende : "Lit Me Kap Sada Sumbul E" (Kee 83:1,2,4)*

*1) Lit me kap sada sumbul e guna perdosa e, mehuli kal me sumbul e, pesenang ukur e*

2) *Lau sumbul si badia e, e ibas Yesus nge, IalemiNa dosanta, ras keberatenta*  
4) *B're min o Tuhan aku pe bersih ibahan Ka, kelengi tendingku min, maka terkelin kin*

P : Ngumban ertina ngusih biak entah menam seri ras kalak sideban. Ngumban perukuren Kristus e bali ras ngusih perukuren Kristus, seh dungna perukurenta enggo bali ras perukuren Kristus. Uga kin perukuren Kristus?

*Paksa teneng*

Nggit nadingken si nasa lit guna manusia. Jesus e Dibata, IA me anak Dibata si Tonggal, rupa Dibata si teridah, IA me sinalsal terang kemulian Dibata, IA sada ras Bapa. Status si enda kerina la ipertahankenNa tapi ilepaskanNa. Arah ukurNa jine itadingkenNa jadi seri ras manusia. I pilihNa nggeluh bagi manusia. Kemulian, kedudukan, kinibayaken, kerina hak Surga. Nggit IA erkorban ngaloken kiniseran, perbahanen si jahat, ipalitkan si jahat ras kematen si la semal (ianggap jadi kutuken) e me i kayu persilang. ItadingkenNa kerina hak istimewa ras kemulianna i Surga guna nelamatkan manusia.

*Paksa teneng*

Nggit nggeluh bagi sekalak juak-juak, nggeluh ikuasai tuanna, labo pegawai si ndatken upah. Patuh nandangi tuanna, ras ngelakoken kai pe guna pesenangken tuanna. Bagi si eteh maka jadi juak-juak e me sada dahin si mesera kal ngalokenca, tapi e ilakokenNa; ngelai dengen nggit erkorban nandangi enterem jelma. Si e kerina ncidahken kiniteruken ukurNa.

*Paksa teneng*

*Rende: KEE 83:3*

*Dareh Tuhanta Jesus e, sumbul si benar nge, mambur i kayu silang e, lah ngepkep kita nge*

P : Jesus ipehaga Dibatanta alu mereken kerina kuasa si lit i Surga ras i doni. Manusia ras doni enda ngakuken maka Kristus tuhu-tuhu Tuhan.

*Paksa teneng*

P : Moria si ikelengi Tuhan, kiniteruken ukur e mahan bana ngasup kita mereken si mehulina guna pehuliken. Nggeluh bas kiniersadan, ngukurken kiniulin si nterem ras dem bas kekelengen. Erkorban guna kiniulin kalak sideban e me bagin biak si man umbanen. Bas si enda biak ke-aku-an-ta arus sitadingken. Ke-aku-an e maba keegoisen, terjeng ngukurken kepentingan ras dirina saja ngenca. Kalak si bagenda rugi kal akapna erkorban, sabap bas perukurenta uga segelah ngerehken untung man dirina. Sirangilah perukuren si bagenda, inget! Kita kap anak-anak Dibata.

Rende: KEE 200:2)2x

*O Tuhan sampatlah geluhku gundari, ola Kam erleka ras aku  
Kawali geluhku suari ras berngi, lalap Kam me ku ban temanku*

P : Kalak si meteruk ukur ipehaga Tuhan kap, tuah jadi sekerajangenNa sabap isehken Dibata padanNa man bana. Alu kata sideban labo lit rugina ngelakoken kai silakoken Kristus e bas pelayanen. Nggeluhlah i bas kiniteruken ukur sabap kam kap anak-anak Dibata.

Rende: KEE 200:3

*O Tuhan bengketi pusuhku min gelah, maka ku aloken kataNdu  
Pedahindu lalap min ku gelem la pulah, lalap kam me ku ban temanku*

P : I bas paksa enda ibereken kesempatan nehken dinging pengarapen man Dibata segelah ipengasupNa kita guna ngumban biak meteruk ukur subuk bas jabu, perpulungen, gereja ras masyarakat.

*(Ibereken waktu man perpulungen guna ertoto nehken pingko-pingko dinging pengarapen man Dibata)*

Kenca situngtungken pengarapenta man Dibata, mari dage tuliskan kai si jadi padanta (nulisken komitmen 3-4 kata ). Tedislah gelemah padan e, pindo gegeh man Dibata guna ndalankenca.

Gundari tatap temanndu e, kataken "Tuhan mpegegehi kam teman, dalankenlah padanndu e"

Mari radu ras kita rende KEE 183:3 (endeken 3x)

*Kekeken ngikut Jesus, mbelin kuasaNa  
Bas kurang kal gegehta, je isampatiNa  
Ola penalem saja, gegehta la serta  
Ertotolah man baNa, pindo penampatna*

P : Kenca si aloken Kata Dibata, si endesken dage geluhta guna ipake Tuhan. Sigejapkenlah maka kerina si lit enda guna kemulian Tuhan, sidadahken keriahen ukurta alu maba persembahen si merimna man baNa.

Si puji Tuhan bas kita nehken persembahen alu rende arah KEE 420

*Asa gegeh ras kengasupen, kami nehken persembahen*

*Endesken kami baNdu Tuhan, alu dem keriahen*

*Reff Ajari kami ngergaken, talenta ras kiniliten*

*Arah ukur ras perbahanen, Tuhan ipermuliaken*

*Mbue tuhu kami aloken, pasu-pasuNdu o Tuhan*

*KelengNdu i gejakken kami, Kam kap sinegu kami Reff....*

P : Mari ras ertoto kerna persembahen (kenca si e itutup alu pertoton Tuhan.)

Mari radu ras ertoto bagi siniajarken Jesus man ajar-ajarNa ninta dage ras-ras...

*Pdt. Rosani Sembiring, STh.*



**SI MAN OGEN** : Lukas 8:1-3

**TEMA** : NAMPATI ALU KINILITEN

**TUJUN** : Gelah Moria:

- Nuriken penampat diberu-diberu i bas pelayanan Jesus.
- Mpepulung perbahanen si banci jadi penampat man sekelewetna.

**METODE PA** : Sharing ras Aksi

### **Kata Penaruh.**

Nampati, e me sada perbahanen si mulia. Adi kataken nampati, la lit i je perkiran untung ntah rugi. Lit penggejapen meriah adi lit kesempatan guna nampati. Jesus jine pe mereken diri ras waktuNa guna nampati sekelewetNa. Si ibahan Jesus e me jadi usihen man banta i bas nampati. Palas kita nampati e me keleng ate. Rikutken kecibalta si genduari, tuhu nge meriah ukurta i bas nampati sekelewetta? Tuhu nge adi nampati lanai si nen untung rugi? Alu kai saja kin kita banci nampati? Mari siperdiateken diberu-diberu si nampati Jesus alu kai si lit i bas ia.

### **Mpebagesi Pengankan kerna Ogen.**

Lukas nuriken ingan tading Jesus e me i kuta Kapernaum. I je nari isiariNa kuta-kuta ras kota daerah Galilea. Tupung Jesus erdalan niari kota ras kuta-kuta, iberitakenNa kerna kinirajan Dibata. Tuhu mesera akap kalak ngantusisa berita e perbahan kinirajan Dibata e terbuni denga. Lit pagi paksana kinirajan Dibata e ipetangkas Jesus i bas diriNa i kayu persilang. Tambah si e Jesus pe ermomo maka ise si tek man baNa ndatken keselamatanen si rasa lalap. Sepuluh dua ajar-ajar Jesus ikut ras IA i bas nehken Berita Si Meriah e. Atan pe diberu-diberu si ersura-sura nehken pengatakan bujur erkiteken penampat si enggo leben ialokenna i bas Tuhan Jesus nari. Diberu-diberu e arih-araih kai si arus ibahanna lako ncukupi

keperlun Yesus ras ajar-ajarNa i bas IA nehken Berita Si Meriah. Dahin diberu i bas ngelitken keperlun si teptep wari e bali ergana ras nehken Berita Si Meriah. Si enda ibahan Lukas lako ngelawan tradisi Jahudi si ncibalken diberu e teruken asangkan dilaki. Dahin diberu terjeng i rumah ngelai perbulangenna. Lukas ngajari perpulungen Kristen lako ngergaken diberu ras pendahinna. Sengaja iangkatken Lukas maka diberu-diberu e me pagin jadi saksi kematen ras kekeken Tuhan Yesus.

Igelari Lukas diberu enda sada-persada e me:

1. Maria igelari pe Magdalena. Erkiteken kutana i Magdala nari, kelang-kelang Galilea ras Tiberias. Ia pernah sakit mekelek, iseluki pitu setan. Angka 7 e angka sempurna ertina mesangat kal pinakit ulih perbahanen setan - setan e. Maria Magdalena me si pernah isampati Yesus alu mpelawes setan-setan i bas kulana nari. Ituduhkan Maria kinitekenna ras kekelengenna man Yesus alu tetap setia ngikutken Yesus. Seh ku proses penyalipen pe tetap iarak-arakna Yesus. Tupung Yesus keke i bas si mate nari, man Maria me perlebe Yesus encidahken diriNa.
2. Johana ndehara Kusa, bendehara Herodes Antipas. Kusa me singaturken ras si jadi pengawas erta pribadi Herodes. I bas ia ngawasi erta benda Herodes, ibereken man bana gaji si sembaba ras pendahinna. Banci kataken Johana e diberu si bayak, tading i Tiberias, sada kuta ras Herodes. Gelar Johana pe isingetken radu ras Maria Magdalena tupung ia ndahi ajar-ajar nuriken kerna kekeken Yesus.
3. Susana, la melala ituriken kerna gelar e ras lanai pernah isingetken gelar Susana i bas Pustaka si Badia.

Teluna diberu enda la seri kecibal kegeluhenna tapi banci ersada arihna nampati Yesus ras ajar-ajarNa i bas nikapken keperlun pangan si teptep warina. Diberu-diberu e enggo leben nggejapken perbahanen Yesus nampati ia, puluh i bas sakit pinakit ras perbeben si mberat. Tandana diberu-diberu e enggo ngaloken penampat i bas Yesus nari, isehkenna pengataken bujurna alu muat bagin nampati pelayanan Yesus. Iberekenna waktu ras kiniliten si lit i bas ia, nikapken keperlun pangan Yesus ras ajar-ajarNa teptep wari. Perkuah ate Yesus nampati diberu-diberu e jadi usihen man diberu e lako nampati. Perbahanen diberu-diberu e jadi teladan man perpulungen.

## **Pengkenaina.**

Labo lit si ngasup ersemulih nandangi perbahanen Yesus guna nelamatkan kita. Tapi si tuhu-tuhu nggejapken geluhna enggo selamat, la ia biar-biaren

nehken pengataken bujur. Erbage dalanna kita ngataken bujur, subuk arah waktu, talenta, kiniliten ras dirinta guna ngelai Tuhan. Nampati teman si lit i bas kesusahen ras perbeben si mberat e pe sada pengataken bujur. Kita nampati labo erkiteken enggo lebih i bas kita, tapi erkiteken kita enggo leben isampati Tuhan. I bas nampati, ernanam min man kalak si deban. Nehken penampat arah talenta ras kiniliten, amin pe kitik banci erguna kal man si ngalokensa.

Moria GBKP ersura-sura ngelitken taman bermain lengkap ras Gedung ingan elajar, ruang penitipen ras ruang bermain anak, ruang guru ras ruang kepala sekolah, dapur ras kamar mandi man anak-anak PAUD Bintang Moria GBKP. Nuate Gedung enda i KWK ujung jalan Udara Berastagi. Lit pe taksasi biaya siniperlukan:

1. Pekerjaan Persiapan	Rp	10.993.507.00
2. Pekerjaan tanah, pondasi, sloof, kolom dan balok	Rp	178.877.821.05
3. Pekerjaan atap, lantai dan dinding	Rp	553.214.829.80
4. Pekerjaan pengecatan	Rp	42.364.730.40
5. Pekerjaan pintu dan jendela	Rp	85.400.000.00
6. Pekerjaan elektikal	Rp	6.755.000.00
7. <u>Pekerjaan Sanitairy</u>	Rp	<u>13.300.000.00</u>
<b>Total</b>	<b>Rp</b>	<b>890.905.888.25</b>

Guna ngelitken biaya e iarapken partisipasi kerina kategorial GBKP (Saitun, Mamre, Moria ras PERMATA) gelah mpepulung aksi 10.000/kalak teptep kategorial. Enda jadi aksi PA bersama bagi enggo si lakoken teptep tahunna. Enda encidahken kita sada keluarga i bas gereja Tuhan. Jadi sada keluarga, enggo oratna kita si sampat-sampaten. Sibuat baginta arah kinilitenta sekalak-sekalak. Penampat si ibereken kita e jadi pengataken bujurta man Tuhan si enggo nelamatken kita. Janah kerina jadi kemulian man Tuhan.

### ***Sharing ras Aksi:***

1. Tentuna kerina kita enggo pernah nampati subuk arah gegeh, waktu, talenta ras kinilitenta, man keluarga, teman ras perpulungen. Mari sibagiken pengalamenta man temanta, penggejapen si uga nge lit i bas pusuh kenca kita muat bagin i bas nampati e!
2. Aksi: si lakoken *gerakan 10.000/kalak teptep kategorial guna mbangun taman ras Gedung Paud Bintang Moria GBKP. Isehken ku Moria*

*Runggu, kenca e ku Moria Klasis maka ku Badan Pengurus Pusat (BPP Moria).*

*Pdt. Nurbety Ginting, M.Th*



**SI MAN OGEN** : Perbahanen Rasul 1:21-26

**T E M A** : NANDAI PILIHEN TUHAN

**T U J U N** : Gelah Moria:

- Nuriken sukut-sukat jadi serayan Tuhan.
- Erpersukuten man Dibata i bas milih Pt/Dk.

**METODE PA** : Aksi

### **Kata Penaruh.**

Salah sada dahin rutin gerejanta i bas waktu/periode 5 tahun e me pemilihan pertua diaken. I bas pemilihan e Dibata erdahin arah perpulungenNa guna milih pertua ras diaken. I je me Dibata ngulih milih "aron-Na." Maka dahin pemilihan pertua diaken e me paksa si tepat guna mengevaluasi dahin-dahin serayan si erdahin i bas gerejanta. Serayan si tutus ngelai perlu iterusken tapi ntah lit serayan si mekisas, la dahikenna dahinna, mehuli adi isambari. Alu mereken kesempatan man ngawan perpulungen sideban guna ndahiken dahin e. Bahan PA-nta sekalenda, mabai kita meteh serayan si tuhu ngena ate Dibata seh maka arapenta pelayanen gerejanta periode 2024-2029 banci reh ulina.

### **Mpebagesi Pengangkan Kerna Ogen.**

Erkiteken Judas nilah arah pendahin ras sura-sura Dibata ras ibunuhna bana, enggo urak beligan rasul-rasul. E maka rungu rasul-rasul e ndarami penggantina. Adi si nen penjelasan Petrus bas ayat 20, maka arus lit pergantin jabaten. Erkiteken si e ate ilakoken pemilihan rasul. Dahin rasul e me jadi saksi maka Tuhan Jesus nggo keke. Bagi si eteh kekeken Jesus jadi sada penungkunen man kalak si enterem paksa si e sabap la kin denga lit i bas paksa si e bage jadi. La pe pernah jadi tapi murid-murid kerina enggo jadi saksi maka si e kerina tuhu jadi. Maka nambahi rasul iertiken nambahi

kalak si pang naksiken kerna Jesus. Kalak si pang ersaksi e me kalak si enggo usur ngikutken Jesus asum IA erdalan-dalan ras murid-murid (ayat 21). Calon si nandang ipilih e enggo usur ras Jesus, idahna uga kegeluhen Jesus si teptep warina seh dungna tepat kesaksinna kerna Jesus. Enda nuriken maka labo ajar-ajar si sepuluh dua kalak ngenca si ngikutken Jesus paksa e.

Ayat 22, nuriken maka calon si man pilihan e enggo ikut ras Jesus mulaikin jaman Johanes Peridiken e me bena-benana Jesus ndahiken dahinNa i doni enda seh IA nangkih ku surga. Si enda nuduhken penandai kerna Jesus arus kuh, la sepenggel-sepenggel. Kerembakenna ras Jesus (spiritual) e mereken kesaksin si kuh nangdangi kalak si deban. Sapih-sapih rasul pe enggo min si tandan, gelah banci radu ras erdahin mpermakani perpulungen. Enda me jadi sarat si ituriken i bas pemilihan e. Kenca ibahan sarat pemilihan e, lit dua kalak siniakap pas jadi rasul pengganti Judas Iskariot, e me Barnabas ras Matias. Kenca lit dua calon kerina perpulungen ertoto. Pertoton perpulungen gelah terpilih si ipilih Dibata. Amin gia duana calon e mejile, labo erndobah tapi perlu iinget maka si milihsa e me Dibata.

Kenca ertoto maka ibahan me proses pemilihan alu cara tikam tanduk. Proses enda me ipilih rasul guna nentukan siapa kin pilihan Dibata. Tikam tanduk e me cara si semal ilakoken guna pepilihken i bas paksa si e, kenca ibahan tikam tanduk e, gelar Matias me si terpilih bengket ku rasul e.

## **Pengkenaina.**

Riktuken bahan PA-nta wari enda lit piga-piga si perlu jadi perenungenta:

***Si pemena***, proses pergantian serayan i Gereja kepeken nai nari enggo lit. Pemilihan e guna kemajun kiniulin pelayanan, gelah ula sempat terulang dahin Dibata jadi arus lit si ndahikenca.

***Si peduaken***, perlu lit sarat-sarat jadi serayaan Tuhan. Sarat si pemena itandaina kuh kerna Jesus e, si enda jadi arah litna hubungan spiritualitas si mehuli ras Jesus. I tengah-tengah Gereja pe arus tehna aturen gerejanta GBKP. E maka ituriken minimal 2 tahun jadi anggota ras sekurang-kurangna 1 tahun bas ingan e (kecuali si pindah e pertua-diaken sarat enda la berlaku). Perlu pe si oge pengelayasi si ibahan Moderamen kerna pemilihan pertua-diaken. Siakun nge kita labo lit manusia si sempurna, saja ula kal si pilih serayanta si nggo jelas la sue ras sarat si lit. Adi sipaksaken situhuna kita kang kari si maba beratna. Sabap dahin serayan e me minpin kinitekenta. Arah geluhna nge situhuna si mbuena kal kita erlajar. Adi

geluhna kin pe jadi antuken kai nge si banci sipelajari? 5 tahun ku lebe la lah erurakna si pulung adi si pilih kin si la tepat?

**Si peteluken** ertoto jadi kunci i bas proses pemilihan enda. Tek kita maka si terpilih e me pilihan Dibata. Si ngelakoken pemilihan enda pe Dibata. E maka dukungan Moria teridah adi mulai wari enda Moria GBKP ertoto alu teratur. Si man totonken e me proses pemilihan pertua ras diaken erdalan alu mehuli ula lit perjengilen. Ertoto terpilih si ngena ate Dibata. Bereken Dibatalah kepentaren man banta lako milih si ngena ateNa. Ise pe pagi si terpilih enda me si ngena ate Dibata, kerina pagi kita bas Runggunta numpak-numpaksa. Ertoto gelah kerina perpulungen nggit ipilih ras milih. Pengarapenta kerina si nggo lit hak sorana banci makeken waktuna guna ikut milih. Tek kita ulih totonta maka sekalenda pe pemilihenta erdalan alu mehuli. Selamat memilih ras ipilih.

### **Aksi:**

Erban jadwal notoken proses pemilihan pertua diaken.

- Ndigan mulai jadwal ertoto ilakoken
- Piga kali seminggu enda ilakoken
- Jam piga jadwal ertoto enda ilakoken

*Pdt. Jepri Alexander Keliat M.Fil*



Rudang i mbalmbal melala curakna  
La terpilihi perbahan jilena  
Seh me paksana milih serayan Dibatanta  
Pilihlah bagi si ngena ateNa  
Kabang perik i awang-awang

Cinep perik e i babo taneh  
mesawang  
Dahin pemilihén enda labo teralang  
Lakokenlah alu pusuh si salang



**SI MAN OGEN** : Pengerana 5:18-20

**T E M A** : NGERGAKEN DIRI

**T U J U N** : Gelah Moria:

- Nggargari ullih latih si ibereken Dibata.
- Mbandingkan kinata geluh tupung ngenanami ras la ngenanami ulih pendahin.

**METODE PA** : Nuliskan surat man diri sendiri.

### **Kata Penaruh.**

Moria/nande ndatken tanggungjawab si mbelin i tengah-tengah jabu. Nikapken pangan ras inemen, anak sekolah, kebersihan rumah, ngelayasi paken isi jabu, erdahin, nikapken keperlun jabu seh ku bas ndarami pinjaman (adi perlu) bage pe nggalarisa ras si debanna. Banci ikataken Moria ikut muat bagin i bas kerina urusen rumah tangga. Moria si lit asisten rumah tanggana pe la terlepas i bas tanggungjawab guna ngurusu rumah tangga. Gia latih erdahin, urusen rumah pe harus ka nge iperdiateken. Latih pe iakapna, ipaksana tetap erdahin; melihe pe ia ipelebena isi jabuna man, gulut pe iakapna ipala-palaina guna pesenangken isi jabu. Nginget kerina perjuangan nggeluh, Moria megati lanai ngasup ngenanami ulihna latih. Tempa-tempa rugi si akap guna pesenangken dirinta gelah isi jabunta banci sikap kerina keperlunna. I bas erjuang guna kerina tanggungjawab, perlu ka nge si perdiatken diri gelah teneng ras tambah gegeh guna ndahiken dahin. Istilahna e me "*me time*", si ertina mereken waktu ras mperdiatken diri, subuk kula bage pe tendi.

### **Mpebagesi Pengangkan Kerna Ogen.**

Kitab Pengerana ituliskan sekalak si pentar i bas ngertiken erti kegeluhen i doni enda. Pengerana 5 enda secara kusus nuriken maka kegeluhen manusia Dibata kap empuna. I bas paksana tadingken me kerina, sia-sia si nasa lit (ay.16), e maka la lit si terpentingen seakatan erkemalangen man

Tuhan (ay.7). Enterem jelma si ngayaki sura-surana, banci saja erta ntah pe kuasa. Tempa-tempa kempak si e me kerina palas keriahen ras kepuasan i bas doni enda. Seh maka lanai ieteh tumburen guna ngelitken si e kerina. Gulut ukur ngukurisa suari ras berngi. Nggo pe melala si terpepulang, kurang mbue denga. Apai ka adi kurang, latih ukur ertangkal, piahna perpan ras pertunduh pe lanai jore. Erbera-bera i bas pusuh, uga nge kari kedungenna. Nina Pengerana: sia-sia nge kerina, sitadingken nge pagi kerina, e maka ermeriah ukurlah.

*Ayat 18*, nina Pengrana, sekerajangen manusia i bas doni enda terjeng minem, manken ulih pendahin ras ngenanami ulih latih. E me si mehulina. Emaka nanamilah kai si lit, riahken uga litna sabap gendek-gendek nge umur manusia, tapi icukupi Dibata kerina keperluan sedekah ia nggeluh i doni enda. E nuduhkan maka Dibata nge si mpekena-kena kegeluhen manusia, la lit si man kebiaren.

*Ayat 19*, nuriken maka kiniliten enda Dibata kap empuna dengen IA si merekenca. Kalak si nggejapken pemere Dibata e dengen ngasup ngenanamisa, sangap kap ia. La terjeng kebayaken e ngenca si jadi kesangapen, tapi kengasupen guna ngenanamisa pe kesangapen kap e. Kepeken la kerina manusia ngasup nggejapken kebayakenna. Megati kalak bayak i bas erta tapi musil iakapna bana sabap kurang dengan iakapna rusur, mankenca pe ia mbiar. Kalak si bage la banci ermeriah ukur i bas geluhna. Dibata mereken kesempatan guna ngenanami kinibayaken i bas si e oratna ngasup ngatakan bujur sabap kesempatan pemere e Dibata kap.

*Ayat 20*, nuriken kerna idemi Dibata pusuhna alu keriahen, e me keriahen si rasa lalap. Ertina, keriahen e la erkiteken situasi kegeluhen tapi erpalasken penggejapen Dibata kap si empuna kegeluhen, la lit si man kebiarenken. Kalak si bage tentu dame pusuhna katawari paksa pe. Erkemalangen man Dibata mabai pengangkan maka Dibata kap si empuna geluh, e maka lanai aru ate kerna kai pe.

## **Pengkenaina.**

Laura Day (2006) i bas bukuna "*Practic Intuition*" ngatakan maka diberu lebih *peka* ibandingken dilaki. Diberu mesukah iakapna ngenen situasi, janah meter muat tindakan. E maka diberu ngasup meteh katawari anakna muas, melihe, mbiar, mbergeh, merawa ras sidebanna. Kengasupen enda pe banci mabai diberu ku bas kearun ate. Kearun ate kerna duit, waktu, kesehatan ras si debanna. Si e banci mabai Diberu ngelupakan keperluan dirina. Sia-sia

akapna, madin guna belanja dapur, nukur susu anak, bage pe nukur keperluan perbulangen gelah ula tulpak. Dungna cenderung "stress", bosan, lelah, kurang akapna iperdiateken.

Bahan PA Morianta Minggu enda ngatakenca maka Dibata kap si empuna geluhta, ula aru ate. Nikmati geluhta, perdiatoken dirinta, gelah sigejapken kemalemen ate i bas umur geluh si gendek enda. Mereken waktu guna dirinta jine ("*me time*") situhuna labo rugi, tapi untung. Sabap adi nggo si pesenangken dirinta tentu meriah ukurta, teneng kula tendinta, tambah gegehta ndahiken dahinta selaku nande. Banci si bayangkan, ntah ku ja deba nahenta erjinkang, kai deba idadap tanta, kai deba si iukurken otakta, piga barang si inehen matanta, latih akapna kerina. *Me time* enda desken nggarut sabi-sabi gelah ntelap mulihi. Adi sabi-sabi nggo ndekahsa ipake, tumpul, perlu igarut (igerenda) gelah entelap mulihi. Kula tendita e pe bage ka nge. *Me time* si lakoken guna mperiahken ukur alu ndalanken hobbynta, banci ku salon, nonton, belanja, gawah-gawah, olahraga, medem, man pangan ras si debanna. Kerna waktu pesenangken dirinta enda pe banci siaturken sue ras situasi jabunta. Labo tiap wari, tapi lit waktuna. Alu bage kita nggo jadi pasu-pasu man dirinta gelah ergegehna ka pe kita jadi pasu-pasu man isi jabunta bage pe sekelewetta. Selamat menikmati hidup.

### **Aksi: Nulis Surat Man Diri Sendiri**

Kertas ras pulpen enggo isikapken.

Atur perkundul si teneng dengen nyaman. Pakeken waktu guna ngukuri perdalinen geluh.

1. Daftarken kai saja si enggo ilakoken teptep bagin i bas kulandu teptep wari, kenca e oge mulihi, gejapken perjuangan kulandu e segedang wari.
2. Tuliskan surat alamatna e me kap gelarndu. Surat enda man dirindu jine, si isina ngataken bujur i bas kerina perjuangan dirindu, apresiasi (pujiken) dirindu bas suratndu, janah erjanjilah man dirindu i bas suratndu maka ku lebe wari enda kari berekenndu hadiah man bana si erbahanca ia senang.
3. Ertotolah i bas pusuhndu kerna perjuangan dirindu sedekah enda, janah pindo gegeh man baNa guna tetap erjuang dengen gelah ngasup kam ngergaisa.

---

*Dirimu sendirilah sahabatmu yang paling setia.*

*Ia tak pernah meninggalkanmu, ia punya cinta, punya perasaan,  
dan punya batas kemampuan.*

*Hargai dan perhatikanlah supaya ia tetap kuat berjuang bersamamu ☺ (alemgingtings)*

*Pdt. Rasmalem Br Ginting, S.Si (Teol), M.M*



**SI MAN OGEN** : Roma 10:9-13  
**T E M A** : PERSADAN SI MELUMBAR  
**T U J U N** : Gelah Moria:

- Nuriken tanda-tanda persadan i bas Kristus.
- Muat bagin i bas United Action UEM.

**METODE PA** : Diskusi & Aksi

### **Kata Penaruh.**

Persadan kalak Kristen, e me persadan kalak si tek man Dibata si lit i belang-belang doni enda. Kerina kalak si tek tentu labo terjeng tek ngenca tapi kiniteken e arus iakuken dingin erbuah arah pengerana, perukuren ras perbahanen. I bas kitab Johanes 15:5 ituriken maka persadan ras IA ngenca banci erbahan kita erbuah, erbuahken buah si meramis, erguna man banta, anak jabunta ras kerina kalak si lit i sekelewetta. Sabap kalak Kristen labo nggeluh guna dirina saja tapi nggeluh guna Dibata ras tinepaNa.

### **Mpebagesi Pengangkan Kerna Ogen.**

Kitab Roma 10 nuriken maka kiniteken e me dalan-dalanna manusia banci ndatken keselamatan. Ayat 9-10, ngatakan maka manusia la ngasup ndatken keselamatan e alu gegehna entah pe ndalanken 10 Pedah Dibata, tapi keselamatan banci ialoken i bas kiniteken man Jesus Kristus. Arah kiniteken nandangi kai si ibahanNa; kiniteken nandangi kematen ras kekekenNa, manusia banci ndatken pengalemi dosa ras kegeluhen si rasa lalap. Tek maka "Jesus Tuhan kap" la terjeng i bas pusuh tapi pe arus iakuken, isaksiken, ertina kiniteken e arus teridah arah pengakun janah ternanami arah buahna. *I bas Pustaka si Badia lit tersurat, "Ise tek man baNa la kecewa."*

*Ayat 11,* kata enda ncidahkan hubungan kiniteken ras pusuh peraten manusia. Kiniteken e turah dingin rehna i bas pusuh peraten. Man kalak si

tek, pusuh peratenna ipegegehi, ibere kepentaren ras iperlengkapi alu erbage-bage si mehuli, ulihna e me la kecewa.

*Ayat 12*, nuriken maka Dibata sada ngenca e me si isembah kerina kalak si tek, Tuhan si nepa langit ras doni, si enggo reh ku doni enda mate guna nebusi dosa manusia dingen keke ras nangkih ku Surga, si jadi jaminen man manusia maka kematen labo ndungi kerinana, tapi arah kematen manusia ipekeke dingen iangkat ku Surga. Kerina kalak si tek jadi sada, aminna pe pelain-lain bangsa, suku, bahasa, kebangsan, ingan tading, beda budaya ras sidebanna. Kerinana ersada i teruh kuasa Tuhan si sada e. Tuhan la mbeda-bedaken manusia, kerina tinepaNa, IA si njadikenca, kerina ikelengiNa.

*Ayat 12, IA melumbar mere man kalak si erlebuh man baNa*, kata enda nuriken maka Dibata si mada kerina si nasa lit, IA sinepasa, i bas IA kai pe lit, janah kai pe banci ibahanNa man manusia. Guna ndatken kai sinisuraken manusia, sada ngenca saratna, e me erlebuh man baNa, tentu iberekenNa sabap IA melumbar. La terjeng melumbar i bas mere, tapi pe man kalak si mindo ikeliniNa, ertina Dibata la terjeng mereken keperlun daging kula tapi pe pertendinta (ay.13). Alu bage tuhu-tuhu serta kekelengen ras pemereNa man banta.

## **Pengkenaina.**

Kalak Kristen rusur ikataken pengikut Kristus, ertina Kristus si man ikuten, si man usihen. I bas geluhNa enggo icidahkenNa kerna uga kearusen nggeluh. I bas PA-nta minggu enda icidahken biak si man usihenta, e me:

- IA mpersadaken. Alu bage geluhta pe arus mpersadaken. Melala erbagenana manusia si itepa Dibata, termasuk kalak Kristen pe erbage-bage, umpamana gelar gerejana, bahasana, sukuna, inganna ras sidebanna. Selaku Moria, i bas kerina si pelain-lain enda, arus sigejabken maka kita ersada i bas Tuhan. Enda me ikataken *oikumene* e me sada gerakan si ngataken kerina kita nggeluh i bas "Sada Rumah." Kerina kalak i ja pa pe ringan i belang-belang doni enda ersada, rembak, nggeluh i bas sada rumah e me rumah Tuhan.
- IA melumbar. Moria pe arus melumbar, gejablah maka kerina si lit i bas kita rehna i bas Dibata nari. La lit sada pe si lit i bas kita erdandanken beluhta, termasuk kesahta si mulih-ulih enda denga pe rehna i bas Dibata nari. Kerina iberekenNa erdandanken keleng ateNa, aminna gia banci saja kurang denga siakap. Tapi i bas si lit e arus tetap sikataken

bujur, dingen sipakeken guna nehken kekelengen, gelah i bas kerina kecibal geluhta, lit nanamna man kalak sideban.

Bagi Dibata keleng ateNa man banta, la kita ibeda-bedakenNa bage ka me pe Moria i bas ngkelengi, la terjeng keluarganta ngenca, kade-kadenta, teman sada gerejanta, tapi pe anggota Gereja sideban pe banci si kelengi, sisampati alu biakta si melumbar. Umpamana, i bas persadanta ras gereja-gereja si lit hubungenna ras penginjilen i Jerman nari, lit persadan si igelari UEM (United Evangelical Mission), GBKP salah sada anggotana, janah anggotana lit i Asia, Afrika ras Eropa/Jerman. I bas persadan enda lit programna si igelari United Action (radu ras erbahan aksi), i bas program enda, kusus kita nampati anak-anak si man sampaten si igelari "Children in Need".

I GBKP program si ibahan kita, umpamana, ngelakoken Minggu UEM (UEM Sunday), erbahan Walk a Mile alu erbahan baju kaos seragam (radu ras gereja-gereja anggota UEM si lit i Medan sekitar) ras usaha sidebanna. Bage pe mulai kin tahun 2022, enggo sibenaken erbahan kerjasama ras teman-temanta gereja GKPM (Gereja Kristen di Pulau Mentawai). Tujunta e me kap, arah Kerjasama enda enggo si implementasikan Sasaran Pelayanan GBKP tahun 2024 "Berkarya dan Berguna untuk Orang lain."

Selaku Moria, marilah kita ikut muat bagin guna nehken kekelengen, alu melumbar sisehken sada bagin si lit i bas kita guna nampati kalak si man sampaten, aminna gia la sada gereja, suku, kebangsan ras kita. Nggeluh dingen majulah persadanta jadi persadan kalak si melumbar (tema).

### **Diskusi ras Aksi:**

1. Cuba turiken pengertinndu kerna "*IA melumbar mere man kalak si erlebuh man baNa*".
2. Lit nge pengalamenndu i bas nggejabken perbahanen "Dibata si melumbar mere", turikenlah!
3. Moria selaku anggota persadan si melumbar, kai si banci si pepulung, si jadi tanda kita ikut muat bagin i bas program United Action? Turiken dingen lakokenlah!

*Pdt. Jennie E. Keliat, STI.*



**SI MAN OGEN** : Kuan-kuanen 12:4  
**TEMA** : JADI KEMULIAN PERBULANGEN  
**TUJUN** : Gelah Moria:

- Niksiki perbahanen si mehuli si jadi kemulian ras keriahen perbulangen.
- Mpertahanken diri jadi ndehara si mehuli.

**METODE PA** : Sharing ras aksi

### **Kata Penaruh**

Mahkota e me sada lambang kinihamaten, kemulian, kekuasaan bage pe jabaten sekalak jelma. Adi sekalak raja make mahkota, e tandana ia erkuasa bage pe ihamati rakyatna. Mahkota, lit ibahan i bas perak nari, arah emas nari, ihias ka alu berlian ras permata, segelah mejile ras mehaga, e maka jadi perjuangan/rebuten i bas sada-sada acara ntah pe i bas sada ingan (kerajan). Arah PA sendah, ituriken maka kinihamaten ras kemulian sekalak perbulangen labo i bas mahkota si itempa i bas emas ntah berlian nari, tapi kinihamatenna ras kemulianna lit i bas ndeharana. Ndehara si kuga nge si jadi kinihamaten, kemulian bage pe keriahen ukur man perbulangenna? Mari si gargari arah pengogenta enda.

### **Mpebagesi Pengangkan Kerna Ogen.**

Pengogenta enda, nuriken pengajaren kerna sikap ras perbahanen ndehara si mehuli ras ndehara si njuruken. *Ndehara si mehuli* mbaba kemulian ras keriahen nandangi perbulangen. Mehuli i bas bahasa Indonesia e me *cakap*, bahasa Ibrani e me *eseth hail*, iertiken mehuli, melala kinibeluhenna, (kreatif). Kata *eseth hail* enda sendalanan ras si tersurat i bas Kuan-kuanen 31:10 kerna ndehara si cerdas (pentar), si encidahkan biak (karakter) ras perbahanen si la saja mehuli ras erkemalangen man Tuhan, tapi pe dem alu

kepentaren i bas ngajarken anak-anak, erbinaga, ngurus juma bage pe si erdahinna, ngoratken rubia-rubia (*beternak*), bage pe erbahan baju (*menenun*). Ikut nampati perbulangen i bas ngelitken perduiten ras keperlun jabu, bage pe nampati perbulangen i bas ku si terulin. Ndehara si pentar dengen mehuli i bas kegeluhenna jadi kemulian nandangi perbulangenna (band. Bahasa Indonesia: "*Isteri yang cakap adalah mahkota suaminya*). Mahkota e me tanda kehamaten, jadi keriahen kalak si makesa. E maka arah perbahanen ndehara si mehuli, pentar, kreatif, malang man Dibata erbahanca perbulangenna ipujiken dengen ihamati kalak sideban. Kiniulin ndehara teridah ras tergejap arah perbahanen ras pengerana si teptep wari. Maba kemajun, kemalemen ate ras kiniulin. Ia me teman ras penampat man perbulangen i bas kegeluhen.

*Ndehara si njuruken* e me biak si petembil ras ndehara si mehuli ndai. Ndehara si bagenda labo pernah mereken dukungan bage pe labo banci jadi kemulian nandangi perbulangenna, tapi kerina perbahanenna njuruken perbulangenna. Ndehara enda seri ras pinakit kanker, ncedaken kegeluhen perbulangen ras isi jabuna. Ukurna la mehuli, rananna la jadi pasu-pasu, perbahanena petembil ras Kata Dibata. Pinakit kanker, si erbahansa perbulangen kote, lanai semangat, encedaken ukur dengen pegendek umur geluhna. Adi i bas bahasa Indonesia: "*tetapi yang membuat malu adalah seperti penyakit yang membusukkan tulang suaminya.*" Tulan e si erbanca kula manusia e banci tedis erkiteken megegeh ras paguh. Adi tulan e lanai paguh/keropos, sekalak jelma pasti lumpuh, lanai ngasup ngelakoken kai pe. Pinakit kanker ntah pe keropos tulan enda mbaba keguluten ukur nandangi sekalak jelma. Bage me sekalak ndehara si njuruken, ipermelakenna dengen gulut pusuh perukuren perbulangenna. Kerehen ndehara lanai bo jadi penampat tapi erbahan ukur tumpat.

## **Pengkenaina.**

Arah nats enda banci si gargari kerna biak ndehara si mehuli, e me:

a. Erkemalangen man Tuhan.

Ndehara si mehuli, lit persadanna ras Dibata. Ietehna kai tanggungjabapna nangdangi isi jabuna, terlebih tanggungjabapna selaku ndehara si mehuli iadep-adepen Tuhan. Pertotonna natang-natang kegeluhen perbulangen, pengerana, perukuren ras perbahanen si mehuli e igejapken perbulangen janah jelma si enterem erngena ate nandangi ia.

- b. Metenget dengen tutus.  
Ndehara si mehuli/pentar e me ndehara si metenget nandangi situasi, ngasup ngaturken waktu ras pendahinna alu mehuli. Kinitengetenna erbahan ia ersikap makeken waktu si lit alu payo, gelah ola sempat ketunduken i bas pendahin bagepe keperluan geluh. Kinitutusen bas ndahiken dahin jadi usihen nandangi kalak sideban.
- c. Kreatif.  
Ndehara si kreatif, la terjeng jadi ibu rumahtangga si ngaturken jabu ras anak-anak, tapi beluh ia ngidah peluang ras makeken peluang alu mehuli, subuk i bas erdahin bage pe usahana guna nampati perbulangen i bas ngelitken keperluan jabu (masalah perduiten).
- Moria, selaku ndehara, (si ndeherna ras perbulangen) nandai alu mbages kerna keriahen ras kemalemen ate perbulangenna. Terbeluh muat ukur dengen mabaisa ku kiniulin. Tuhu melala tantangan, tapi perayakenna segelah arah perbahanenna maba kemalemen ate man perbulangen arah ncidahken biak-biak si mehuli. Kerina si mehuli rehna i bas Dibata nari kap. Persadan si mehuli ras Dibata njemba ia guna ncidahken kiniulin e. Kiniulin e maba semangat, kesehaten ras kegeluhen.

### **Sharing Ras Aksi:**

Moria ibagi ku bas 3-4 kelompok. Tep-tep kelompok teremna 3-4 kalak.

1. Sekalak-sekalak i bas kelompokna nuriken perbahenna si enggo jadi kemulian ras keriahen nandangi perbulangen? (Si lanai lit perbulangenna pe turikenna pengalamenna tupung je denga ras ia).
2. Lit nge rungsa-rungsas si erbahansa perbahanenta langa jadi kemulian ras keriahen nandangi perbulangenta?
3. Tuliskan rungsa-rungsas i bas sada kertas. I bas pertoton kusus, i bas kelompok sitotoken gelah kita ngasup ngalakenca.

*Pdt. Lina br Gintinfig,STh*

*Inget ras ersikaplah.....*

*Lingku si reh si pepulung kolekte exa guna nampati KWK-GBKP*



**SI MAN OGEN** : Keluaren 16:16-21  
**T E M A** : SUE RAS SUKATENNA  
**T U J U N** : Gelah Moria:

- Mbandingkan perbahanen kalak Israel si patuh ras si la patuh ndalanken aturen Dibata.
- Nikapken keperlun isi jabu asa sukatenna

**METODE PA** : Studi Kasus ras aksi

### **Kata Penaruh.**

Organisasi kesehatan dunia (WHO,2022), nuriken kerna stunting e me masalah kurang gizi kronis si teridah arah kula si gendek. Stunting enda jadi erkiteken kurangna gizi si ibereken man anak-anak i bas 1000 wari ia ndalani kegeluhenna i doni enda; kurang ndatken las matawari, mesera ndatken lau bersih, bage pe kurang bersih inganna tading. Lit ka pinakit obesitas, e me mbuesa lemak i bas kula erkiteken la bali gizi si begket ku bas kula ras gegeh si ndarat i bas kula e nari. Tambah si e pangan si rusur si pan e me pangan si enggo jadi, entah pe siap saji. Jadi, si erbahansa terjadi obesitas entah pe stunting, banci ipengaruhi melala faktor, tapi i bas kerinana faktor pangan penyebab utama. E maka arah PA-nta wari enda ibabai kita selaku nande guna ngurangi ancamen obesitas ras stunting i sekelewetta (jabunta).

### **Mpebagesi Pengangkan Kerna Ogen.**

Si jadi bahan ogenta enda nuriken sada turi-turin si ncidahkan kegeluhen kalak Israel i bas perdalinen i padang gurun ku taneh perpadanen si i pimpin Musa. Enggo sada setengah bulan perdalanen kalak Israel i padang gurun kenca nadingken Mesir. Kenca si e berkat me i Elim nari ku daerah si tergelar Sin, i tengah dalan jungut-jungut kalak Israel man Musa erkiteken enggo latih tambah ka persediaan pangan enggo keru (ay.3). I bas situasi si bage rupa, iidah ras ibegi Dibata me kalak Israel e jungut-jungut. E maka ipenusur Dibata pangan i langit nari tupung karaben bage pe erpagi-pagi.

Dibata erbahan aturen maka bangsa e arus ku darat teptep wari pepulungsa asa biasna guna wari e, alu sukaten 2 liter teptep jabu. Adi enggo kenca las matawari asa kai pangan si tading i babo taneh kerina melengas. Tujun Dibata erbahan ketetapan e me nguji kalak Israel ngikutken perintahNa entah lang. Kepeken lit kalak Israel la ndalanken kai si enggo ipedahken Dibata e. Kenca ipesusur Dibata pangan i langit nari, teptep kalak Israel muat baginna. Tapi lit si muatsa lebih dua liter janah lit ka si muatsa kurang (ay. 17). Tapi si menarik e me subuk kalak Israel si muat pangan e sue ras sukatenna, entah pe si lebihina ras kurang gia bagi si enggo iaturken Dibata, ulihna labo lit si tualen (la lit si lebih bas ia entah pe si kurang bas ia). Jadi ate Dibata ngajari kalak Israel segelah asa perlunalah pangan e i pepulung gelah erguna ku kula (ay.18b-19). Gia lit lebih buatna, ibuniken seh wari pepagi tapi pangan e lanai terpan/la erguna (jadi bernga ras mbau).

### **Pengkenaina.**

Erkawiten ras Moria jadi pasu-pasu man anak i bas jabu, secara kusus i bas pencegahan obesitas ras stunting, Kata Dibata enda mpersingeti kita:

1. Moria selaku nande i tengah-tengah jabu arus mediate i bas ngaturken keperluan pangan isi jabu, kususna anak. Anem gia lit kebebasantana guna milih ras nentukan si bengket ku daging kulanta entah pe anak-anakta, tapi sue ras sukatenna me si ngena ate Dibata. Sue ras sukatenna ertina pangan e labo terjeng kerna kuantitas (jumlah) tapi pe arus i perdiateken keseimbangan ras kualitasna (isi/gizi).
2. Sue ras sukatenna nge maka pangan e jadi erguna, sebalikna adi pangan e la sue sukatenna kepe mpeturah pinakit. Ula min si peturut kerincuhenta entah pe kerincuhen anakta saja. Ula ka erkiteken kesibukenta jadi alasen maka kita ras anakta enggo terbiasa man pangan si la ergizi (cepat saji). Nentukan si man pangan pe aruslah si perdiateken bahan-bahanna ula terjeng erga si murah ras entabeh i bas babah ngenca jadi perayakenta. *Mencegah lebih baik sejak dini*, adi paksa anak i bas bertin perlu kal si perdiateken pola makanta guna mencegah stunting. Adi anak enggo tubuh si perdiateken panganna mulai balita ras silang-langna seh remaja (masa pertumbuhan) guna mencegah obesitas. Selaku nande tetap min sisikapken pangan rikutken keperluan kula anak-anakta. Si biasaken ras si persinget gelah anak-anakta man pangan sue ras sukatenna. Labo dalih gia kita latih i bas mpekena pangan isi jabu. Sabap pangan si sue ras sukatenna



erbahansa isi jabunta sehat, adi sehat daging kula tentu produktif i bas ndalani kegeluhen enda.

Nama bahan makanan	Berat (gram)	Kalori
Nasi putih	100	175
Ketupat lontong	200	38
Bubur	200	44
Roti tawar	50	128
Kentang rebus	200	166
Singkong rebus	100	146
Ubi rebus	100	125
Jagung rebus	250	90
Makaroni	25	91
Nasi uduk	200	506
Ketan putih	120	217
Kentang goreng	150	211
Tape singkong	150	260

Jenis kelamin	Usia (tahun)	Aktivitas yang dilakukan		
		Menetap	Cukup aktif	Aktif
Anak	2-3	1,000 kkal	1,000-1,400* kkal	1,000-1,400 *kkal
	4-8	1,200 kkal	1,400-1,600 kkal	1,400-1,800 kkal
	9-13	1,600 kkal	1,600-2,000 kkal	1,800-2,200 kkal
	14-18	1,800 kkal	2,000 kkal	2,400 kkal
	19-30	2,000 kkal	2,000-2,200 kkal	2,400 kkal
	31-50	1,800 kkal	2,000 kkal	2,200 kkal
Pria	51+	1,600 kkal	1,800 kkal	2,000-2,200 kkal
	4-8	1,400 kkal	1,400-1,600 kkal	1,600-2,000 kkal
	9-13	1,800 kkal	1,800-2,200 kkal	2,000-2,600 kkal
	14-18	2,200 kkal	2,400-2,800 kkal	2,800-3,200 kkal
	19-30	2,400 kkal	2,600-2,800 kkal	3,000 kkal
	31-50	2,200 kkal	2,400-2,600 kkal	2,800-3,000 kkal
51+	2,000 kkal	2,200-2,400 kkal	2,400-2,800 kkal	

## Studi kasus.

Lit sekalak anak umur 4 tahun jajan pangan-pangan atena lalap, tiap kai idahna i kede entah pe mentas i lebe-lebena ngege ia mindo segelah i tukur nandena si tuduhkenna e. Pada hal lit ka nge pangan si enggo itukur leben janah e paksana nge ijemakna ras labo ipanna pe (iambur-amburken anak e), bage pe jajan si deban lit denga isusun nandena bas tasna. Tapi erkiteken adi la itukur nandena si pindona e minter ia tangis la turi-turin, e maka segelah sinik itukur nandena me jajan si tuduhkan anakna e, dungna jadi kebiasaan anak e, seh maka sen Rp.30.000 pe la bias jajanna nukur pangan-pangan sada wari.

1. Kai akapndu si erbahansa anak e jajan atena lalap?
2. Kai nge si arus ibahan pernakan e segelah anakna banci terkontrol jajanna?

## Aksi:

### Erbahan Mie sehat cocok juga untuk bayi

Bahan-bahan

1. 500 gr tepung terigu
2. 30 gr tepung tapioka / 3 sdm

3. 1 butir telur
4. 150 ml air
5. 1/2 ikat bayam /pakcoy/sawi hijau
6. 1/2 sdt garam (optional)

### **Cara membuat**

1. Masukkan sawi dan air, blender sampai halus. Saring, dan ambil airnya saja.
2. Masukkan terigu, tapioka, telur, garam. Aduk sampai rata, tambahkan air sari bayam sedikit demi sedikit.
3. Kalau sudah tercampur rata, pipihkan.
4. Cetak dengan gilingan mie / iris tipis" adonan mie dengan pisau, sesekali taburi tepung agar tidak lengket. Di angin-anginkan sekitar 10 menit.
5. Gulung mie sesuai porsinya, lalu masukkan ke dalam wadah tertutup yang di lapiasi kain/serbet yang bersih atau bisa langsung di rebus untuk di konsumsi.

### **Erbahan Sambal Saos tanpa pengawet dan pewarna**

#### **Bahan:**

- 100 gram cabai rawit
- 500 gram tomat
- 50 gram bawang putih
- 400 ml air
- 3 sdm cuka/air lemon
- 200 gram gula pasir/gula merah
- 2 sdm garam
- 2-3 sdm maizena, larutkan dengan sedikit air

#### **Cara Membuat:**

1. Rebus cabai, tomat, dan bawang putih dengan 400 ml air.
2. Tunggu hingga air dingin lalu blender dengan sedikit air rebusan.
3. Masak cabai yang sudah halus.
4. Tambahkan gula, garam, cuka, dan tepung maizena sambil terus diaduk-aduk.
5. Aduk adonan searah dengan cepat agar tak menggumpal kurang lebih 5 menit. Jika kekentalan sudah sesuai maka matikan api dan saus siap dinikmati.

*Pdt. Amenda br Bangun, S.Th.*

*Minggu enda si pepulung kolekte extra guna nampati KWK-GBKP*



**SI MAN OGEN** : Lukas 2:41-52

**TEMA** : TAMBAH PEMETEH RAS KINITEKEN

**TUJUN** : Gelah Moria:

- Nggargari perbahenen Jusup ras Maria i bas ngarak-ngarak Jesus.
- Nikapken keperluan anak sope berkat ku PIARA.

**METODE PA** : Diskusi ras aksi

### **Kata Penaruh.**

La erkeri-kerin si man cakapenken adi ngerana kita kerna anak i tengah-tengah jabunta. Pelain-lain kerina pengalamenta mpekena-kena anak-anakta, lit si latih sitik si akap ngatakenca, lit ka mesukah man katanken, lit kuga ka pe la pas ras ia. Bagenda me kerina pengalamen orangtua ngerunggui anak-anak gelah sikap. Sekalenda ituriken man banta kerna Pesta Iman Anak & Remaja (PIARA) si ilakoken gerejanta guna encidahken perhatinta nandangi peembangan kiniteken anakta. Gereja erpengarapen gelah anak-anakta banci min meningkat kiniteken, kiniersadan, keriahen, kemandirinna. Alu bage teridah lit pertumbuhan pemeteh ras kinitekenna. Enda kal me si jadi pengarapen man orangtua, uga gelah min reh tambahna pemeteh anakta e kerna si mehuli dengen reh bagesna ka kinitekenna man Dibata.

### **Mpebagesi Pengangan Kerna Ogen.**

Bahan PA-nta i bas wari enda e me turi-turin kerna Jesus ibaba ku Rumah Pertoton guna ngerayaken wari Paskah. Perlu pe si eteh maka i bas kebiasaan kalak Jahudi, anak dilaki banci ibaba ku Rumah Pertoton guna ersembah man Dibata kenca umur 12 tahun. Janah kenca umur 12 tahun ka me ia iendesken man imam-imam i bas Rumah Pertoton guna iajari kerna Kitab

Nabi ras Hukum Taurat, e maka mekatep igelari "Anak Taurat." Jusup ras Maria Selaku orangtua Jesus, ngikuti aturen entah pe kebiasaan kalak Jahudi e. Piga-piga pengajaren si teridah e me:

- Teptep tahun orangtua Jesus berkat ku Jerusalem guna ngerayaken Paskah. Si e nuduhkan maka Jusup ras Maria disiplin ngikuti perayan gerejawi, la ersung-sung. Amin gia guna seh ku Rumah Pertoton banci jadi 2 – 3 wari dekahna perdalanen, tentu i je perlu kinigenggengen guna ndahikenca. Tapi teridah kuga Jusup ras Maria tiap tahun berkat ku Rumah Pertoton, tentu enda tahu-tuhu jadi pelajaran kal man Jesus.
- Kenca dung perayan e mulih orangtuana, tapi Jesus tading i Jerusalem. Janah orangtuana la meteh kerna si e. Keterangan enda tahu-tuhu menarik; engkai maka orangtuana la meteh? Ituriken maka iakap orangtuana IA erdalan ras kalak si enterem. Secara psikologi pe Jusup ras Maria mereken kepercayaan man Jesus guna mandiri (ergaul ras kalak si enterem). Enda kal me sada kebutuhen anakta e me ibereken kepercayaan aminna gia tetap i teruh pengawasen orangtua.
- Adi ikira warina orangtua Jesus ndaram-darami Jesus lit dekahna 3 wari; enggo terbayangkan kuga perasan orangtuana e. Tapi bage ia jumpa, idahna Jesus diskusi ras guru agama kalak Jahudi i bas Rumah Pertoton, la lit turah rawana. Ikut ka orangtuana e kemamangen kerna kai si idahna. Nina orangtuana e: *'o anakku, engkai maka bagenda perbahanenNdu man kami? Aku ras bapaNdu enggo ndarami kam alu aru ate!* Bagenda ngenca si ikataken Maria, tahu-tuhu lembut dinging la lit erbahan emosi. Enda salah sada si ilakoken orangtuana i bas nehken kata man Jesus.
- Jesus ngasup ngaloken pengajaren guru-guru agama kalak Jahudi dinging nungkunsa, jenari ngasup ka ia nuriken pengangkanNa adi guru-guru agama e nungkun. Kai ertina enda? Jesus i bas umur 12 tahun enggo ngasup erdiskusi kerna pengajaren kiniteken i bas paksa si e. Banci kataken maka kebeluhen Jesus tahu-tuhu seri ras guru agama. Selain erkiteken ia Tuhan, tentu lit i je ketutusen orangtuana guna ngajari IA, nuriken kerna Kata Dibata man anakna.
- Jesus anak si megiken kata orangtua (ay. 51). Enda me si ilakoken Jesus maka teridah reh tambahna pemetehNa dinging reh ngenana ate Dibata ras manusia man baNa.

## **Pengkenaina.**

Malem kal ateta erlajar arah bahan PA-nta wari enda, banci melala kal si dat pengajaren si mehuli kususna kerna pendidiken ras pendampingen nandangi anakta. Banci jadi ndauh kal bedana caranta mendampingi anakta ras kai si ilakoken Maria ras Jusup. Mari erlajar kita mulihi; gelah banci min seh kai si iarapken tema-nta i bas wari enda: Tambah Pemeteh ras kiniteken, kususna i bas geluh anakta. Mungkin adi nambahi pemeteh, labo kita ngasup sabap enggo jagon anak si genduari asangkan kita, e maka banci si pebengket ia ku bas les tah private. Tapi adi nambahi kiniteken, tentu kita arus erlajar dengen erbahan strategi guna ndampingi anakta bertumbuh. Banci jadi alu rutin radu ras ngoge Pustaka, nuriken ras diskusi kerna turi-turin Pustaka, mabai ia terbiasa ertoto ras sidebanna. Si enda arus silakoken erkiteken langa tentu melala kari sejenis "guru-guru agama Parisi/Palsu" ngerintak ia alu pengajaren si la mehuli seh maka itadingkenna kinitekenna. Emaka penting kal ngajari anak gelah tetap tambah pemetehna ras kinitekenna man Dibata alu bage la mesukah anakta ijolah-joleken angin pengajaren si papak.

PIARA GBKP nuate sura-sura gerejanta jadi salah sada sarana guna nambahi pemeteh ras kiniteken anak alu er- pesta iman. Ngarap kita gelah anak-anakta ndatken tambahen pemeteh, pergaulen, bage pe kiniteken arah dahin enda. E maka mari si dukung dahin PIARA enda i bas Runggunta arah aksi Moria Runggun.

## **Diskusi ras Aksi:**

1. Mari sibandingkan; caranta nambahi pemeteh ras kiniteken anak ras cara Maria ras Jusup nambahi pemeteh anakna!
2. Mari si diskusiken aksi kai si banci sidadahken guna mendukung PIARA.

*Pdt. Liza Selvina br Tarigan, MTh*



**Minggu,  
23-29 Juni  
2024**

*HARGANAS*

**SI MAN OGEN** : Mazmur 128 : 1 – 6  
**TEMA** : JABU SI MALANG MAN TUHAN  
**TUJUN** : Gelah Moria:

- Nuriken ulu kemalemn ate e me i bas Dibata nari.
- Naksiken tanda-tanda kemalemn ate arah perukuren, pengerana ras perbahanen.

**METODE PA** : Study Kasus

### **Kata Penaruh.**

Teptep jabu ersura-sura kuga gelah malem ate (sangap nggeluh) i bas kegeluhenna. E maka erbage-bage usaha si ilakoken isi jabu si akapna banci nehi sura-surana e. I bas dampar si deban melala ka erbagenana si erbahanca maka la idatken kemalemn ate e sabap megati niakap kemalemn ate e banci idatken arah gegeh ras pemeteh. Janah enggo pe ndekah erjabu lit nge labo ietehna kekurangan ntah kelebihan pasangenna bage pe nandangi anak-anak. Penandai si kurang erbahanca la kita seh ku bas kemalemn ate seh maka la si akap sangap erjabu. E maka perlu kal kita lalap erlajar gelah si eteh i ja kin uluna jenari ternanami kita kemalemn ate e seh maka sangap si akap kita nggeluh.

### **Mpebagesi Pengangkan Kerna Ogen.**

Mazmur 128 enda megati pe igelari Masmur keluarga. Isina ngerana kerna kemalemen ate (sangap) kalak si erkemalangen man Tuhan. Ulu kemalemen ate e me Tuhan. Guna ndatken kemalemen ate e alu; erkemalangen man Tuhan, mehamat ras ndalanken kerina perintah-perintahNa, si teridah arah kecibal geluh kerina anggota jabu:

1. Dilaki/bapa: malem atena sabap ipanna ulihna latih, sangap nggeluh, mehuli si kerajanggenna. I bas konteks Timur secara umum bapa e me si ndarami serpi (nafkah) erdahin ku juma. E maka selaku kalak perjuma ikataken sangap adi juma si idahikenna rani, la lit musuh sinuan-sinuan, la legon ras pe ibuat tuan taneh ( tengkulak ) ulih juma e. Dingen inanamina ulihna erdahin ras anak jabuna. "Ipanna ulihna latih" labo terjeng ipan tapi alu nggejapken ras ngatakan bujur asa si lit i bas ia.
2. Ndehara e me nande, kecibal nande iandingken bagi batang anggur si meramis buahna. Sangap kalak si nuan anggur adi melala buahna. I bas kalak Israel anggur e lambang keriahen ras kesangapen. Anggur tetap ipake i bas kerina acara pesta subuk meriah ntah pe ceda ate. Bage me jabu kalak si erkemalangen man Tuhan, teridah i je nande si jadi keriahen, kesenangan ras kehagan man perbulangen ras anak-anakna i bas kerina paksa.
3. Anak-anak, bagi tunas batang saitun. Sada kesangapen man kalak si nuan saitun adi melala tunas batang saitun e dengen arah tunasna e jadi buah. Bage me igambarkan jabu si erkemalangen man Tuhan, anak-anak rikutken i bas perbelinna desken tunas si mbaru, si maba kemalemen ate man bapa ras nande selaku sinursur kalak si malang man bana.

Kesangapen i bas pendahin, i bas jabu, kesehaten ras umur, bage pe kesangapen i bas kesusuren rehna i Sion nari, deleng Dibata, ingan si badia. I je nari me kesangapen si idatken kalak si erkemalangen man Tuhan. Sabap tutus ia ersembah man Dibata.

### **Pengkenaina.**

Jabu si ipasu-pasu Tuhan teridah arah kesempabun (harmonis) bapa, nande ras anak-anak si ermalem ate. Bagi nina sada kuan-kuan; **"kebahagian itu tidak turun dari langit"** bage pe gambaren keluarga si sempabu labo la lit perbeben ras kiniseran, tapi kalak si

erkemalangen man Tuhan pentar ia ngalakenca. Kalak si malang man Tuhan ngidah maka pasu-pasu e labo terjeng kinibayaken, pendahin si sikap, perbulangenna bagi ukurna, anak-anak terajarken, la lit kiniseran. Tapi i bas ngasupna kita ngalaken perbebenta, ngasup kita ngidah kesangapen idur Dibata nari, ngasup ngidah kiniulin si ibereken Dibata, (bd. Roma 8:28). Teptep jelma lit nge kelebihenna ras kekurangenna. Guna ndatken kemalemen ate i bas jabu ngasup kita mujjiken ras ngergai teptep anggota jabunta. Ngasup pe ngaloken ras pang kita nuriken kekurangenna alu ate keleng gelah banci ia robah. Perubahen e labo banci minter kuh, perlu lit kesabaren ras kiniteken maka Tuhan si nampati ia ngubah dirina. Banci jadi lit ka nge biak si mesera ngubahkenca tapi tetap si idah e jadi proses guna ngelakoken si mehuli. Lit sada pertoton si menarik jadi perenungen man banta, nina: *"Tuhan berilah aku ketenangan untuk menerima hal-hal yang tidak dapat aku ubah, keberanian untuk mengubah hal-hal yang bisa diubah dan hikmat untuk membedakan keduanya.* Jabu si malang man Tuhan ngasup ngaloken kerina anggota jabu alu keleng ate.

### **Study Kasus:**

I bas sada kuta tading me i je sada keluarga e me Bp. Bagekin. Jabu enda gelgel nari kin enggo me kalak Kristen. Bapa i tengah jabu pendahinna sekalak guru ras nande lit usahana kede kelontong, anak i tengah jabu lit sada dilaki gelarna Bagekin, ia enggo SMA. Keluarga enda cukup sibuk i bas pendahinna, e maka kurang kal keaktifenna i bas dahin-dahin perpulungen, tapi adi adangen ntah iuren si lit i bas perpulungen labo ia tading. Bapa i tengah jabu ersura-sura gelah anak e pagi banci nerusken pendahinna jadi guru, e maka teptep lit kesempatan ercakup ras anakna tetap iajukna gelah ia pagi jadi pendidik. Nande i tengah jabu ersura-sura gelah anakna e pagi banci nerusken usaha si lit, e maka ia pe teptep ercakup ras anak ngajuk ia gelah erlajar i bas bidang usaha. Bage ka pe mamana sekalak polisi, janah ia salah sada si nentukan kelulusan kalak si melamar jadi polisi, ersura-sura gelah bere-berena e banci pagi jadi polisi. Mamana E maka ia pe rusur mpersingeti bere-berena e gelah masuk jadi polisi apai ka si Bagekin enggo kelas IX ( Kls. 3 SMA ). Si Bagekin la nggit nogan orangtuana bage pe ras mamana. E maka seh me paksa ujian akhir sekolah. I bas paksa ujian sini ingetna e me kai nina bapa, nande ras mamana. Adi nina bapa jadi guru, nina nade jadi pengusaha janah nina mama jadi polisi. Taren-taren ngukuri

uga nina bapa, nande ras mamana maka soal-soal ujian lanai terjabapsa, piah dungna la ia lulus i bas sekolahna. Bage me jadina adi mehuli gia sura-sura bapa, nande ras mamana adi la arih-arih i tengah jabu dengen la erkemalangen man Tuhan maka labo tersehi bagi sura-sura. Piah dungna anak i tengah jabu maba beratna.

### **Diskusi:**

1. Cuba turikenndu kai nge kekurangan si lit i tengah jabu Bp. Bagekin arah studi kasus enda ndai ras kai ka akibatna?
2. Turikenlah kai-kai saja si perlu ilakoken keluarga enda i tengah jabu janah kai ka ulih si banci ialokenna?

*Pdt. Kasir Purba, STh.*



**SI MAN OGEN** : Keluaren 4:24-26

**T E M A** : NJAGAI KEBADIAN JABU

**T U J U N** : Gelah Moria:

- Ngargari perbahanen Sipora nelamatken kegeluhen jabuna.
- Ngkuhi se-isi jabu gelah rembak ras Dibata.

**METODE PA** : Meditasi

### **Kata Penaruh.**

Lit belas-belas si ngataken "keluarga adalah senjata terakhir iblis guna menghancurkan manusia." Ertina, iblis make keluarga jadi senjata si meganjangna guna ncedai manusia. Adi enggo terkuasai iblis jabunta, ipecah-pecahna seh sontar jabu, mis nge ceda kerina. Umpamana lit perselingkuhen i bas jabu, mabai kerina anggota jabu curna ras ermesui ate. Adi anak-anak terpengaruh pergaulen bebas, maka kerina isi jabu mela. Entah kecanduan judi, narkoba, miras, si e kerina erbahanca jabu melket, curna ras lanai badia. Ula la mediate entah mapas nandang kegeluhen jabu. Jadi ceda jabu, ceda me manusia ras isi jabu. E maka perlu kal njagai kebadian jabu. Erlajar kita arah perbahanen Sipora, ndehara Musa ras nande Gersom ras Elieser.

## **Mpebagesi Pengangkakan Kerna Ogen.**

Ogenta i bas ayat 24 ikatakan: "i bas perdalanen ku Mesir, i bas sada ingan erberngi, ijumpai Tuhan Musa janah ibunuhNa atena ia." Engkai maka Tuhan munuh Musa ateNa? Ma kin kitik-kitik nari ia enggo ipilih ras iselamatkan Tuhan i bas pembunuchen 'masal bayi' i Mesir? (bdk. Keluaren 2:1-10). Engkai maka gundari ibunuhNa ateNa? I bas keluaren 4:21-26 ituriken ma kin Tuhan nge si nuruh Musa nadingken Median dengen mulih ku Mesir njumpai raja Firaun gelah ipelepasna kalak Isreal ersembah man Tuhan? Musa isuruh mulih ku Mesir guna mulahi kalak Israel i bas perbudaken Firaun. Tapi i bas perdalanen Musa ras keluargana, i bas sada berngi Musa rempet sakit mekelek seh narus mate. Kai sura-sura Tuhan i bas si e. Entah lit kin si la payo ilakoken Musa? Musa la mediate kerna sunat, enggo pe mbelin anakna tapi la isunatkenna. Sunat e penting kal ilakoken man kesusuren Abraham, bali pentingna ras lakon peridin i bas kalak Kristen. Sunat e me tanda perjanjin Dibata ras Abraham bage pe ras kerina kesusurena. Tupung Tuhan milih Abraham, Tuhan erpadan masu-masu Abraham jadi bangsa si mbelin. Ipasu-pasu Tuhan kalak si masu-masu Abraham ras isumpahi Tuhan kalak si numpahi ia. Tuhan erpadan maka IA masu-masu Abraham ras tetap engkawali ia ras kesusurena. Sunat me jadi tanda perjanjin e. Emaka kerina kesusuren Abraham arus isunat i bas umur 8 wari (bdk Kej.17:9-10). Ise si isunat maka ia enggo ikut i bas perpadanen e, ia ikawali i bas kerina musuh si ngerimrim. Adi la isunatken berarti la ikut i bas perpadanen e, la ndatken hak pengkawali Dibata, la ianggap kesusuren Abraham ras ipedarat i bas keluarga nari. Kalak si la isunatken terancam bahaya, la lit jaminen keselamatanen i bas Tuhan nari. Peraturen sunat pe arus ilakoken i bas jabu Musa. Tapi anak-anak Musa langa kepe isunat. Anak-anakna langa teriket ku bas perpadanen, langa ndatken jaminen keselamatanen. Anak-anak Musa lit i bas bahaya. Bagi si eteh maka 40 tahun ope si e, Musa pernah munuh kalak Mesir. Janah raja Mesir meteh pembunuchen si ilakoken Musa, idamina dalam guna munuh Musa. Erkiteken si e ia arus lompat ku Midian (Keluaren 2:12-16). Aminna pe ituriken maka kerina kalak si ersura-sura munuh Musa, subuk kalak Mesir bage pe Firaun enggo mate (Keluaren 4:19) tapi banci saja lit kalak ersura-sura encelakai Musa ras keluargana. E maka anak-anak Musa pe arus isunat si jadi tanda maka ia sekerajangen Tuhan, pilihan Tuhan lit i bas perlindungan Tuhan. La ituriken engkai maka la isunatken Musa anakna.

Tapi i bas mata Tuhan Musa la mediate, la iakapna penting sunat e. Erkiteken si e merawa Tuhan, rempet reh pinakit si mesangat si erbahanca ia narus mate. Untungna Sipora, ndeharana metenget i bas situasi e. Mis ibuatna batu si ntelap, isunatna anakna, jenari ikuitkenna alu jukut e (kulit khatan potongan sunat) ku nahe Musa, nina: "situhuna kam kap perbulungen dareh man bangku." Sipora me si nunatken anakna. Ikuikenna daging bekas sunat si jadi tanda maka Musa me sinunatken anakna e. Sabap i bas aturen sunat ilakoken bapa/dilaki. Arah peran ndeharana Sipora, Musa madan ras anakna pe selamat, janah anak-anakna jadi sekerajangen Tuhan. Tujun sidebanna pe, Musa selaku pemimpin Israel arus jadi teladan, la jadi batu antuken i bas kepeminpinenna i tengah-tengah Israel. Perbahanen Sipora selaku ndehara ras nande tuhu maba keselamatan man keluargana.

### **Pengkenaina.**

1. I bas geluhta pe banci jadi reh kiniseran man banta jadi persinget i bas Dibata nari gelah kita erdalan selaku anak-anak Dibata. E maka megermetlah nandangi kerina kejadi-kejadi i bas geluhta, amina pe mesera ula bene ukur, aminna pe la bagi ukur ula jungut-jungut gelah tangkas pengidahta nandangi sura-sura Dibata.
2. Biak la mediate e me bena kesalahen. Mungkin mulana iakap sederhana, perkara si kitik, tempa la lit dampakna tapi adi ndekah ipediat turah me masalah si mbelin. La mediate seri ras bom waktu, sekali paksa banci meledak. Misalna la mediate nandangi pasangenta entah anak-anakta, sekali dua kali tempa labo masalah tapi dungna jadi masalah. Pasangenta entah anak-anakta ndarami kalak sideban entah ingan sideban si mperdiateken ia. La si perdiateken kesehatenta dungna kita sakit. La kita mediate nandangi talentata, la si pake dungna bene me talenta e. La kita mediate nandangi dahin pelayanen dungna lanai kita merhat melayani Tuhan. La kita mediate nandangi kesusahen temanta dungna jadi kalak 'sase' me kita, kutera pe kalak je lanai si akap masalah. Bage pe adi la kita mediate man Dibata ras kataNa, si akap biasa-biasa dungna Dibata e pe si akap la penting. E maka perlu kal mediate, terlebih i bas njagai kebadian jabunta. I bas jaman canggih enda, reh buena kalak lanai erdiate. Umpamana, asik ras handphonena jine, seh maka lanai mediate nandangi sekelewetna. Arah Kata Dibata kita ipersingeti gelah ermediate, si jagai kebadian jabunta. Si usih

perbahanen Sipora nelamatkan keluarganya. Moria jadi pasu-pasu man  
keluarga alu mediate nandangi geluh jabunta, i bas:

- Kiniteken se-isi jabu. Entah lit anak-anakta entah perbulangen la  
nggit ku Gereja, ula si akap biasa-biasa, la masalah entah ninta reh  
nge pagi ukurna. Mpesemal si la mehuli maka e jadi kebiaken,  
mesera ngubahsa ras dungna maba cilaka.
- Kebadian se-isi jabunta, pergaulen anak-anakta, entah pasangenta  
arus si perdiateken. Dikune lit si la ngena ate Dibata ilakokenna ula  
pediat, mis si persingeti, sitotoken. Teptep paksa arus lit pertobatan  
i bas jabu-jabu.

### **Meditasi.**

Kenca enggo dung kita ngorati bahan PA-nta enda, si bengketi meditasi.  
Emaka o pe kebaktin enggo si sikapken, ingan meditasi alu mehuli, entah e  
i rumah, i Gereja entah bas ingan si deban. Ula mekarus. Sisikapken pe lilin,  
salib, musik, pulpen, entah bunga. Tentuken sekalak pemimpin meditasi, si  
enggo ersikap.

—————*paksa teneng*—————

Rende (KEE No 163) iulih (2x)

*Badia badia Tuhan si erkuasa, dem me doni enda salu kemulianNa.*

*Badia-badia Tuhan bala surge, Kam me Kap Bapa si ermulia.*

—————*paksa teneng*—————

-----*Engkuhi isi jabu alu kebadian Dibata*-----

Mari si inget kerina kegeluhen jabunta, entah lit perbebenta kerna anak-  
anakta, perbulangenta entah dirinta, si akap kita perlu iubah.....

Suratken kai perbeben e \_\_\_\_\_

Kai si erbahansa \_\_\_\_\_

Uga kam mperdiatekenca sedekah enda \_\_\_\_\_

\_\_\_\_\_

Kai atendu ilakokenndu/tekatndu tanda kam Moria si mediate \_\_\_\_\_

\_\_\_\_\_

Rende KEE 250 (2x)

*Jesus Tuhanku penalemenku, la lit gegehku, sampatilah aku*

*sampat aku Tuhan, sampat aku Tuhan,*

*sampat aku Tuhan sampat o... Bapa*


} 2x

Pertoton Mindo penampat  
Ertotolah kerna perbebenndu e, belasken kerina iadep-adepen Dibata  
----- *pertoton pribadi* -----

Rende KEE No 360 iendeken rikut perluna

*I bas Tuhan aku megegeh, Tuhan me kuyujiken, Tuhan me jadi gegehku  
I bas IA lit kesenangan, i bas IA lit kesenangan*

*Pdt. Sariyani Barus, M.Th*



**SI MAN OGEN** : Ulangen 6:4-9  
**T E M A** : MEREKEN PENGAJAREN I BAS  
KERINA PAKSA

**T U J U N** : Gelah Moria:

- Nuriken isi pengajaren kalak Israel man anak-anakna.
- Mbiasaken diri nehken kata ajar man anak-anak.

**METODE PA** : Ceramah "Parenting", Nonton Bareng

### **Kata Penaruh.**

Lit sada peribahasa Afrika "*It takes a Village to Raise a Child*" (iperluken sada kuta guna mpebelin-belin sekalak anak). Sekalak anak si tubuh ku doni enda *polos*, e maka perlu orangtua si erpemeteh ras erpengangkan alu mehuli uga mpebelin janah ngajarken anak alu payo. Pola asuh si tepat ras lingkungan geluh si mehuli mbelin kal ngaruhna i bas mpenelin-belin anak. Lit pengakap maka orangtua rulih i bas mpelin-belin anak adi anak e juara i bas sekolah, kuliah i bas universitas si terkenal, anak ndatken dahin i bas ingan si mejile. Tentu enda labo salah, tapi adi e siban ukuren orangtua, e rulih, piga nge ngenca si bage? Labo kerina anak ndatken juara 1, labo kerina anak kuliah i universitas favorit, janah kune la seh bagi si arapken

enda kerina, pas nge sikataken orangtua la rulih? Tentu lang, sabap seakatan pendidikan formal, anak-anak pe perlu ndatken pemete kerna kepentaren geluh arah Pustaka Si Badia.

### **Mpebagesi Pengangkan Kerna Ogen.**

Kalak Israel mulai ngajarken anak tupung anak e kitik-kitik denga. Sabap bage kin iperentahken Tuhan. "O Israel Ingetlah enda!" Bas bahasa Ibrani *Shema Yis'ra'el* "Begikenlah o Israel!" Nuriken maka perintah e penting, begiken janah dalanken alu dem kepatuhen. Shema enda bagin i bas pertoton si ianggap penting janah ibelasken dua kali sada wari. Si perlu ibegiken e me Tuhan si sada e kap ngenca Dibata, ngkelengi Tuhan Dibata asa ukur, tendi, gegeh lit, jenari patuh ras ngajarken Kata Dibata e man anak-anak i bas kerina paksa. Perlu kal iperdiateken kerna Tuhan si njadikan langit ras doni, IA ngenca, la lit si deban gia i bas paksa e bangsa-bangsa si deban nembah man berhala-berhalana. Kalak Israel njadikan Tuhan pusat pendidikan anak mulai kitik-kitik nari, emaka rumahna labo ngenca ipake guna ingan tading tapi pe ingan erlajar Undang-undang Dibata. Buku utama anak-anak Israel e me Taurat (Kitab Suci) guna jadi gelemen ras pelajaran kerna Dibata janah enda nggo jadi kegiaten teptep wari. Tanggungjabap orangtua kalak Israel labo terjeng ncukupi keperluan geluh tapi si utamana e me tanggungjabap rohani. Selain ngajari anak-anak i rumah, arus pe naruhkan anak-anakna ku Sinagoge guna erlajar ras guru-guru ntah ahli-ahli Taurat. Pendidikan me si perluna kal bas kalak Israel, e maka kerina dampar kegeluhen ibahanna jadi ingan erlajar man anak si nguda gelah seh paksana banci mereken ngaruh si mbelin bas kegeluhenna.

Orangtua Israel arus ndalanken tanggungjabap enda gelah anak-anak banci nandai, ersembah ras patuh man Tuhan Dibata saja. Tanggungjabap enda idalanken gelah kalak Israel selaku bangsa pilihan Dibata arus patuh ndalanken aturen Dibata. Jadi lit sada tanggungjabap si mbelin teptep kalak Israel kususna orangtua e me guna njagai sada bangsa.

### **Pengkenaina.**

Amy Chua bas bukuna *Battle Hymn of The Tiger Mother* ngatakan "*Banyak Ibu Asia mendidik anak-anak mereka dengan tangan besi, menerapkan disiplin dan tuntutan akademik kepada anak-anaknya.*" E maka megati nge si idah adi les banci melala iikuti anak-anak tapi adi ku Gereja ntah PA

ndekahsa akapna. Seh maka melala anak-anak si pintar tapi la pentar sabap fokusna bas pendidikan secara formal saja.

Tanggungjabapta selaku orangtua e me ncukupken keperluan jasmani ras rohani anak-anakta. Lit deba orangtua erpengakap maka adi kerna Kata Dibata kari pe banci denga. Arusna kitik-kitik nari anak enggo ibabai erlajar Kata Dibata bagi ikataken i bas Kuan-kuanen 22:6 "Ajarkenlah man anak uga kearusen nggeluh, maka ikutkenna asa umurna nggeluh." Anak e me pemere Dibata simbelinna bas geluhta jadi patut min sibabai nandai Dibata janah ibahanna Dibata jadi ulu geluhna. Jenari tetap erkemalangen man baNa saja.

1. Jadiken jabunta ingan mpebelin-belin anak subuk kula ras kinitekenna, rumahta pe ingan erlajar kerna Kata Dibata.
2. Bahan waktu kusus man se-isi jabunta guna pulung ras-ras, ercakup-cakup kerna kegiatenta bas sada wari janah sempatkan pe ercakup-cakup kerna Kata Dibata.
3. Ngajari anak tetap jadi tanggungjabapta, amin gia anak-anak ikut sekolah minggu, PA ras sidebanna, orangtua tetap si ertanggungjabap i bas perkembangan kiniteken anak.
4. Orangtua pe arus erlajar kerna Kata Dibata gelah banci mereken pengajaren ras teladan si banci iikuti anak-anakta. Bagi nina Jhon Stott *"Pada dasarnya iman tidak bisa diwarisi oleh seseorang ke seseorang. Iman diwariskan melalui asuhan, teladan dan doa. Seseorang dapat membimbing yang lain kepada iman akan Allah."* I je me perlu pola asuh si erpalasken Kata Dibata. Anak-anak erkiniteken arah ngidah kerina dampak geluhta si mabai ia guna nandai Dibata.

### **Metode PA: Nonton bareng**

Kenca nonton iterusken ku sharing (*uga pengalamen ngajarken anak*)

[https://youtu.be/wqqL2bhLd0M?si=s2SU7bBwXA7OK\\_vp](https://youtu.be/wqqL2bhLd0M?si=s2SU7bBwXA7OK_vp)

*Pdt. Enda Ulin br Tarigan*



**SI MAN OGEN** : Kuan-kuanen 5:1-14  
**T E M A** : NEHKEN PERSINGET KERNA LAGU LANGKAH SI PAYO

**T U J U N** : Gelah Moria:

- Nuriken isi pengajaren Raja Salomo man anak singuda kerna lagu langkah si payo.
- Ngajarken pendidikan seksualitas man anak-anak rikutken umurna.

**METODE PA** : Role Play

### **Kata Penaruh.**

Ercakap kerna seksualitas ertina ngerana kerna pemere Dibata si mbelin sabap seksualitas e pemere Dibata kap. Tuhu, i bas masyarakat Karo, enterem denga si tabu encakapkan seksualitas i tengah-tengah jabu, apai ka ngajarkensa man anak-anak. Situhuna pendidikan seksualitas enda penting kal ieteh anak-anak mulai kitik nari gelah la celus ku bas dampak penyimpangan seks janah bengket ku bas seks bebas. Bas era post-modern enda, enterem anak-anak enggo salah pergaulen janah la ngasup nguasai seks si lit i bas ia erkiteken lenga ididik kerna pengangkan seksualitas si mehuli, e maka masalah *Lesbian*: perempuan-perempuan, *Gay*: pria-pria, *Biseksual*: semua jenis kelamin ras *Transgender*: ngubah jenis kelamin (LGBT) enggo tempa-tempa biasa i sekelewetta. Perlu si eteh maka seks e

iperluken guna proses reproduksi njagai keberlangsungan peradaben manusia i doni, bagi si iperintahken Dibata guna nguasai doni enda (Kejadin 1:28). *Seksualitas itu baik jika dijalankan seturut dengan Firman Tuhan dan akan menjadi menyimpang jika dilakukan dan dipahami dengan cara yang bebas dan salah.* E maka penting kal erlajar kerna uga kin cara ngajarken anak-anakta kerna pendidiken seksulitas, gelah anak-anakta ngangakai tanggungjabapna guna nguasai seks si lit bas ia janah makeken seksualitas sentudu ras perintah Dibata.

### **Mpebagesi Pengangkan Kerna Ogen.**

Kuan-kuanen isina e me hikmat ras kata persinget kerna orat nggeluh. Bahan ogenta e me kata persinget si ipeseh sekalak bapa (orang yang lebih tua) nandangi anakna (seseorang yang lebih muda). Kata persinget enda erguna gelah anak si nguda denga tetap ncikep paguh kinitekenna gelah la ndabuh ku bas pengajuk doni si la mehuli. Kalak nguda lenga melala pengalamenna kerna kegeluhen doni si dem tantangan. Salah sada e me sura-sura daging kususna napsu seksual antara dilaki ras diberu. Kalak si nguda biasana lenga ngasup nguasai sura-sura daging ras ertanggungjabap njagai kebadian kulana.

Oragtua ertanggungjabap tetap mpersingeti anak si nguda gelah la erteman-teman ras diberu si la mehuli lagu langkahna (perempuan jalang), sabap tuhu manis pengeranana tapi kenca si e pagit tindingna. Antusenna, meriah tuhu erteman ras diberu si jahat, dat kesenangan doni tapi kenca si e turah me rawa ras nembah ate Dibata, erkiteken kai si bahan e la ngena ateNa. Adi erteman ras diberu si jahat ulihna e me bene kemuliannu (ayat 9), kinibayaken keru (ayat 10), turah pinakit ( ayat 12), janah kemalun bas jelma si enterem (ayat 13). La lit sada pe keriahen si dat i bas ertemen ras diberu si gutul. Kitab kuan-kuanen ngidah diberu erkiteken tujun kata e me dilaki. Tapi perlu si idah maka duana jenis kelamin dilaki ras diberu arus ijagai. Man anak si diberu pe metengetlah nandangi dilaki penaki-naki, sinidingi anak diberu guna nehi sura-surana. Lit senna nukur ras mereken kemewahen si erbahanca ngikut anak si diberu e, iberekenna dirina. Kata persinget enda ngajuk anak si nguda gelah ula nggit ikuasai sura-sura dagingna si banci mbeneken ia. Lawanlah, alu tetap erlagu langkah si payo (ayat 2) bagi si ngena ate Dibata. Pengajaren guna nguasai diri enda penting kal man anak-anakta si nguda, gelah ertanggungjabap ia njagai

kebadian kulana janah beluh ia ngantusi apai si mehuli ras si la mehuli kerna pergaulen ras pertemanenna.

### **Pengkenaina.**

Mpeseh pendidikan seksualitas man anak-anak tentu labo sada dahin si mesunah, apaika man anakta si nguda denga/di bawah umur. Arah tabel enda banci nampati kita guna ngajarken pendidikan seksualitas rikutkan umur anak.

No	Umur Anak	Pendidikan Seksual	Metodena
1	0-5 tahun	Mpetandaken bagin-bagin kula man anak rikut ras ngerawatsa	Main boneka ras anak janah nggelari bagin kula si ituduhkan. Ngerawat kula alu rusur cuci tan.
2	5-10 tahun	Meteh bedana kula dilaki ras diberu	Mpetendaken kula si terbuni mulai bas bara nari seh ku takal tiwen
3	10-15 tahun	Kerana batas pertemanen ras pubertas	Nemani anak ras mereken pengangan kerna perkembangan fisik anak
4	15 tahun keatas	Mereken penjelasan kerna tanggungjawab seksual ras ngasup nguasai diri	Nuriken kai saja si banci ilakoken i bas pertemanen. Tetap min anak njaga kebadian kulana.

Kerina kita iajuk gelah mereken pendidikan seks e man anak-anakta. Ula si akap mereha, sabap pendidikan si mendasar ibenaken i bas jabu nari. Selaku nande, perlu kal si pergermetken si jadi genduari enda, enggo melala penyimpangan seksual i bas anak-anak si nguda. *Mencegah lebih baik daripada mengobati.* Di kune lit anakta ntah pe anak si lit i sekelewetta, si enggo terjerumus ras enggo terlanjur masuk ku bas lingkaran penyimpangan seks (dilaki bagi biak diberu ras sebaliknya, kecanduan porno, seks bebas, terjangkau HIV, korban pelecehan ras sidebanna), tetap ngenda tugasta notoken, ngajarken ras mperdiateken anakta e, sabap masa-masa si bage, anakta e perlu kal pendampingen nande. Ula pediat anakta si sada mbaba baban, tetap cidahkan kinitekenta ras keleng ateta, segelah ku lebe wari enda Tuhan Jesus si pepalem anakta.

## **Role Play (Bermain Peran) Ras Aksi.**

Asa bancina kordinasi ras guru KAKR gelah ipraktekken Moria man anak-anakna.

Pilih piga-piga Moria jadi anak umur 0-5 tahun, 5-10 tahun, 10-15 tahun ras 15 tahun ku datas, bage pe 4 Moria si deban jadi nande teptep anak. Cuba praktekken cara ngajar pendidikan seksualitas anak sue ras pengarahen si lit i bas tabelta.

*Pdt Meri Susunenta Br Ginting S.Th*



**SI MAN OGEN** : Rut 4:13-16

**T E M A** : MABA KERIAHEN MAN SANGKEP  
NGGELUH

**T U J U N** : Gelah Moria:

- Nuriken perbahanen Rut nandangi sangkep geluhna.
- Nuriken perbahanen si maba keriahen man sangkep geluh.

**METODE PA** : Menginventarisir perbahanen si mehuli.

### **Kata Penaruh.**

Dibata ndilo kalak si erkiniteken man baNa gelah jadi sira ras terang i bas kegeluhenna. Kegeluhena kalak si nggo erkiniteken man Dibata arus mabai kalak si deban guna reh ngasupna ngidah keleng ate Dibata arah cara nggeluh si ernanam. Salah sada cara nggeluh si ernanam e me maba keriahen ukur i bas dahin-dahin silakoken kita. Arah PA-nta wari enda, erlajar kita guna ngidah cara nggeluh Rut si maba keriahen ukur man sangkep geluh kususna bibina si nggo mbalu. Erpengarapen kita maka perbahanen-perbahanen Rut, jadi sada usihen gelah ngasup kita jadi sira ras terang i bas hubungenna ras sangkep geluhta. Alu bage kehadirenta tuhu-tuhu maba keriahen ukur.

## **Mpebagesi Pengangkan Kerna Ogen.**

Secara historis, kitab Rut e me turi-turin kerna erbage-bage kejadi i bas sada keluarga Israel i bas masa para Hakim (Rut 1:1). Kitab enda ibahan posisina kenca Kitab Hakim-Hakim guna ncidahkan terang kemulian Tuhan i bas masa kegeluhen para hakim si gelap. Ia kalak Israel nggeluh i bas kondisi si la ngena ate Tuhan. Kegeluhen moral ras kinatekenna merosot. Bangsa enda ngelakoken kai si payo akapna saja erkiteken lenga lit raja i tengah-tengahna (Hak. 21:25). I bas kondisi enda me, kitab Rut isuratken. Si ncidahkan maka Dibata tetap mpekena-kena kegeluhen kalak si setia man baNa. Dibata la pernah ngadi guna mpekena-kena bangsaNa amin gia melala perbeben si arus ialaken.

Secara geografis, kitab enda banci ibagi ku bas empat wilayah ntah daerah. Si pemena, daerah Moab (1:1-18). Si peduaken, tanah lapang i Betlehem (1:19-2:23). Si peteluken e me ingan pengeriken gandum i Betlehem (3:1-18). Si peempatkan, Kota Betlehem (4:1-22). Kata Dibata si jadi bahan PA-nta enda jadi i daerah si peempatkan e me Kota Betlehem. Kenca Boas ndungi perarihenna i deher kerabangen kuta ras biak senina Elimelek, ibuat Boas me Rut jadi ndeharana. I pasu-pasu Tuhan me perjabun si Boas ras Rut seh maka mehuli kula ndeharana, jenari ipupusna me anak dilaki. Pupus Boas enda tetap imasukken ku bas daftar kempu Naomi sabap Boas ngempoi Rut gelah banci taneh ntah pe erta tading-tadingen keluarga Elimelek la bene dengen gelar keluarga Elimelek pe la masap i tengah-tengah bangsa ras kutana nari (Rut. 3:10). I bas tradisi kalak Jahudi, perjabun enda igelari *Perjabun Levirat (perkawinan dengan saudara ipar untuk meneruskan keturunan dari orang yang sudah meninggal)*. Ketubuhen kempu dilaki enda jadi keriahen si mbelin man Naomi janah e me si erbahansa diberu-diberu si lit i kuta Naomi nehken puji-pujin man Tuhan si jadi tanda keriahen ukurna. Keluarga Elimelek menam masap tapi Rut arah perjabunna ras Boas erbahansa garis keturunan Elimelek la sahun bene. Erkiteken kempu dilaki me gelar kalak si nggo mate ipekeke mulihi. Dibata nelamatkan diberu balu-balu bage pe njagai tading-tadingen Naomi alu ketubuhen sekalak anak dilaki arah Rut.

Rut la saja nerusken garis keturunan Elimelek tapi ia pe sekalak permain si tuhu-tuhu nggit nehken keleng ate man Naomi amin gia perbulangenna enggo mate. Keleng ate Rut e igambarken alu keleng ate si lebih asangkan keleng ate pitu anak dilaki. I bas tradisi Jahudi, la lit garis keturunan si

terdeheren asangkan garis keturunan antara orangtua ras anak. Arah anak nari me orangtua situhuna banci nuntut kepatuhen, kesetian dingen cara nggeluh si mehamat man orangtua. Tapi Rut, ngelebihi iketen arah garis keturunan si alamiah enda. Ia labo anak Naomi tapi kepatuhen, kesetian dingen kehamatenna ndauh ngelebihi anak diberu si apai pe. I bas tradisi Pustaka Si Badia, angka pitu biasa ipake guna nuduhkan kesempurnan rohani. Rut ikatakén lebih asa si e, diberu-diberu i bas kuta e meteh dingén ngidah uga perbahanen Rut nandangi bibina Naomi. Keleng ate Rut tuhu-tuhu mbelin janah jadi sada keriahén i tengah-tengah kegeluhen Naomi ras manusia. Adi si oge terdauhen, isuratken i bas pustakanta maka anak dilaki si ipupus Rut e, e me Obet. Obet enda me bapa Isai janah Isai e me bapa Raja Daud (Rut. 4:17).

### **Pengkenaina.**

I bas pengangkan si sempit, sangkep geluh e me sistem kekerabatan kalak Karo si ngiket teptep jelma jadi keluarga si ibuat erpalasken garis keturunan arah bapa ras nande. I bas pengangkan sideban, sangkep geluh e me hubungan ntah pe jaringan si ibangun erpalaken azas keturunan, perjabun ntah pe interaksi sosial. Sangkep geluh enda me singkuhi kegeluhen sekalak jelma i bas kerina situasi kegeluhenna subuk i bas dahin-dahin meriah ukur ntah pe ceda ate. Alu sederhana sangkep geluh i bas kalak Karo e me Kalimbubu, Sembuyak, ras Anak Beru.

Pengogenta wari enda mabai kita gelah ngasup ngusih Rut guna maba keriahén ukur man sangkep geluh. Keriahén ukur si baba Rut e teridah i bas dua dampar e me mereken kempu dilaki man bibina Naomi seh maka gelar keluarga Elimelek la bene i kutana. Si peduaken, Rut ncidahken keleng ate si ngelebihi pitu anak dilaki nandangi bibina si nggo mbalu. Rut banci saja muat pilihan bagi cimbangna Orpa erkiteken lanai bo lit si man arapén i bas kegeluhen Naomi. Tapi ibahanna sada keputusan maka tetap atena ras bibina janah nehken keleng ate man bana i bas kerina situasi. Kehadiren sekalak Moria i tengah-tengah sangkep geluhna pe arusna min maba keriahén ukur. Ula min sempat kenca kita hadir i bas keluarga perbulangenta, lanai siangkan perbulangenta ras senina bage pe turangna. Erkiteken perbahanenta, kitik ukur simetuantu dingén tambah pinakitna. Terdauhen, perlu kal seri pengidahna nandangi sangkep geluhta ras sangkep

geluh perbulangenta. Ula min kita rayo-ayo sabap kerina e labo maba keriahen ukur dingin kemalemen ate.

### Menginventarisir Perbahenen Si Mehuli Man Sangkep Geluh.

No	Perbahenen si mehuli si ilakoken Rut erpalasken teks	Perbahenen si mehuli man sangkep geluh si nggo ibahanndu	Perbahenen si mehuli man sangkep geluh si atendu ibahanndu
1			
2			
3			
4			

*Pdt. Wesley Pinem*



**Minggu,  
28 Juli – 03  
Agustus  
2024**

*Jadi pasu-pasu  
man unit GBKP*

**SI MAN OGEN** : Jakub 2:1-5

**TEMA** : BAYAK I BAS KINITEKEN

**TUJUN** : Gelah Moria:

- Nuriken orat nggeluh kalak si bayak i bas kiniteken.
- Erbahan terpuk perbahenen si rayo-rayo ras si la rayo-ayo.

**METODE PA** : Aksi (nampati unit pelayanan GBKP)

### Kata Penaruh.

I doni enda, nterem kal jelma merhat jadi kalak banyak. Adi ibandingken nta teremen nge jelma merhat jadi kalak bayak asangken jadi kalak musil. Tapi jadi kalak bayak labo menukah, pala bayak kin ia mulai tubuhna nari (bayak namura nande-bapana). E maka kalak si merhat bayak arus rusaha, erbintuas suari berngi, nambahi pendahin sampingen, hemat (ngurangi pengeluaran), rajin nabung, investasi, ngembangken karier ras sidebanna. Umumna, merincuh kalak bayak segelah kerina keperlun geluh tercukupi, lit jaminen kesehaten, banci nukur kai kita merhat, banci nampati keluarga, lit jaminen hari tua, lit si man warisenken man anak kempu ras sidebanna. Secara kusus, kedudukan sosialna pe meganjang, iergaken ras ihamati jelma

si nterem. Perbahanen si isehken man bana pe la seri ras man kalak sideban. Enda me gelarna 'rayo-ayo.' Tapi labo ngena ate Dibata rayo-ayo. Penungkenen, nembah nge ate Dibata adi erteman kita ras kalak bayak? Salahkin adi jadi kalak bayak? Uga nge sipasna? Mari gargagari Pustaka Si Badia erpalasken Jakob 2:1-5.

### **Mpebagesi Pengangkan Kerna Ogen.**

Ula rayo-rayo'. Enda me si jadi judul perikop ogenta. Surat e itulis Jakob senina Jesus. I kirimkenna man kerina anak-anak Dibata si merap i taneh perlanjangan. Isi surat e kerna pengajaren gelahna kerina anak-anak Dibata, nadingken kegeluhen si la payo, bage pe rayo-rayo. Uga kin ikataken rayo-rayo? *Bagi isuratken i bas ogen PA-nta enda ayat 2-4, sura-sura si la mehuli.* Pelin-pelin je kerna perbedan sosial. Sada kalak bayak, sada nari kalak musil. Labo erkiteken sada temanna, sada nari imbangna. Ntah pe, sada keluargana, sada nari kalak pertandang. Tapi erkiteken sada make cincin emas, ruisen uis mejile; sada nari uisna pe merigat-rigat. Sikap enda jelas rayo-ayo. I bas cakap Junani, ipake kata *prosopolepsia*, si ertina iperdiateken kal kalak si status sosialna mejile, bayak, erpangkat entah erjabaten. Biak enda la ngena ate Dibata. Biak rayo-ayo enda encedai kiniteken sabap manusia enggo jadi hakim man temanna. Perbahanen si rayo-ayo ncedai pusuh teman. Perbahanen si bage enggo pasti lit tujunna, banci gelah ndatken untung i bas kalak bayak e nari, ntah lit sura-sura man bana, ntah gelah ikut jadi golongenna, ntah mbiar man bana ras sidebanna. Kerina enda labo sura-sura si mehuli, la lit i je keadilan. Lenga lit jaminen maka sikapen kari perbahanen kalak bayak enda asangken si iban kalak musil. Banci jadi sebalikna. I bas ayat 5 ituriken maka, kalak musil i doni enda ipilih Dibata gelah jadi bayak ia i bas kiniteken. Ia me pagi dat bagin ngenanami kemalemen ate i bas kinirajan si ipadanken Dibata man kalak si erkeleng ate man baNa. Kuga maka bage? Erkiteken kalak musil i bas kerina kiniperlun geluhna, si mesera akapna ndatkensa, ipindona alu tutus ate man Dibata. Iarapkenna kal perkuah ate, penampat ras keleng Dibata. Ku je ngenca ia erpengendes. Ola pedah lebe man kalak bayak, man kalak sideban pe rusur ia la iperdiateken, rayo-rayo kalak e man bana. Tangkas si perlu man sampaten e me kalak musil, labo kalak bayak. Kalak bayak baginna nampati kalak musil erkiteken lit bas ia. Tapi la bage si jadi. Adi iterusken ku ayat 6, kalak bayak nge si ndedeh si rayo-ayo e. Ia nge si

ngadukensa ku pengadilen gelah iukum. E maka jelas kal biak rayo-ayo enda erdosa ras ngerugiken dirina jine.

## **Pengkenaina.**

Tema PA-ta sendah e me *“Bayak i bas Kiniteken.”* Arah e iajuk kita jadi kalak bayak tapi bayak i bas kiniteken. Kai kin bayak i bas kiniteken e? Kai kin bedana ras bayak i bas erta doni? Bedana jenis erta si ipepulung ras ingan nusun erta e. Adi bayak doni, jenis erta si man pepulungen e me: sen, emas, tapak, saham, usaha, kendaraan mewah ras sidebanna, janah ingan nusunsa pe i doni ngenca, banci masap. Adi bayak kiniteken, jenis ertana e me: erkemalangen man Dibata ras ndalanken pedahNa alu nampati kalak si deban, nggeluh bujur, adil, jujur, la rayo-ayo ras sidebanna, janah ingan nusunsa pe i surga (ingan rasa lalap). Kalak si bayak i bas kiniteken banci makeken kinibayaken doni enda guna kiniulin doni ras jelma si nterem. Misalna, nampati kalak si mberat baban geluhna, nampati anak melumang, engkelengi orangtua jompo, ras sidebanna. Enda me si sedekah enda ilakoken Moria GBKP. Teptep tahun Moria numpak-numpak pelayanen GBKP kususna piga-piga Unit Pelayanen GBKP, YKPD Alpa-Omega, YAK Gelora Kasih, ras PPOS. Tentu enggo si eteh, maka teluna unit pelayanen GBKP enda lit i bas pelayanen diakonia. Alpha-Omega ngelai anak-anakta si berkebutuhan kusus (disabilitas), Gelora Kasih ngelai anak-anakta si la lit nande bapana (melumang), bagepe PPOS ngelai orangtuanta si enggo metua (jompo). Em sabapna Moria GBKP erbahan anggaren dana pelayanen man teluna unit enda. La pe ituriken sada persada, maka pelayanen kasih Moria belang-belang GBKP enda enggo tergejap. Labo wilayah pusat ngenca, tapi i Klasis, Runggun, Sektor, bage pe secara personal. Benaken tahun 2022 Moria Pusat ras Moria Klasis enggo erbahan jadwal pelayanen erdakan guna anak-anak i Alpha Omega. Teridah tuhu keriahen ukur Moria-moria baga pe anak-anakta bas kerehen Moria e. Moria Klasis Jakarta Banten (MKJB) ras Moria Klasis Jakarta Kalimantan, enggo erbahan gerakan sukarela 10 ribu per Moria per bulan guna nampati pandita-panditanta si i daerah terpencil seh asa gundari. Pelayanen enda tentu mereken kemalemen ate man panditanta. Tentu labo soal nominalna, tapi keleng ate e seh man bana kerina. Lenga ka *‘sister klasis’* ras jenis-jenis pelayanen sidebanna. Enda me garansi Moria GBKP la lit rayo-ayo. Labo lit Moria GBKP si pilih kasih i bas mereken penampat. Berekenna nge si man sampaten,

labo erkiteken kade-kadena, temanna meriah apaika lit tujun sideban. Mari si buat baginta nehken kekelengen ula rayo-ayo nandangi YKPD Alpa Omega, PAK Gelora Kasih ras PPOS.

**Aksi.**

Programkenlah (anggarken, jadwalken, daftarken si ikut) sada pelayanen kasih si nyata si banci silakoken i bas bulan enda (banci i bas Natal) man teluna Unit Pelayanen GBKP enda (YKPD Alpa Omega, PAK Gelora Kasih ras PPOS).

*Pdt. S. Jonathan Meliala, M.Th*

*“Ingatlah, Satu Perbuatan Kecil Yang Nyata,  
Lebih Baik Dari 1000 Ucapan ”*



**SI MAN OGEN** : Roma 10:14-15  
**T E M A** : JADI PASU - PASU ARAH  
TEHNOLOGI  
**T U J U N** : Gelah Moria:  
• Nuriken kiniulin kalak si maba Berita Si Meriah  
• Makeken tehnologi guna er-Berita Si Meriah alu pentar.  
**METODE PA** : Diskusi ras Aksi

**Kata Penaruh.**

Kita gundari nggeluh bas era IT (information tecnology) si seh majun. Kenca litna internet reh nukahna kita ndatken ras nehken informasi. Adi gelgel arus pake surat, banci erwari-wari maka seh tapi genduari kenca lit internet, umpanana: arah watsApp nggo banci berita seh i bas waktu 1 menit. Mbelin perubahren si jadi paksa covid-19 tapi melala ka kita isampati IT enda. Enggo banci kita ibadah rumah nari subuk pake youtube bage pe 'zoom meeting.' Tapi bas kemajun si lit megati ka la terkuasai kita. Lit deba IT lanai maba pasu-pasu sabap nggo informasi si labo payo iberikateken benar beredar (*hoax*). Maka bas bahanta wari enda ibabai kita guna ngidah pentingna IT i bas salah sada dahinta selaku kalak si tek e me pembarken Berita Si Meriah.

## **Mpebagesi Pengangkan Kerna Ogen.**

Bahan PA-nta bas kitab Terjemahan Baru LAI si berbahasa Indonesia ibere judul 'kebenaran' erkiteken teks sope bahan PA-nta leben nuriken kerna karya keselamatan si nggo ilakoken Jesus ulu penggenepen hukum Taurat. Erkiteken si e kerina kalak si tek man Jesus pasti iselamatkan. Lanai lit obahna kalak Jahudi ras Junani asal tek ia man Jesus pasti lit keselamatan man bana. Si jadi persoalen uga kalak banci iselamatkan adi la tek man Jesus? Uga ia tek man Jesus adi la enggo pernah ibegikenna? Uga banci ibegina adi la enggo lit mberitakenca? Maka, proses pemberitan kerna Jesus penting. Segedang geluhNa Jesus erdahin sekelewet Israel (Betlehem, Galilea). Tapi kitab Roma isuratken man perpulungen Roma kelang-kelang tahun 56-57 SM. Silang-langna lit 15-20 tahun jarak Jesus ras surat enda. I bas jarak enda tentu labo kerina kal kalak si enggo tek man Jesus pernah langsung ngidah Jesus. Turahna kekristenen i Roma la lepas arah orat geluh kalak Kristen si erbanca merincuh kalak si enterem bengket ku perpulungen Kristen. Arah ia bengket ku perpulungen e dungna turah kiniteken.

Syarat pembarken Kata Dibata kerna Jesus si erbanca kalak tek e me i bas proses pembarken Kata e. Kata pembarken ibuat i bas bahasa Junani *keryssontos* si banci iertiken 'untuk memberitakan, berkhotbah, memberitakan kebenaran ilahi'. Ertina Paulus ngingetken perpulungen i Roma maka proses pemberitan Kata Dibata seh kal pentingna gelah banci itandaina Dibata. Terdauhen Paulus ngingetken maka dahin pembarken Berita Si Meriah jadi sada kewajiben. E maka man Paulus, kerina kalak arus iutus guna jadi per-Berita Si Meriah. I bas teks enda kata perberita ipake kata *apostolosin* arah kata *apostolos* si banci iertiken utusen (kalak si iutus). I bas konteks gereja kata *apostolos* enda usur ipake man rasul-rasul. Ertina, kerina kalak si tek man Jesus situhuna lit pungsi rasul i bas dirina. Pungsi e teridah i bas kengasupenna ersaksi kerna Jesus Kristus. Kesaksinna e me si erbanca kalak nandai Jesus dingen tek man baNa.

Seh riahna kerehen kalak si maba Berita Si Meriah e. Kata enda tentu mbages kal maknana, ertina bage me nanam kerehen per-Berita Si Meriah e. I ja pe ia reh maba kemalemen ate, engkai maka bage? Tentu labo erkiteken dirina tapi erkiteken berita si iturikenna e tuhu-tuhu maba kemalemen ate. Bas kalak si enterem megiken berita e jumpa ia ras Dibata.

Bas perjumpanna e tambah kinitekenna man Jesus ras e me keriahen si tahu-tuhu bas tambahna kalak si tek nandangi Jesus.

### **Pengkenaina.**

I bas perkembangan dunia IT tentu melala keuntungan si enggo sidatken. Tapi arah bahanta wari enda lit piga-piga si arus si inget i bas kita make pasilitas IT. IT banci jadi perkakasta guna mpetandaken Jesus. Silanglangna lit dua cara si jelas banci silakoken. *Sipemena* arah makeken media IT guna erbagi Kata Dibata. Lit si idah kalak enggo usur bagikenna renungen bage pe status FB, WA si mereken kata Dibata. Tentu enda pe mehuli kal ilakoken. *Sipeduken* tentu isi statusta. Adi kita ka pengurus Moria tapi isi statusta numpahi kalak, ngisakken kalak, janah nuriken si la payo tentu melukah kal ihubungken status FB-nta ras status kinitekenna. Jadiken status e jadi pasu-pasu si erbanca kalak pe tambah kinitekenna. Kalak si tek me saksi kerna Kristus. Saksi si payo teridah adi statusta sendalanan ras caranta ngeluh. Saksi Kristus arus ncidahkan maka kegeluhenna sue ras status i bas FB-na. Ula kari sebalikna. Bas FB tempa kita si mehulina tapi nen bas kegeluhen nyata seh kal dauhna arah biak ras perbahanen si mehuli. Adi bage kita saksi palsu gelarna. Adi saksi si asli, i ja pe seri. *Sipeteluken* ban kita saksi Kristus maka pemaken media IT jadi saranata guna petandaken Dibata man kalak si enterem. Pemaken IT nambahi kiniulin min subuk man banta bage pe sekelewetta. Lit ka gundari pinakit gelarna *oversharing*. Nggo kita kena pinakit enda adi lanai kita ngasup nirangi sosial media, kerina ateta si peseh bas sosial media. Mulai kai gulenta, kai merek sabunta bage pe warna kai jarak-jarokta. Enda la ngenca terjeng candu tapi banci jadi lanai maba keriahen. Maka perlu ban balengna asa perluna saja. Situhuna, temanta e me si tading i bas doni enda si banci kita petala-tala, si banci radu ras kita tawa, ermeriah ukur. Ula kari sanga er-PA pe dekahen kita ngenen hp asangken ngenen ayo temanta. Mari bijak bersosial media. Pake sosial medianta jadi pasu-pasu.

### **Diskusi Ras Aksi:**

1. Uga carana gelah caranta bersosial media banci erbanca kalak nandai Jesus Kristus? Kawitken ras ogenta Roma 10:15 "seh kal tahu ulina kerehen kalak si maba Berita Si Mehuli e."

2. Mari si update statusta (banci FB/WhatsApp) si berisi kata-kata si mere pasu-pasu. Banci ibuat arah teks Alkitab. Ope ishare, mehuli adi kerina ngogeken kai status si atena ibanna jadi status FB ntah WhatsApp.

*Pdt. Jepri Alexander Keliat M.Fil*



**SI MAN OGEN :** Ulangen 16:18-20

**T E M A :** JADI PASU-PASU MAN MASYARAKAT

**T U J U N :** Gelah Moria:

- Niksiki sukat-sukat peminpin si ngena ate Tuhan.
- Makeken sukat-sukat si ngena ate Tuhan i bas milih peminpin.

**METODE PA :** Diskusi

### **Kata Penaruh.**

Pemilihan Kepala Daerah (Pilkada) e me perintah konstitusi i bas kerangka kedaulaten rakyat. I bas kesempatan si mehuli e: "Jemaat GBKP arus ngasup encibalken sura-surana man kalak si tepat." Soranta tuhu-tuhu meherga, ikut nentukan kegeluhen bangsa si nterem enda. Ertina kita arus milih alu megermet nandangi kerina calon si pantas, si nggit ras ngasup mperjuangkan aspirasi rakyat ras erjuang guna keutuhan NKRI.

Pilkada guna milih gubernur, bupati ras wali kota ilakoken serentak i belang-belang Indonesia i bas tanggal 27 Nopember 2024. I bas ndalanken pilihan

enda tentuna ngawan GBKP arus megermet sabap sidalankenna e, e me persuruhen Tuhan. Tuhan make ngawan perpulungen milih persuruhenNa lako erdahin jadi pemerintah guna ngepkep masyarakat si rulo enda.

### **Mpebagesi Pengangkan Kerna Teks.**

Kitab Ulangen isina e me kotbah-kotbah Musa erpalasken kata si nipeseh Dibata man bana. Tujunna e me nikapken angkaten si nguda bangsa Israel si kentisik nari bengket ku Tanah Kanaan. Isi kotbah Musa e me jadi palas dengen penjemba guna ngaloken Tanah Kanaan si ijanjiken. Ipersingeti Musa gelah bangsa e ula pernah lupa nandangi Dibata si enggo ngelakoken perbahanen si mbelin. Kerina kotbah Musa si isehkenna i deleng Sinai bage pe negeri Moap ilakoken bangsa Israel kenca ia ringan i tanah Kanaan.

Ulangen 16:18-20 e me bagin Ulangen 16:18-18:22 si isina erbage perintah kerna pemimpin-pemimpin. Pedah Musa kempak bangsa Israel gelah iangkatna hakim-hakim ras pegawai-pegawai i bas teptep kuta. Dahinna e me ngaturken kalak Israel gelah tetap patuh kempak Dibata. Tapi di kune la patuh ia ka me jadi persuruhen Dibata nehken ukumen. Niarapken segelah hakim-hakim ras pegawai-pegawai ngerunggui rayatna alu payo. Sabap lit kang paksana hakim-hakim ras pegawai-pegawai ngelakoken runggu lako nehken ukumen kempak bangsa Israel.

Syarat-syarat si jadi hakim-hakim ras pegawai-pegawai e me:

1. Bujur dengen rembang tengah carana ngadili.
2. La banci ngaloken sogok, sabap pemere erbahanca pentang mata, aminna pe ia kalak pentar dengen kalak bujur, janah e erbahanca ia erbahan keputusan si salah (sogok: ngaloken duit ntah pe materi si deban i bas kalak si erperkara lako nehi sura-surana umpamana ukumenna ipenahangi ntah pe jadi la lit).

*Kepribadian menentukan tindakan.* Pribadi si bujur erbahan lit tindakan ras muat keputusan si bujur. Pribadi si adil erbahansa muat keputusan pe adil. Pribadi si nggit ngaloken sogok erbahan muat keputusan pe salah. Erkiteken si e perlu kal bangsa Israel megermet i bas ngangkat hakim-hakim ras pegawai-pegawai.

Jenari tole Musa nehken persinget kempak bangsa Israel arus maka tetap bujur dengen adil, gelah banci inganina negeri si ibereken TUHAN Dibata man bana. Perkatan enda nuriken maka kerinana min bangsa Israel tetap nggeluh bujur dengen adil. Ngelakoken bagi si iperentahken Tuhan Dibata

jenari tetap nehken keleng ate sapih-sapih ia. Alu bage kegeluhenna tetap ersada ras Tuhan Dibata bage pe ras temanna sesama bangsa Israel.

### **Pengkenaina.**

*Pemerintah adalah **organisasi** yang memiliki kekuasaan untuk membuat dan menerapkan hukum bersama Undang-Undang serta **kewenangan** untuk mengatur komunitas di wilayah tertentu, yang umumnya adalah **negara**. Adapun fungsi pemerintah dalam menyelenggarakan pemerintah terbagi menjadi 3 fungsi yaitu fungsi pembangunan, fungsi pemberdayaan dan fungsi pelayanan.*

Guna ngasup ndahiken dahin-dahin bagi tersena i datas maka min si terpilih e me kalak si lit i bassa kengasupen ras pusuh si ngelai masyarakat si rulo. Erkiteken si e, perlu kal kita pentar i bas milih gubernur, bupati ras wali kota. Si perlu iperdiateken janah ijaga e me:

1. Sitandailah alu jelas ras si eteh karakter calon si man pilihnen e me kalak si nggit ndalanken kebujuren.
2. Jagalah tetap kiniersadan ras kiniulin jabu, kuta bage pe gerejanta, ras ertotolah guna kiniulin perdalinen Pilkada.
3. Pedaulah praktek-praktek pemilihnen alu cara "ngaloken sen" si jadi sogok.
4. Sigejaplah adi ikut kita milih e me nehken sura-sura Dibata, guna kiniulin geluhta, Kabupatenta, Kotanta ras Propinsinta. Pakelah kesempatan alu mehuli guna ikut milih (ula golput).
5. Pilihlah gubernur, bupati ras wali kota e me kalak si banci si akap jadi pasu-pasu i bas geluhta, Kabupatenta, Kotanta ras Propinsinta. Mpelebeken kesejahteraan rayatna si maba kiniulin, kebujuren (keadilan), perdamen ras njagai bage pe ngkelengi tinepa Dibata (la nggit ncedai kerangen, lau ras potensi bangsanta).
6. I bas pemilihnen e kerina min Moria ncidahkan maka kita e me "sira" ras "terang".
7. Bas ia lit jiwa ngelai, erpihak ku masyarakat, la merangap nandangi duit, bage pe anti Narkoba ras anti judi.
8. Secara institusi, i bas Pilkada enda gerejanta ncidahkan sikap netral, e maka gerejanta GBKP la banci ipake jadi ingan kampanye.

Alu pendalanken bagi isingetken enda tek kita maka terpilih me pemimpin si pentar. Sitik pe soranta tapi adi sipakeken alu pentar tentu mbelin ulihna.

Tek kita Dibata si masu-masu soranta si sitik e jadi erguna kal. Dibata si nemami kita i bas ngelakoken pemilihan i bas paksana. Soli Deo Gloria.

### **Diskusi:**

1. Turiken erti Ulangen 16:19 enda jenari kawitken ku bas kinata pemerintahen i Indonesia enda.
2. Kai nge akapndu man pekenan i bas Moria lako ikut i bas milih kepala daerah teptep periode? Turiken dingnen data!

Jenari bahan tekadndu (banci secara pribadi tapi pe banci ka secara komunitas) kenca ngorati bahan PA enda.

*Pdt. Ch. Sinulingga, M.Th*



**SI MAN OGEN** : Roma 12:9-12

**T E M A** : KELENG ATE SI TUHU-TUHU

**T U J U N** : Gelah Moria:

- Nuriken lagu langkah si encidahken keleng ate.
- Nambahi kekelengen man perbulangen ras Mamre secara organisasi.

**METODE PA** : Diskusi Ras Aksi

### **Kata Penaruh.**

Sada lagu POP si pernah popular nina syairna `...buka dulu topengmu...'. Si ningetken maka megati manusia ertopeng, la icidahkenna ayona si asli. Pura-pura guna ncidahken si mehuli tapi banci desken serigala si erbulu domba. Enda me kinata si melala i bas kegeluhenta subuk genduari bage pe nai. E maka Paulus mpersingeti perpulungen ncidahken biak kegeluhen si arus ilakoken kalak si tek. Erpalasken bahan PA enda iajuk Moria GBKP i bas peringeten Ulang Tahun Mamre ncidahken, nehken keleng ate si tahu-tuhu labo topeng.

## **Mpebagesi Pengangkan Kerna Ogen.**

*Roma 12:9-12* e me bagin surat Rasul Paulus man perpulungen Roma guna mpetangkas uga arusna kegeluhen kalak Kristen. Selaku kalak si tek ncidahken kegeluhen si mbaru segelah banci jadi sira ras terang man doni enda. Alu mpelimbarui perukuren maka kalak Kristen ngasup ngkelengi alu payo. Surat enda ituliskan Paulus tupung ia ersikap berkat ku Roma. Surat enda beda kal ras surat Paulus man perpulungen sideban. Isina erkawiten ras perbahanen-perbahanen praktis, jabapen Paulus kerna persoalen-persoalen i bas perpulungen, perubaten-perubaten si sangana jadi. Enda sada bukti Paulus ndeher ras perpulungen. Ietehna situasi perpulungen ras piga-piga kali isingetkenna gelar-gelar kalak si itandaina i bas suratna. Arah surat enda, lit tujun Paulus e me segelah kalak Roma nandai ia. Iarapken Paulus maka kota Roma jadi ingan pelayanen er-Berita Si Meriah. E maka Paulus nuriken kerna pengangkan kinitekenna nandangi Kristus.

Lit piga-piga si banci si pelajari arah ogenta:

### 1. Ngkelengi La Pekulah-Kulah

- Salah sada dosa si ilawan Jesus i bas kegeluhen kalak eragama e me pekulah-kulah (kususna kalak Parisi : teridah badia arah ngangkai aturen guna nutupi perbahanen si la mehuli). Ngkelengi ola ersandiwara, terjeng topeng si lit perayaken terbelinen asangkan nuduhkan kekelengen.
- Engkelengi teridah i bas "*Si lebe-leben mpehaga teman.*" E maka labo banci turah persoalen, i bas jabu, gereja bage pe masyarakat. Konflik benana i bas kalak si erpengakap kurang ipehaga, kurang iperdiateken, janah lit terpuk si sikapen asangkan terpuk sideban, i bas kerina dampar. Lit terpuk sideban iserapken, itadingken akapna, e maka turah, perubaten si lanai terdungi.
- Engkelengi erkiteken nggeluh i bas keleng ate Tuhan. Ulu kekelengen e me Dibata arah Jesus Kristus (kekelengen si mbelin ras meherga) si mpengasup kalak si tek neruskensa man kalak sideban alu la pekulah-kulah.

### 2. Ngalaken Tantangan Geluh.

- Erpengarapen seri ras nimai. Adi nimai i bas pengarapen, la tergejap uga dekahna i bas ertima. Erpengarapen arus i bas reh keriahen ukur erkiteken si man timan *pasti reh ras nandangi reh.* Bage me

kiniteken, kepastin kerna kai si iarapken (Heber 11:1). Erpengarapen e me proses, iperluken kinigenggen seh kai si iarapken e jadi.

- Ertoto la erngadi-ngadi, lit percakapen tiap wari ras Dibata. IA ulu gegeh dinggen kepentaren ngalaken perbeben geluh. Ertotolah man Dibata la erngadi-ngadi, pengendesen si la erpeltep-peltep man Dibata.

3. Naluken kejahatann alu perbahanen si mehuli.

- Ay. 9b "*Cigalah atendu si jahat janah persadalah dirindu ras si mehuli.*" Paulus mpersingeti kalak si tek arus mpedauh diri ras si jahat. Kata 'ciga' ertina *jijik / bau*. Kalak Kristen si erkeleng ate la ngukuri si jahat tapi pusuhna idemi alu sura-sura si mehuli.
- La mekisat tapi tutus erdahin. Ciri kalak Kristen nina Paulus e me teridah arah semangat si lit i bas pusuhna (Indo. "*Biarlah rohmu menyala-nyala*"), tetap tutus, pusuhna gurlah guna Kristus. "Ergiah-giahlah ukurndu i bas ndahiken dahin Tuhan," ipake kata *kairos* (pergunakan kesempatan si lit).

### **Pengkenaina.**

Kalak si tek e me *pejuang-pejuang iman* si nerusken gerakan keleng ate Kristus. Kalak si tek la terjeng erjuang naluken kejahatann ras dosa tapi pe erjuang guna nambari kiniseran erkiteken dosa alu ngkelengi. Alu kekelengen, kalak si tek mereken *keriahen ukur ras dame sejahtera* nandangi doni enda. Si akui maka Mamre secara lembaga i bas gerejanta bage pe i bas jabu ras masyarakat enterem denga si la muat bagin. Iperluken denga usaha-usaha guna ngajuk Mamre, metedeh pusuhna erlajar kerna Kata Dibata bage pe jumpa ras saph-saph perpulungen i bas kegiatan gereja. Gegehen denga pengajuk doni asangkan pengajuk Kata Dibata man Mamre, banci jadi kurang *daya tarik* gereja man bana. Iarapken Moria encidahken keleng ate si tuhu-tuhu man Mamre, subuk i bas jabu bage pe secara lembaga guna erjuang mereken dukungan ras motivasi. Lit pengarapen ras toto maka i bas sada paksa kerina Mamre tuhu-tuhu kalak si rembak ras Tuhan, mabai jabu nggeluh i bas Tuhan ras mbangun kula ni Kristus i bas perpulungen. Tambah umur Mamre secara lembaga rikut ras reh tambahna pengarapen ras kinitekenna man Tuhan, reh tambahna keriahen ukur Moria bage pe reh tambahna kekelengen si ipeseh man Mamre. Tuhan masu-masu.

## **Diskusi & Aksi:**

1. Keleng ate si kuga nge si icidahkenndu sedekah enda man Mamre (jabu bage pe lembaga Mamre)?
2. Kai arapenndu man Mamre i bas Hari Ulang Tahun Mamre tahun 2024 enda?
3. Iaturken waktu kusus guna notoken perbulangen/Mamre i bas HUT Mamre 2024 ras aksi kategorial Moria ngerayaken HUT Mamre i gedung gereja.

*Pdt. Lestari Bukit, M.Th.*



**SI MAN OGEN** : Ulangen 23:12-14

**T E M A** : NJAGA KEBERSIHEN

**T U J U N** : Gelah Moria:

- Nuriken aturen-aturen kebersihan si sehken Tuhan arah Musa.
- Ngelakoken "pola hidup sehat".

**METODE PA** : Diskusi ras aksi kebersihan lingkungan.

## **Kata Penaruh.**

Persoalen kebersihan tetap deng a jadi perbeben bangsa Indonesia seh genduari enda. Faktor utama penyebab lingkungan si la bersih e me kap sampah. Erpalasken data 'Timbunan Sampah Nasional' tahun 2022 teridah maka sumber sampah simbelinna kal i bas negaranta enda e me kap sampah rumahtangga (39,63%). Jenis sampah rumahtangga e, e me kap 41,55% sampah sisa pangan ras 18,55% i bas sampah plastik nari. I bas kerina anggota keluarga si ndeherna kal ras persoalen sampah rumahtangga e me nande, erkiteken nande me si biasana ngurusi rumahtangga, si

erkawiten ras dahin perbelanjaan ras urusen dapur (perpan). Erbuena kita make plastik ntah pe nadingken sampah pangan, maka erbuena kita mereken sumbangan sampah i bas negaranta. Selaku Moria, kita iajuk ncidahkan orat nggeluh bersih i bas dahin-dahinta. Alu bage Moria banci jadi pasu-pasu arah njagai lingkungan bersih ras sehat.

### **Mpebagesi Penganggan Kerna Ogen.**

Tupung bangsa Israel erkemah i bas padang gurun, ibereken sada aturen kerna kebersihan guna njaga kebadian i bas ingan erkemah e (Ulangen 23:9-4). Bersih i jenda lit dua pengertinna, bersih perbahanen ras bersih lingkungan si teridah. Duana enda arus sendalanan. Bersih perbahanen enda ijagai alu ndalanken aturen agama janah nilahi dosa (ayat 9-10). Bersih lingkungan arah njaga kebersihan kula (ridi) bage pe kebersihan lingkungan. I bas ayat 12-13, ituriken kerna uga arusna njagai kebersihan ingan erkemah. Si enda banci ilakoken alu erbahan kakus i darat ingan erkemah, janah adi nuate kuture ikuruk lubang. Tujun perintah enda e me kap njagai kebadian ingan erkemah, sabap Dibata ringan i bas ingan erkemah e. Tambah si e, iban ingan erkemah ndauh ras ingan kuture gelah si ngiani kemah e ula terinfeksi bakteri sabap i bas ingan erkemah e me tentara man ras medem. Kotoren si ipedarat manusia arus ibahan inganna alu sikap, e maka nina Musa kuruk lubang dengen tamburi ka. Teknik-teknik si ikataken Musa i bas bagin enda ncidahkan uga pentingna tentera si erkemah e njagai kebersihan guna kesehaten. Kesehaten dengen stamina tentera e guna erperang tentu ipengaruhi alu orat nggeluh si bersih.

Ayat 14, ituriken Musa maka Dibata ringan i bas ingan tentera e erkemah guna ngampang-ngampangi ia ngelawan musuh. Kemah ingan patung, pulung pekesahken, man ras sidebanna. Ingan e arus ijaga tetap badia, sabap bas ingan si bage Dibata ringan guna ngampang-ngampangi tentera. Adi Dibata ngampang-ngampangisa kemenangan ngelawan musuh jadi sikerajangen bangsa enda. E maka katawari paksa pe arus ijagai kebadian dengen mehamat man Dibata sabap i je me Dibata ringan.

### **Pengkenaina.**

Lit kuan-kuan ngatakenca "*kebersihan adalah sebagian dari pada iman.*" Ertina kebersihan salah sada ulih si teridah i bas erkiniteken. Selaku nande, sidadahkenlah kinitekenta arah njaga kebersihan diri ras jabunta. I bas jaman

si enggo serba praktis enda, Moria pe megati terbaba ku bas perbahanen si lanai ramah lingkungan. Erкитеken latihan si akap nuci piring e maka panci ras piring sigantiken alu 'styrofoam' ntah pe 'mika' ras gelas si ganti alu 'cup' tupung acara man-man i rumahta. Kenca dung pake sibenterken. Tuhu la latihan tapi sadar nge kita maka perbahanenta enda enggo ergungun sampah bas lingkunganta? Pengolahan sampah plastik ras styrofoam tetap denga jadi perbeben seh paksa enda sabap puluhan tahun pe la ia terurai ras tanah. Adi bage, banci saja anak kempta denggo nggeluh i bas lawiten sampah. Si kurangilah pemaken barang si bage rupa. Ula kita kisas nganting raga i bas erbelanja guna ngurangi plastik. Tambah si e sampah si banci denga ibahan erguna banci si pepulung ras sibereken man permata GBKP sabap anakta enda enggo lit Bank Sampahna. Sampah organik tentu banci si olah jadi humus ntah pupuk guna sinuan-sinuantana.

Tambah si e, Moria pe arus bijak ngaturken pangan ras ingan si bersih man isi jabu, gelah isi jabunta nyaman dengen sehat. Rumahta e me ingan Dibata ringan, e maka lakokenlah si mehulina guna njagai kebersihan dengen kiniraturenna. Adi bersih dengen ratur jabunta tentu erlayas ukurta ras ukur Dibata pe senang. Tapi adi murde kerina, maka perukuren si gulut pe mesukah mbengketi pusuh isi jabunta. Ngena ate Dibata Moria si bersih dengen ratur, sabap Dibata biakNa ratur dengen bersih. Kebersihan nggeluh enda rehna i bas kebersihan isi pusuhta. Adi bersih isi pusuhta, bersih kap perbahanenta. Adi erlayas ukurta, erlayas kap pendahin ras isi jabunta. Guna banci njagai pusuh si bersih arus makeken Kata Dibata jadi gelementa. Si isehken Musa man tentera Israel e me Kata Dibata. Adi Kata e nggeluh i bas ia, tentu geluhna pe sikap dengen bersih. Juah-juahen isi jabu pe jadi ulih i bas kebersihan ras kiniraturen jabunta.

### **Dikusi ras Aksi:**

1. Kai nge hubungan orat nggeluh bersih ras kegeluhen kinitekenta erpalasken ogen wari enda?
2. Kai saja si banci ilakoken Moria guna jadi pasu-pasu arah kesehaten?
3. Bahanlah aksi kebersihan lingkungan rumah bage pe gerejanta alu nentukan wari ras jam. Adi banci min enda jadi kegiatan rutin Moria setiap minggu i bas gerejanta.

*Lawes aku ku pajak singa  
Enterem kuidah perbinaga parira  
Mari si jagai kesehatan kula tendita  
Gelah ermulia gelar Dibata*

*Pdt. Rasmalem Br Ginting, S.Si (Teol), M.M*

*Inget ras ersikaplah.....  
minggu si reh si pepulung kolekte extra guna nampati TK GBKP*



**SI MAN OGEN** : 1 Samuel 16:1-13  
**TEMA** : NGUDA TAPI MEHERGA  
**TUJUN** : Gelah Moria:

- Niksiki perdalanen pemilihen Daud jadi raja i bas kiningudanna.
- Mbiasaken perbahanen ras pengidah si seri nandangi anak-anak.

**METODE PA** : Curah Pendapat Ras Aksi

### **Kata Penaruh.**

Kerina jelma pelain-lain rikutken kinibeluhen ras talenta si ibereken Dibata man banta. Labo lit sada pe manusia si kuh. I bas kelebihenna i je pe lit kekurangenna. Enda nuduhkan maka manusia tinepa ngenca, sada pe la serta bagi Dibata. Kinierbagen e arusna mbaba keriahen ras kiniersadan i tengah-tengah jabu ras sekelewet. Kinatana, manusia mekattep erbahan sukat-sukat (pengkotak-kotakan) kerna rupa mejile. Kalak si beluh erjabaten, meganjang sekolahna ras sidebanna. Rusur lit perbandingan-perbandingan sada ras sideban termasuk man anak-anak si lit i bas jabu.

Sukat-sukat orangtua maun erbanca anak-anak enggo sipilihi apai simehulina, simejilena, sipintarna ras singenana kal ateta, e maka lit rusur terbelas "*anak ndu si e nge buah bara ndu nande.*" Biak mbanding-bandingkan anak bas jabu e me sada kebiasaan si la mejile, erkiteken kerina anak si ibereken Dibata man banta: pelain-lain janah lit kelebihan ras kekurangenna. Selaku nande, Moria arusna kin beluh rembang tengah rukur kerna anak, la ibanding-bandingkenna anakna ras erlajar nandai talenta ras sura-sura anak-anak i bas jabu.

### **Mpebagesi Pengangkan Kerna Ogen.**

Samuel isuruh Dibata ndahi jabu Isai guna milih ras nangkuhken raja Israel si mbaru erkiteken Raja Saul paksa si e lanai ngena ate Dibata. Perbahanenna enggo nilah i bas Dibata nari. Isai ibereken Dibata 8 anak dilaki i bas jabuna, tapi asum Samuel reh kesilang ku rumahna, 7 anak dilakina ngenca i rumah. Sue ras adat istiadat kalak Israel, anak dilaki sintua i tengah jabu me semalna si jadi pemimpin janah ndatken pasu-pasu ras erta tading-tadingen si mejilena. Kenca ituriken Samuel tujun kerehenna, ipetandaken Isai me anakna sintua Eliap. Bas ukur Samuel, anak enda enggo cocok jadi raja, tapi la kepe seri pengakap manusia ras pertimbangan Dibata. E maka ayat 7 : *Ola nehen kuga gedangna ras kuga jilena rupana. Adi manusia inehenna si teridah arah darat tapi Aku kupernehen pusuh, e maka Eliap labo jelma si tepat ipilih Dibata.*

Eliab, Abinadap, Simea, Nathanael, Raddai, Ozem ras Elihu, sada pe la ipilih Dibata jadi raja. E maka nungkun Samuel "Lit denga tole anakndu?". Si nguda e me Daud sangana ermakan biri-biri. Ilebuh ia gelah mulih ku rumah. Ia me si ipilih Dibata jadi raja sipeduaken i Israel arah penangkuhen Samuel. Pemilihan enda ncidahkan kerna pertimbangan Dibata la seri ras pertimbangan manusia, sabap mekatep manusia ngenen kai si teridah arah darat saja, tapi Dibata ngenehen ku bas perukuren, kiniteken ras pusuh peraten manusia. Aminna gia arah tempas kula, banci jadi ndauh nge jilen ras mbestangen senina Daud si 7, tapi labo e si jadi perayaken Dibata milih raja gancih Saul. Ketutusan kiniteken Daud si erbanca ngena ate Dibata ia. Daud njadikan Dibata ulu kegeluhenna, tupung ia ermakan biri-biri, tupung ia iayak-ayak, tupung ia erperang, tetap Dibata si jadi penundalenna. Kecibalna selaku anak si nguda pe la jadi pertimbangan Dibata. Pemilihan ras pengkelengi Dibata nandang Daud, naluken adat-istiadat kerna anak

sintua ras sukat-sukat kinijilen kula i bas pengenehenen manusia. Si iperneh Dibata e me kiniteken sekalak jelma.

## **Pengkenaina.**

Rikutken bahan PA-nta enda, lit piga-piga si jadi perenungenta :

1. Kerina anak si lit i tengah jabunta pelain-lain. Teptep kalak lit kinibeluhenna sue ras talenta si ibereken Dibata. Selaku nande beluh min kita ngangkai ras nandai talenta anak-anakta, janah si dukung kai bakatna si mehuli. Si bereken pasilitas man anakta guna ngembangken bakatna, umpamana: mereken buku gambar man anakta si hobi menggambar, ndampingi anakta erdakan man si hobi erdakan, mereken peralatan guna ndukung bakatna ras sidebanna.
2. Usahaken Moria lanai mbelasken kata-kata kasar si erbahanca mental anak ceda, umpamana : Motu kin kam, kai pe la beluh! Adi si ukuri secara logika, adi nande pe ngataken motu man anakta, ise nari pagi si ngergai ia, janah mujiken usaha si ilakokenna? Pengerana si kasar enda erbahan anak kurang percaya diri ntah pe jadi pemberontak erkiteken la iergai usaha si ibahanna.
3. Biak erbanding-banding kerna kebeluhen anak ras kiniulin anak i tengah-tengah jabu, asa bancina lanai iterusken. Sabap anak si akap kita si mehulina, si terpenalem genduari e lenga tentu ku lebe wari ngasup ngekelengi kita janah jadi inganta metua. Perlu ka si inget, anak e labo anak si serta, pasti lit kekurangenna. Adi kita pe la si akap sikap ibandingkan ras turang seninanta, kita pe ula erbanding-banding man anak-anakta.

Anak dilaki, anak diberu, anak sintua, anak sintengah, anak singuda, kerina anakta, amin pelain-lain kerina talenta ras kebeluhenna, i bas ia kerina mbelin pasu-pasu Dibata. Kita manusia si erbahan sukat-sukat i bas doni enda, tapi i lebe-lebe Dibata seri kerina, la lit si serta. E maka i bas bahan PA Moria-nta si sendah, mari kita erlajar ngangkai anak-anakta, si eteh keperlunna, bakatna bage pe kekurangenna. Ngasup kita ngepkep ras ngekelengi anakta, uga gia ia litna itepa Dibata. I bas HUT PERMATA pe-78-ken enda, iajuk kita ngergai ras ngekelengi PERMATA si lit i bas jabunta bage pe i bas Gerejanta, sabap PERMATA e me rudang-rudang Gereja, si perlu iperdiateken, ialoken ras iergaken i bas kita orangtua nari.

### **Aksi:**

1. Erbahan surat pujian (rasa bangga) nta pe chating WA arah Moria man anakta Permata, guna membangun semangatna (*subuk anak Permata i bas jabu bage pe i Gereja*).
2. Erbahan aksi nandang i kategorial Permata : kue ulang tahun, video ucapan selamat ulang tahun ras sidebanna.
3. Kenca dung kita ngerana kerna aksi banci ka si peridateken/si tonton vidio enda:

[https://youtu.be/9G2JG0oc\\_Jo?si=qb9OlzNLKavnCLSV](https://youtu.be/9G2JG0oc_Jo?si=qb9OlzNLKavnCLSV)

*Pdt. Meri S. Br Ginting S.Th*

*Wari enda si pepulung kolekte extra guna nampati TK GBKP*



**SI MAN OGEN** : 1 Raja-raja 17:8-16  
**T E M A** : NAMPATI I BAS PERBEBEN  
**T U J U N** : Gelah Moria:

- Nuriken Perbahanen diberu balu-baluu i Sarpat
- Erbahan Program nampati kalSak i sekelewetna

**METODE PA** : BGA (Baca Gali Alkitab)

### **Persikapen:**

1. Teptep Moria maba Pustaka Si Badia.
2. Pasilitator entah si minpin PA niarapken si enggo pernah ngikuti kursus BGA. Kune la lit pendeta banci vicaris, detaser entah pertua, diaken.
3. Pengurus Moria nikapken kerta flipchart ras sepidol man pasilitator.

### **Kerna BGA.**

Kata Dibata ulu kegeluhen. I bassa nuriken kerna uga bagesna, belangna, ganjangna kerna kuasa ras keleng ate Dibata. Guna ngantusi Kata Dibata, GBKP rusaha nampati perpulungen alu erbahan ibadah keluarga, PJJ, PA

kategorial ras sidebanna. Metode BGA (Baca Gali Alkitab) ipake jadi sada metode si banci nampati guna ngantusi isi pustaka alu sederhana erpalasken konteks kegeluhenna. Langkah-langkah er-BGA:

1. Ertoto
2. Ngoge Alkitab/Pustaka Si Badia (rikutken ogenta) 2-3 kali
3. Gali Alkitab:
  - Kai si ku oge? Tokoh ras setting
  - Kai pesan Tuhan man bangku? Pelajaran, perintah atau nasehat, peringatan atau larangan, janji teladan (P3JT)
  - Kai respon? Syukur, doa, dosa, tekat (SDDT)
4. Ertoto

Secara kusus PA-nta minggu enda make metode BGA, e maka mehuli akap kami langsung si praktekken.

(Iberek kesempaten man kerina si er-PA ngoge dua seh telu kali kitab 1 Raja-raja 17:8-16)


**Kai Si ku Baca (Apa yang ku Baca):**

1. Ndarami tokoh ras setting i bas ogen.
2. Kubaca (identifikasi tokoh-tokoh dalam narasi/cerita)

Tuhan	- Nina Tuhan Kempak Elia (Ayat 8)
	-
	-
Elia	- Berkat ku Sarpat. Igerbang kuta idahna sekalak diberu balu-balu sangana muat ranting. Iperkuankenna (ay. 10)
	-
	-
Diberu balu-balu	- Ngaloj maka la lit roti seakatan sengkerauk tepung ras sitik minak. Ipepulungna sitik ranting man baban ku rumah gelah banci nasakken pangan. E pengkerikerinna man kenca sie mate la man (Ayt. 12)
	-
	-

2. Intraksi Tokoh-tokoh Narasi

Tarik garis tanda panah teptep tokoh si erinteraksi. Umpamana Tuhan man Elia lit erinteraksi, e maka tanda panah Tuhan nari ku Elia, kune lit ka Elia erinteraksi ras Tuhan emaka tanda panah Elia nari ku Tuhan



**Pesan Tuhan KepadaKu (Pedah Tuhan man bangku)**

Lit lima bagin si banci ikelompokken ku bas si enda e me:

1. Pelajaran/Pengajaran sesuatu yang baru	Nampati bas paksa susah seh beratna tapi banci ilakoken adi ras Dibata
2. Perintah/Nasehat yang harus dilakukan	Ula mbiar Tuhan nampati kalak singgit nampati alu ukur meciho
3. Peringatan/Larangan sebuah teguran	
4. Janji' sesuatu yang di dapatkan	
5. Teladan, contoh untuk diikuti	Patuh bagi Elia patuh bas megiken ras ndalanken perintah Tuhan

**Pesan Fasilitator.**

Kelegon si mesangat jadi i daerah pinpinen Raja Ahap. La lit naktak udan telu seh empat tahun erbahanca Lau Kerit si ndube niarapken jadi lau

inemen pe kerah. Kejadin enda jadi erkiteken Raja Ahap la malang man Dibata. Dosa silakokenna lebih asa kerina dosa raja-raja si leben asangkan ia, ipajekkenna rumah sembah-sembahen man Baal, ibahanna gana-gana Dewi Asera si erbahanca nembeh ate Dibata (bd. 1 Raja-raja 18:30-33). Sinuan-sinuan lanai turah e maka jadi me kelehen. Dibata merentahkan nabi Elia lawes ku Sarpat, jarakna ± 13 KM i kuta Sidon nari. Kuta enda asal ratu Isabel ndehara raja Ahap. Ingan enda pusat nembah Baal, seri ras gelar rajana e me Raja Et-baal (bapa ratu Isabel). Arah gelar e nuduhkan maka i je me pusat ingan sembah-sembahen e. Dibata nuruh Elia ku ingan e, janah tading i je. Nina Dibata maka i je nari iberekenNa keperluanNa arah nuruh sekalak diberu balu-balu. Logikana uga banci bas paksa kelehen Dibata nuruh Elia lawes ku ingan si la tek man Dibata, janah si mere man ia kari diberu balu-balu. Diberu balu-balu si arusna man sampaten, ia ka si nampati? Amin bage gia Elia patuh man perintah Dibata, idalankena si e kerina. Seh kenca ia i gerbang kuta e, idahna sekalak diberu balu-balu kiranting. Iperkuankenna alu mindo lau inemen. Bas paksa si e lau jadi kebutuhen utama erkiteken kerah i jah i je. Payo bagi sikataken Dibata, maka diberu balu-balu e minter lawes muat lau. Tapi lengnga pe ibuatna, itambahi Elia ka pemindonna segelah ibaba diberu balu-balu e sitik roti. Mulai me diberu e nuriken kecibalna maka bas ia labo lit roti, tapi sengkerauk tepung ngenca lit. Arus itanggerken lebe, janah adi ibereken ka man Elia maka mate la man me diberu balu-balu e ras anakna. I bas kecibal si bage rupana, bujur kal nge adi diberu balu-balu e nulak pemindon Elia. Biasana teptep kalak rusaha ndarami "zona aman" mpelebe keperluan dirina jine, kenca si e nampati kalak sideban. Bujur nge, sabap pangan i bassa pe sitik nari ngenca, tapi paksa si e isuruh mereken si lit e. Ipetetap Elia ukurna alu palas perintah Dibata "tepung bas mangkok la kerik-keri, minak bas botol la kurang-kurang seh ipenusur udan ku taneh, e maka ola mbiar." Kiniteken diberu balu-balu enda turah arah meggi Kata Dibata. Ilakokenna perintah e; *pang ia nukarken si pasti (roti ras minak si lit bas ia paksa si e) ku si la pasti (arapen roti la kerik-kerin, minak la kurang-kurangan), si teridah ku si langa teridah*. Diberu balu-balu enda tuhu-tuhu ncidahkan kualitas dirina si dem i bas perkuah ate (murah hati), alu lanai mbiar, bera-bera ras ngukurken keperluanNa saja. Ipelebena nehi sura-sura Dibata. Perbahanenna e ngerehken tanda sengget; inanamina me kai

sinikatakan nabi Elia ku tengah-tengah kegeluhenna. Si enda kerina ngatakenca maka:

1. Kuasa Dibata jadi nandangi kalak si tek dingin ndalanken perintah Dibata. Penampat si rehna i bas Dibata e tetap lit, aminna pe labo terlogikaken manusia i bas kegeluhenna. Kepatuhen man Dibata ngerehken tanda-tanda sengget si mabai kita lanai mbiar kerna kegeluhen si pepagin. Lit kap jaminen Dibata man kegeluhen kalak si mpelebe sura-suraNa.
2. Perbeben jadi pasu-pasu man kalak si deban. Mere bas paksa mbue e biasa, tapi mere i bas paksa kekurangan em si luar biasa. Nampati i bas paksa megegeh biasa, tapi nampati i bas paksa kote iperluken kiniteken si paguh. Pengarapen man Dibata jadi gegeh bas ndalankenca, e maka bahanlah i bas teptep kegeluhenta mpebelin pengarapen e segelah tetap ngasup jadi pasu-pasu. Ula mbiar mere si mehulina sabap Dibata enggo nikapken tanda sengget si la pernah terukuri bas geluh.
3. Diberu balu-balu mereken si litna, entah si mehergana bas dirina, janah nggit erkorban guna suruh-suruhan Tuhan. Ijemba pe tole kita ngasup mereken si mehulina guna jadi pasu-pasu. Labo mere si sisa-sisa, entah terjeng ngisi waktu luang. Alu dem kiniteken ras pengarapen berelah diri guna nehi sura-sura Dibata, sabap Dibata pe enggo leben mereken si mehulina ku bas kegeluhenta. Erdandanken sie bas kerina paksa jadilah pasu-pasu man sekelewetta.
4. Bahanlah program subuk secara organisasi bage pe secara pribadi guna nampati kalak si deban si perlu man sampaten. Pengarapenta kebiasaan nampati jadi biak si ncidahkan maka perkuah ate e mbelin bas kegeluhen kalak si erkiniteken.

### **Responku.**

Arah pesan si enggo idatken, itindak lanjuti ku bas respon. Respon enda arus konkrit, jelas, terukur ras banci inanami (dapat dinikmati). Alat bantu sinibahan e me:

Ucapan Syukur (mau melakukan sesuatu)	- malem kal ateku ngaloken Kata Dibata, emaka bas wari minggu si reh enda kutangerken pangan ras adumna man si erkotbah ras peliturgis

Doa (bagi keluarga, teman, bangsa/negara)	
Pengakuan Dosa (sesuatu yang telah salah dilakukan)	
Tekad (janji melakukan sesuatu yang baik)	

*Pdt. Rosani Sembiring, S.Th.*



**SI MAN OGEN** : Daniel 6:1-3

**TEMA** : JADI PASU-PASU I BAS PENDAHIN

**TUJUN** : Gelah Moria:

- Niksiki perbahanen Daniel i bas erdahin.
- Mereken usihen i bas pendahin si jadi pasu-pasu nandang sekelewetna.

**METODE PA** : Aksi

### **Kata Penaruh.**

I bas buku moral, etika & millennium III lit sada topik nuratken kerna etika kerja, salah sada poin si iturikenna e me 'kerja (erdahin) sebagai wujud diri.' Manusia erdahin guna encidahken ras ngelaken pemere-pemere Dibata i bas dirina. Teptep kalak ibereken Dibata pemere si pelain-lain gelah kuh pemere

Dibata man manusia e. Arah erdahin, i je me teridah rupa Dibata si erdahin ras e jadi usihen manusia. Dibatanta pe erdahin i bas doni enda, nai genduari seh rasa lalap i bas mpekena-kena tinepaNa. Alu nggitna manusia erdahin teridah bedana manusia ras mahluk sidebanna. I je me teridah rupa Dibata bas manusia. Mbelin tanggungjabap si iendesken Tuhan man banta guna idahiken alu mehuli, labo saja man banta tapi pe man jelma si nterem.

### **Mpebagesi Pengangkakan Kerna Ogen.**

Oratenta enda turi-turin kenca Nebukadnesar enggo tek dingin muji Dibata. Lanai ndekahsa maka igantiken Raja Belsasar me pemerintahenna. Enggo lit percakapen Raja Belsasar ras Daniel, dingin enggo ietehna maka Daniel enda me sekalak i bas kalak Jahudi si ibaba i Juda nari. I bas penuriken Daniel nipi, antusen surat kerina payo, e maka kerina kalak si istana pe nandai, mujiken dingin tek nandangi kai si ibelasken Daniel. Situasi enda erbahanca reh cianna ate teman-temanna kalak Babil. E maka lit rusur cara teman-temanna e gelah Daniel banci ipersalahken entah pe adi banci lanai iperdiateken raja.

*Ayat 1-2.* Guna ndahiken dahin pemerintahen i bas kerajan, ilakoken me pengangkaten 120 kalak gubernur. Itugasken i belang-belang kinirajan Darius (si nggantiken Raja Belsasar). Kenca enggo idalankenna si e maka iangkatna Daniel ras dua kalak sideban jadi wakilna guna ngawasi dahin gubernur-gubernur e. I bas si e pe enggo teridah uga raja mperdiateken dingin milih Daniel erkiteken potensi si lit i bas dirina. Daniel enggo ncidahken ise ia i kerajan Babil asum si e. Daniel ngaloken gegeh ras kengasupen ngantusi nipi ras ngoge surat bagi si ngena ate Dibata. Dingin si e situhuna jadi gambaren kai si nandangi jadi/ si isuraken Dibata.

*Ayat 3.* Minter teridah pendahin Daniel. Ulin dingin sikapen asangkan temanna si radu ras ia jadi wakil raja mperdiateken pendahin gubernur-gubernur. Ibandingkan pe ras gubernur-gubernur tetap sikapen pendahin Daniel. Bage me dahin si idahiken alu ertanggungjabap man Tuhan, e maka ersura nge raja ngangkat Daniel jadi wakilna ngaturken kerina kerajan. Ketutusan ate labo sia-sia apai ka adi ipalasi alu kiniteken dingin erpengarapen man Dibata. Daniel labo perlu "cari perhatin" raja, siilakokenna e me patuh nandangi Tuhan e maka ngena ate Tuhan dingin manusia man bana.

## **Pengkenaina.**

Dibata enggo netapken pendahinta erpalasken pemereNa man banta. Janah ngena ate Dibata adina tutus kita i bas pendahin si iberekenNa. Dahin e rehna i bas Dibata nari ras guna Dibata kap. Erdandanken si e kai pe sidahiken, dahikenlah e alu tutus tempa-tempa erdahin guna Tuhan, labo guna manusia (band. Kolose 3:23). Tujun erdahin labo terjeng man banta tapi gelah erguna man kalak sideban. I bas paksa enda erbage-bage pemere talenta, erbage-bage kesempatan dahin si aloken kita janah kerina e guna kegeluhen doni ras tinepa Dibata. Gunakenlah kesempatan si ibere Dibata, erdahin ras nggeluh jadi pasu-pasu. Sabap pasu-pasu si isikapken Dibata man doni enda, man banta, janah arah dahinta me pasu-pasu e ielaken. Penungkenun man banta, uga nge ulih pendahinta sedekah enda, terjeng man banta saja nge nta enggo jadi kemalemen ate man kalak si deban? Si iarapken Dibata gelahna pemere si iberekenNa e la terjeng erguna man banta saja, tapi pe man kalak sideban i sekelewetta.

## **Aksi:**

1. Bicara Morianta lit usahana si banci nampung tenaga kerja, orati senina Morianta entah lit anakta si perlu lowongen kerja sue ras bakatna gelah teridah pe ise ia i bas pendahinna.
2. Bicara lit senina Morianta si beluh make up/merangkai bunga (pilih salah sada) ban waktuna gelah ikursus Morianta. Arah enda teridah maka pemere Dibata si lit i bas kita jadi pasu-pasu man temanta senina Moria.

*Pdt. Kristiani F. Br. Tarigan, M. Th*

*Aksi PA: tgl 09-15 Juni 2024*

## **Erbahan abon ayam kampung**

- 1 kg daging dada ayam
- 5 daun jeruk
- 5 daun salam
- 2 ruas batang sereh
- Minyak goreng untuk menumis
- Garam

## **Bumbu halus**

- 8 butir bawang merah
- 7 siung bawang putih
- 1 ruas jahe
- 1 ruas kunyit
- 1 ruas lengkuas
- 4 butir kemiri

- 1 sdt ketumbar
- 100 gram gula merah

### **Cara Membuat**

- Cuci ayam hingga bersih, lalu rebus dengan air sedikit, tambahkan serai dan daun salam hingga ayam matang.
- Tumbuk-tumbuk di ulekan daging ayam setelah itu suwir-suwir halus.
- Blender semua bumbu halus, tumis dengan minyak hingga harum.
- Panaskan 1 sdm minyak goreng, lalu tumis bumbu halus, daun jeruk, lengkuas dan serai hingga harum dan layu.
- Masukkan daging ayam yang telah disuwir. Tambahkan air sisa rebusan ayam. Aduk-aduk dan masak hingga air meresap. Matikan api.
- Panaskan wajan dengan minyak yang banyak. Goreng abon secara bertahap hingga warnanya kecokelatan. Angkat dan tiriskan.
- Jika minyak sudah tiris, simpan abon di toples.



**SI MAN OGEN** : Kuan-kuanen 19:14-17

**TEMA** : TERPENALEM DINGEN JADI USIHEN

**TUJUN** : Gelah Moria:

- Nuriken sukat-sukat ndehara si pentar.
- Makeken sukat-sukat ndehara si pentar i bas ngaturken perbeliten jabu.
- Ngajarken dingen ncidahkan orat nggeluh ndehara si pentar man anak-anak ras kalak si deban.

**METODE PA** : Studi Kasus ras Aksi

### **Kata Penaruh.**

Sada tulisen Sajogyo i bas bukuna Sosiologi Pedesan, nuriken kecibal nande i bas tengah jabu e me sekalak ndehara man perbulangen, nande man anak-anak ras sekalak si encari. Selaku nande dahinna mpebelin-belin ras

ngajari anak-anak ku si mehuli, bage pe mpekena-kena jabu. Selaku si encari, erbage-bage dahin si idahikenna. Subuk ku juma bage pe dahin si deban si lit ulihna. I bas sada artikel pe lit ituriken pernanden kalak Karo mbelin kal ngaruhna i bas encukupken keperluan ekonomi keluarga. Nande, la terjeng erdakan ras ngoratken anak-anak, tapi ikut muat bagin i bas ngelitken perbeliten jabu. Arah bahan PA-nta enda, tole ateta ngenehen uga kin tanggungjabap ndehara/diberu erpalasken Kata Dibata.

### **Mpebagesi Pengangkan Kerna Ogen.**

I bas ayat 14 enda, bandingkan ranan ras erta si ialoken i bas orang tua nari, dengen ndehara si pentar si rehna i bas Tuhan nari ngenca. Ranan ras erta sialoken i bas orang tua nari, subuk pemere ntah tading-tadingen, biakna ermasap-masap, banci lesap erkiteken ipakeken ntah pe ceda erkiteken perdalanan waktu. Janah banci kerik erkiteken la kita beluh makekensa alu mehuli. Tapi, adi ndehara si pentar i bas Tuhan nari rehna. Kata pentar i bas bahasa Indonesia e me *berakal budi*, i bas bahasa Ibrani ipake kata *sekhel*, ertina, ndehara si bijak, dem alu pertimbangan i bas ngelakoken kai-kai pe, termasuk i bas pengerana ras perbahanenna. Kalak si bijak si dem alu pertimbangan, ngasup ngamper bana, dengen dem alu kinitenengen i bas rukur (sabar). Kinitenengen rukur e mpedauh ia i bas perubaten nari, sabap kerina ilakoken dengen iukurina alu dem pertimbangan. La terjeng karakterna, tapi pendahinna pe encidahken maka ia kalak si pentar, subuk i bas ngajarken anak-anak, nampati perbulangenna ngelitken perbeliten jabu alu erbinaga, erbahan uis, erjuma, bage pe er-asuh-asuhen (beternak). Arah kepentarena e ia jadi bayak. E maka ndehara si pentar ergan asangkan erta-erta si lit i doni enda.

I bas ayat 15, enda persinget nandangi kalak si malas ras ulih kemalasenna. Sipat malas enda, mahan kalak lanai erdahin i bas waktuna, tapi pekerina waktuna guna tunduh. Ulihna kelihen si erbahansa lumben. Kalak si malas la nggit erdahin guna encariken keperlunna ras perpanna, padin akapna encari alu nipu kalak si deban. Pengkebet sibagenda erbahan ia ndatken ukumen arah pendahinna si nipu e.

I bas ayat 16, pengajaren kerna kepatuhen ras sikap si ngergaken perintah Dibata, ras ulihna ku bas kegeluhen. Perintah Dibata sinimaksudken i bas bagin enda, e me pe pengajaren i bas kalak si pentar nari. Kalak si ngikutken perintah Dibata, bage pe pengajaren i bas kalak si pentar, ia

ndatkan kegeluhen. Tapi kalak si la ngergaken perintah Dibata bage pe pengajaren si rehna i bas kalak si pentar nari, mate me.

I bas ayat 17, pengajaren kerna kalak si mperdiateken kegeluhen kalak si musil. Kalak si mperdiateken kalak musil bali ras pepinjamken man Tuhan. Engkai maka pepinjamken man Tuhan? Sabap kalak musil tentu labo ngasup ngulihkan kai si enggo si lakoken nandangi ia, e maka Dibata me si ersimulih man bana.

### **Pengkenaina.**

Guna nehi tema-nta 'terpenalem dengen jadi usihen' sekalak ndehara arus min nggeluh i bas orat nggeluh si pentar, e me: metenget dengen dem pertimbangan i bas kai-kai pe, tutus erdahin, erngena ate nandangi perintah Dibata bage pe mediate nandangi keperluan kalak si deban. Orat nggeluh si bagenda perlu icidahken nandangi anakta, segelah anakta ras kempu-kemputa pe pagi banci ka nggeluh pentar. Pengajaren kerna orat nggeluh ndehara si pentar la cukup ibelasken alu kata-kata nandangi anak-anak ras kempunta, tapi pe arus si cidahken arah kegeluhenta si teptep wari. Orat nggeluh enda la terjeng iajarken tapi tuhu-tuhu nggeluh dengen teridah i bas kegeluhenta. Umpamana: sekalak ndehara selaku bendehara i bas jabu, erdahin guna ngaturken perbeliten jabu, segelah kerina keperluan jabu cukup dengen pas inganna. Ndehara si pentar, ipakekenna kesempatan alu tutus erdahin. I bas ndahiken dahinna ras ngelakoken kai-kai pe, ia dem alu pertimbangan, subuk i bas ngelitken bage pe makeken perbeliten jabu e, e maka sikap geluhna pasti la *hedonis* ntah pe *konsumeris*. Ndehara si pentar beluh ia ngenen peluang si banci nambahi perbeliten jabu.

### **Studi Kasus.**

Lit sada jabu, gelarna Bp. Galuh Perangin-angin ras Nd. Galuh br Sembiring ras sada anakna diberu gelarna Galuh Permatasari br Perangin-angin. Dahin Bp. Galuh enda e me pengusaha galuh. Kerina anak kutana ndayaken galuh man bana, bage pe kuta-kuta si deherken kutana ndai. Galuh si matah denga itukurina, i kirimkenna ku pulau Jawa, alu kualitas ras ukuren si mejilena. Si ukurenna kitik, tadingen me bas gudang. Rukur nd Galuh, *nde ah, sia-sia nari nge kerina e. Jadi kai nge ban makana ula bage sia-siana atena*. E maka ibukana me kedena, erdaya pisang goreng ras godok pisang ia, idayaken si Galuh me deba pisang goreng ras godok ndai keliling-keliling kutana. I bas sada paksa macat me usaha pengiriman galuh ku pulau Jawa,

sabap masuk ka pasoken galuh i bas kuta si deban nari, deba impor ka. Melala kerugin si alami Bapa Galuh i bas usahana. Galuh macik, ergana pe lanai lit. Menam me bangkrut usahana ndai. Rukur Nd. Galuh, uga nari ngenda kari atena. E maka sanga er-HP anakna si Galuh, itontonna Youtube, lit kepe i je cara pembuatan pisang coklat (pisang goreng icampur alu bubuk coklat). Ngerana ia man nandena, *Nande, lit kuidah pisang bas Gudang ah. Ban min pangan-pangan yah. Entabeh kuakap e, rasa coklat ka banna nina* Galuh ngerana man bana. E maka ibahanna kerina galuh matah ndai jadi usaha pisang coklat. Imomokenna arah media sosial, seh maka enda pe idayaken seh ku luar kota, sabap ijagana kal kualitas rasa ras bahanna. E maka jadi produk si terpercaya.

1. Uga nge pengakapta kerna Nd. Galuh enda, i bas ngaturken perbeliten jabuna, ibandingken ras pengorantenta ndai?
2. Adi si gargari ku bas kegeluhenta, enggo nge kita beluh makeken peluang alu sikap guna peningkaten perekonominta?

**Aksi:** berdayaken Moria si beluh erbahan pangan-pangan, guna erbahan jeda/snack PA Moria. Adi PA rumahta, enggo banci si pesan man bana, gelah ekonomina semakin meningkat.

*Pdt. Lina br Ginting*



*Ersikaplah..... minggu si reh Metode PA-nta Aksi*

**SI MAN OGEN** : Masmur 104:1-15  
**TEMA** : NJAGAI SUMBUL KEGELUHEN  
**TUJUN** : Gelah Moria:

- Nuriken kai-kai saja pemere Dibata arah kerina tinepana.
- Njagai tinepa si bereken Dibata.

**METODE PA** : Aksi

**Kata Penaruh.**

Si sedari nge maka inganta tading enda reh dekahna reh cedana? Melala kalak kelsehen erkiteken cuaca si `ekstrim`, erbahansa la ruluh peranin entah

perturah sinuan lengke, i bas sada ingan la udan (kemarau), ingan si debanna udan lalap seh enggo banjir, bas ingan si debanna ka la tentu (i je lebih lasna kentsik nari salih jadi udan mesangat), tambah ka pinakit reh ngupuh, udara enggo melket, i bas sada-sada daerah lau bersih pe la lit, janah taneh pe enggo latih (ban rusursa ipake entah pe mbuesa bahan kimia). Penungkunenna, engkai maka doni inganta tading enda banci ceda? Banci erkiteken paktor alam, umpamana: gunung berapi meletus ras gempa bumi, tapi kecedan alam enda pe mesangat kal ulih perbahanen manusia. Lit si erpengakap maka doni enda terjeng objek, alat entah pe sarana guna ncukupi keperluan geluh manusia. Payo kin pengangkan si bage rupa? Arah PA-nta enda iingetken kita mulihi uga arusna pengangkan ras perbahanenta nandangi doni enda, segelah Moria banci min jadi pasu-pasu man alam entah pe lingkungan inganna tading.

### **Mpebagesi Pengangkan Kerna Ogen.**

Mazmur 104:1-15 enda me sada puji-pujin sekaligus pengakun kiniteken/kesaksin pemasmur secara pribadi kerna Dibata me si mulia. Kemulian Dibata e teridah arah doni ras kerina isina. Arah pujinna (ay.1) si idah maka pemasmur tuhu-tuhu maba kerina geluhna naksiken kemulian Dibata, nina pemasmur "O tendingku", ertina la terjeng babah tapi arah pusuhna nari si nuduhkan geluhna jine guna muji Dibata. Tole nina, "o Dibatangku", enda sada belas-belas pemasmur si nggambarkan penandai si mbages kal kerna Dibata, e maka si kerajanggenna akapna Dibata e. Jadi, pemasmur tuhu-tuhu rende ras erbelas arah penggejapenna maka Dibata me si nepa ras erkuasa nandangi kerina isi doni e.

Alu kata *kiasan* ibabai pemasmur bangsana ngidah ras ngejabken maka doni ras kerina isina e me tinepa Dibata ras pe panggung kemulian Dibata kap. Terang si ersinalsal e me cabin Dibata, langit e me kemah Dibata, lau e me ingan rumah Dibata pajek, embun e me gereta Dibata, angin jadi persuruhan Dibata, kilap jadi si erdahin Dibata (ayat 2-4). Teridah pe perbahanen Dibata (ay. 5-15) e me: jadi palas si enteguh doni enda pajek, ncabini doni alu lawit janah lau si kiam/ombak jadi erkiteken sora ras perentah Dibata, ipesikapNa ingan man lau maler i deleng nari, isemburkenNa ulu lau ras lau anak guna ingan minem rubia-rubia kerangen bage pe ilitkenNa ingan perik-perik rasar, iusekenNa udan ku deleng-deleng, ipeturahNa dukut guna pangan rubia-rubia rikut sinuan-sinuan guna pangan

manusia. Arah si enda teridah maka Dibata njamini ras mpekena-kena kerina tinepaNa e alu ratur ras sempurna.

### **Pengkenaina.**

*Bukankah alam itu ciptaan Tuhan? Lalu apakah kamu mau mendapatkan dua dosa jika merusak alam? Pertama dosa karena merusaknya, kedua dosa atas tidak mensyukuri ciptaan Tuhan.* Pengarapenta selogan enda banci jadi persinget man banta guna makeken ras njagai kerina teptep bagin doni inganta tading enda mehuli. Sabap arah kesaksin pemasmur Moria jadi sadar maka:

1. Doni ras kerina isina, inganta tading enda, "rumah" Dibata kap. *Sumbul kegeluhen e me pemere Dibata guna kita ndalani kegeluhen i doni enda.* Sumbul kegeluhen si enggo isikapken Dibata e me taneh inganta tading, kerangen, lau, sinuan-sinuan, rubia-rubia, matawari, bulan ras sidebanna. Kerina e enggo ratur inganna dinging serta. Sumbul kegeluhen enda me dalam Dibata "ngerana" man banta. Tapi labo pengertinna maka si sembah entah pe si-*keramat*-ken sada-sadai tinepa Dibata e.
2. Kegeluhen si enggo isikapken Dibata e ula terjeng si eteh makesa, tapi ertanggungjabaplah kita i bas njaga ras pekena-kenasa. I bas kita njagai ras mpekena-kena sumbul kegeluhen e, encidahken kita mehamat nandangi Dibata si empu "rumah." E maka selaku Moria kitalah jadi penggerak njagai sumbul kegeluhenta e, kususna lebe lau si cukup penting kal bas geluhta. Lau e me salah sada sumbul kegeluhen si enggo sikapken Dibata man banta, jagalah gelah tetap bersih ras mehuli. Guna si e mari si benaken i bas lingkungan inganta tading lebe, umpamana: si pake kesain rumahta entah pe pake pot alu nuan sinuan si erguna (apotik hidup, batang kayu si erbuah, gulen, bunga), si pake pupuk organik, hemat air bersih, si pesikap peceren/pembuangan (sampah) rumah tangganta gelah ula ngganggu ku sekelewetta, si pilih produk rumah tangga ramah lingkungan; si pake pembersih si nukah terurai, ula make produk si mengandung *merkuri*, hemat energy listrik, kurangi make pelastik kantong), sisa bahan kimia (sisa cat, baterai, obat-obtan, ras pestisida) ula si tamaken ku parik juma entah pe parik rumahta, si biasaken anakta ikut i bas mpekena-kena lingkunganta, janah adi lawes kita ku sada ingan wisata si biasaken ula i ja pe si ambekken sampahta.

**Aksi:** Pengelolaan sampah e me salah sada upaya guna njaga lau tetap bersih. E maka Moria erbahan sada video memperagakan pengelolaan sampah ramah lingkungan. Mulai i bas nerapken (memilah) jenis-jenis sampah seh ku uga pengelolaan rikutken jenisna e (jenis banci macik entah jenis daur ulang)

Kenca dung iperagakenndu tutup alu erbahan pengajuk guna njaga lau tetap bersih ras lestari. Himbauan e contohna: "mari tinggalkan mata air jangan air mata kepada anak cucu kita, sayangilah lingkungan hidupmu," entah pe "hemat air, setiap tetes berharga, setiap tetes berarti," "sungai bukan tempat sampah," "jaga kebersihan lau guna anak kempunta," ras si debanna.

Kenca si e banci si *upload* ku media sosial gelah jadi persinget man si enterem pe.

Cataten: contoh sampah ibaba rumah nari. E maka demonstrasi ilakoken i bas wari er-PA.

*Pdt. Amenda br Bangun*



**SI MAN OGEN** : Perbahanen Rasul-Rasul 16:11-15

**TEMA** : GELUHKU JADI PASU-PASU

**TUJUN** : Gelah Moria:

- Nggargari ulih perbahanen ras kiniteken Lidia nandangi jabuna.
- Nambahi perbahanen si jadi pasu-pasu ku sekelewetna.

**METODE PA** : Sharing ras erbahan kreativitas

**Kata Penaruh.**

La sitik jelma ntah pe tokoh si mbelin mpengaruhi kegeluhen manusia. La saja turi-turin i bas Pustaka Si Badia, i bas sejarah kegeluhen pe la sitik tokoh dunia subuk dilaki ntah pe diberu si banci jadi inspirasi kalak sideban. Arah geluhna: pendahin, kata ras perbahanenna banci nambahi semangat kalak sideban. E maka i bas jaman genduari enda la sitik buku kerna kegeluhen sekalak jelma (biografi) isuratken gelahna banci ioge kalak sideban. Kai tujunna? Tentuna turi-turin geluhna banci mereken usihen man kalak sideban gelah banci reh sikapna geluhna, nggit erjuang i bas keterbatasan ntah pe keterpurukenna. Bage pe melala belas-belasna si jadi ingeten kalak sideban si mpeturah semangat ras arapen nggeluh.

I bas peringeten 67 tahun Moria GBKP, 16 Oktober 2024 enda, iajuk Moria GBKP njadikan geluhna jadi pasu-pasu subuk i bas jabu, masyarakat, gereja bage pe bangsa ras negara. Alu erlajar arah tokoh diberu i bas Pustaka Si Badia si tergelar Lidia.

### **Mpebagesi Pengangkan Kerna Ogen.**

I bas perdalanan Paulus ras Silas bagepe Timotius i bas er-Berita Si Meriah, erbage kuta si ibentasinna. Seh me ia kerina i Pilipi, si pendudukna warga negara Roma, sabap daerah e jajahen Roma. I je me ia ringan piga-piga wari dekahna. Seh ku bas wari Sabat lawes me ia ku ingan ertoto kalak Jahudi i tepi lau, sabap i Pilipi langa lit Rumah Pertoton kalak Jahudi (sinagoge). Paksa e me ia jumpa ras sekalak diberu si tergelar Lidia. Lit piga-piga si teridah arah kegeluhen diberu e.

- Asal kutana i Tiatira nari, daerah e terkenal alu dahin pewarna uis, kususna uis ungu si icelup alu kulit kerang. Paksa si e uis ungu enda e me sada bahan si meherga janah tertentu kalak si makesa. Ia kalak Junani, labo Jahudi. Tapi Lidia ikut i bas kelompok kalak si ersembah rikutken agama Jahudi. Banci ikataken si Lidia enda sekalak si enggo iJahudiken (proselit). Lidia dahinna erbinaga uis ungu e, uis si meherga. Arah binagana e, secara ekonomi banci ikataken Lidia kalak si mapan.
- Lidia kalak si tutus, la saja i bas dahinna tapi pe ersembah (erkiniteken). Tupung Paulus nuriken Berita Si Meriah, tutus kal atena megikensa, sabap italangi Tuhan ukurna, ertina alokenna Kesah Si Badia seh maka ibegiken ras iantusina kal si isehken Paulus. I bas pemabai Kesah Si Badia turah kiniteken seh maka ipindokenna ia gelah iperidiken. La saja dirina secara pribadi tapi pe ras kalak si tading ras ia bagepe kadekadena. Ertina Lidia enggo erberita si meriah paksa e.

- Kepeken la saja i bas erdahin ras erkiniteken ia tutus. Tapi pe ia kalak si meteruk ukur seh maka ipindokenna gelah Paulus kesilang i rumahna sedekah ia i Pilipi. Lidia kalak si metemue dengen nggit nampati.

Bagenda me kegeluhen sekalak diberu si tergelar Lidia, la saja man kelompokna, kalak si nukur uis man bana, man keluarganya tapi man Paulus si reh ku kutana. Ibabana keluarga iperidiken, tentuna ngasup ia mpetetap ukur seh jadi pengikut Kristus. Ielaina per-Berita Si Meriah tentu arah kinilitenna e me rumah ras erta-ertana. Bage me Lidia enggo jadi pasu-pasu man kalak sideban i bas kegeluhenna.

## **Pengkenaina.**

Geluh jadi pasu-pasu, megati mesera si akap netapkenca kai sukat-sukatna. Erlajar arah kegeluhen Lidia, icibalkenna dirina rikutken situasina bage pe uga litna ia ras i bas ia. Asal si ukuri si mehuli saja, silakoken pe si mehuli pasti kerina erguna ras mabai kegeluhen man kalak sideban.

Enggo 67 tahun Moria GBKP secara organisasi. Moria GBKP iarapken enggo jadi pasu-pasu, si inanami kalak sideban. La saja arah program-programna secara organisasi tapi pe arah kehadiran Moria i bas kerina dampar kegeluhen. Sabap program si ilakoken Moria mereken ulih si mbelin ku bas kegeluhen Moria selaku diberu, ndehara, nande ras anggota masyarakat.

Banci saja kecibal kegeluhen i bas jaman Lidia ntah pe tokoh diberu i bas Pustaka Si Badia ras i bas sejarah kegeluhen enda labo seri. Amin bage gia, doni enda tetap ngarap ras tertima tima maka sekalak jelma banci min erguna, ernanam man kalak sideban, alu tetap rukur ras ngukuri kiniulin kalak sideban. Kai si inamamina si mehuli, inanami kalak sideban ka min atena, kai si ialokenna ialoken kalak si deban ka min sura-surana.

Geluhku jadi pasu-pasu! Kai saja si arus silakoken gelah geluhta jadi pasu-pasu?

a. Man dirinta secara pribadi.

Labo ngasup kita jadi pasu-pasu adina dirinta jine pe langa nggejabken ipasu-pasu. Ertina, enggo min si gejam, sinanami pasu-pasu si ibereken Dibata i bas kegeluhenta. Labo bekas ulihta ras beluhta kerina si banci sinanami kita. Si gejam e pemere ras perkuah ate Dibata.

b. Man kalak sideban.

Kenca si nanami pasu-pasu e, arus si pedauh dirinta i bas biak si la payo: meganjang ukur, egois/mediker, cian ras sidebanna. Alu bage banci kita erbagi pasu-pasu la saja bentuk materi tapi pe dukungan

moril, jadi teman setia i bas kerina paksa, memotivasi i bas tantangan geluh, ndarami serpang puluh i bas kerina persoalan-persoalen si jadi arah pemete ras pengalamenta.

Igejab ras inanami kalak sideban kehadirenta i tengah-tengah kegeluhen enda. Iinget kalak sideban kita, tedeh atena jumpa ras ngerana ras kita. Malem ateta si jadi pasu-pasu bage pe si ngaloken pasu-pasu Dibata i bas erbage bentuk keleng ate.

### **Sharing:**

1. Situriken, kegeluhen Lidia si enggo jadi pasu-pasu kenca e si umban ku bas dirinta secara pribadi!
2. Erbahan bunga, aksesoris ntah pe pernak pernik arah uis perca (kain sisa-sisa jaiten) asa bancina ungu rupana.

(link tutorial):

<https://youtu.be/HxYCu3RuE6g?si=RK3aN4ROVvtZYFvV> *atau*

<https://youtu.be/hFgCwIOBm8s?si=nPiriRM9ykNrUjKq>

*Pdt. Suenita Simulingga, M.Th.*



*Inget ras ersikaplah...*

*Minggu si reh si lakoken kolekte extra guna dana LAI*

**SI MAN OGEN** : Pengerana 5:10-12

**TEMA** : PEBIAS-BIAS ASA SI LIT

**TUJUN** : Gelah Moria:

- Nuriken ulih kalak si la erbias-bias i bas kegeluhen.
- Nuratken tanda kalak si nggeluh sederhana, seimbang, nampati ras ngasup ngatakan bujur.

**METODE PA** : Studi Kasus

### **Kata Penaruh.**

Nggeluh i era digital bagi si gundari enda tentu melala kal kelebihenna. I ja informasi, belang-belang doni enda, terkoneksi ras banci iakses. Handphone pintar enggo lit i bas tanta. Keperlun si teptep wari seh ku keperluan si mbelin pe banci seh ku rumahta alu sekali click saja ras banci nggalar i rumah (COD). Aminna tading i kuta-kuta, lanai perlu kita mbiar ketadingen mode. Nai mungkin sekalak penden banci jadi pusat perhatian i bas kerja-kerja perban pakena mode uis ras selop si la pernah idah kalak, adi gundari, barang luar negeri pe banci si pesan alu aplikasi OL shop (toko on line). Kegelhenta jadi medoni (hedonisme). Tentu enda bahaya. Kita jadi candu. Ula padah lebe man kalak si la melala duitna, man si melala senna pe ceda perbelitenna, bage pe ceda hubungan ras isi jabu. Enda tentu la mehuli, arus kepe si kawali sura-suranta.

### **Mpebagesi Pengangkan Kerna Ogen.**

Pengerana ngatakensa maka si idarami manusia i doni enda, kerina sia-sia, kai pe sia-sia! Nggeluh pe sia-sia, kerina sia-sia (1:2). Kerina bali ras si nangkap angin saja ngenca; kerina sia-sia (1:14). E maka mekuah kal ate, adi lit jelma si kidekah geluhna ngayaki kesenangan doni enda ngenca, si meduit, si la pernah bias akapna bana ras kalak si erngena ate man erta.

*Pengerana 5:10-12*, nuriken kerna biak manusia si meduit ras erngena ate man erta doni enda. Lit 3 si banci si pelajari i bas biak jelma si bage, e me:

1. Pengerana nuriken maka kalak si bage labo pernah erbias-bias akapna bana. Lalap tole-tolen, erkiteken sen ras erta si iayakina e, labo ngasup mereken erti kegeluhen si tuhu-tuhu man bana. Keriahen ukur erkiteken sen e pe biakna kentsik ngenca ras masap me. Tuhu melala banci tukurna, tapi sie kerina la mereken kepuasan man bana. La pernah i datsa kai si surana. Kerina sia-sia (ay.10).
2. Aminna pe datsa erta si iayakina e janah ia pe reh bayakna, tapi reh bayakna ia reh buena kalak man berenna man. Rehen me kade-kade ndahisa, teman meriah, anak kuta, si minjam sen atena, bage pe jelma si nawarken diri jadi si erdahin atena ndatken panganna. Si nai megombang, rempet mehamat kerina. Lenga ka terpuuk si mindo sumbangan ras uang keamanan. E maka la banci lang, reh bayakna reh buena nge jelma man beren. Si tuhuna, tujun ndai mpepulung erta labo guna si e. E maka labo lit untungna, saja ieteh maka mbue kepe erta, bage ngenca nina pengerana (ay.11).
3. I bas ayat 12, Pengerana mpetangkas kesiasian si idahiken kalak si pepulung erta i doni enda. Pengerana mereken contoh perbandingan

ras sekalak si erdahin si biasa-biasa saja bagi kalak ngemo i juma kalak ntah upahen (kuli). Ulih pendahinna sada wari banci jadi la bias man nakanna saja pe. Tuhu aru nge atena, sabap man nakan si panna saja pe banci la bias. Tapi nina Pengerana, silanglangna ntabeh pertunduhna. Sabap kinilatihenna terjeng la bias nakan man panganenna. Nina bas pusuhna, pagi ertutusna aku erdahin gelah cukup nakanku. E maka medem ia guna dahin si pepagi. Erkiteken latihna akapna erdahin sada wari, ntabeh pertunduhna gedang-gedang berngi. Tapi kalak bayak la bage. Mbue tuhu ertana, tapi la banci ia tunduh. E maka, mekuah kal ate man kalak si erbintuas suari ras berngi guna pepulung erta i doni enda, sabap erta doni enda la banci baba ras tetap tading i doni. E maka nina Tuhan Jesus, pepulunglah erta si i Surga. I je la pan ngetnget, tembesin dengen itangko pinangko (Matius 6:19-20).

Enda me sabapna, Pengerana pang ngatakensa sia-sia nge nggeluh, sabap kidekah nggeluh pe ipake guna pepulung erta doni ngenca, barang si labo banci mereken kemalem en ate situhu-tuhu.

### **Pengkenaina.**

Lit sada lirik lagu rohani Karo si ngatakensa, "adi lit sada dua min, adi enggo dua telu min bage ateta..... sada pe bias, dua pe kurang, adi la beluh kita encibalkensa.<sup>1</sup> Lagu enda nuduhkan kerna biak manusia si la beluh ngatakan bujur man Dibata kerna kai si lit si i bas geluhna (kurang bersyukur). Biak enda labo saja salah, tapi bahaya ras njajat. Jadi lanai soal keperluan tapi hobi si encedai. Enda tergolong candu ras penyakit baru si tergelar shopaholic. Adi si serching google, apa itu *shopaholic*? Maka si pemena nurikensa e me halodoc (aplikasi kesehatan). Arah si e gia ma enggo si eteh ku ja aromana. Nina halodoc, *shopaholic* e me gangguan belanja si komplusif erkiteken pengidahna la nari ngasup nahan dorongen si mbelin i bas dirina guna erbelanja. E maka enda lanai bo soal hobi tapi enggo gangguan mental. Ma enggo bahaya adi bage. Lanai ngasup ngamper bana. Enggo man tambaren. E maka selaku Moria GBKP, kita arus megermet. Kita labo saja iajuk guna nirangi pinakit e, tapi pe jadi usihen alu ngelumbaken nggeluh si sederhana, seimbang, nggit nampati bage pe ngasup ngatakan bujur.

### **Study Kasus.**

---

<sup>1</sup> Judul: "Kataken Bujur"

Holic e me sekalak diberu karier si terpelajar si erdahin i bas perusahaan majalah diberu. Ia beluh kal sekolah nai-nai nari. Selaku diberu si erdahin, penampilenna ikut numpak-numpak pendahinna. E maka enggo terbiasa ia nukur barang-barang si terbaru si sangana mode. Mon-mon labo bias pe senna nukur barang e, tapi perban lit kartu kreditna, ikreditina barang-barang e. Lanai igejapna tah iukurina e guna keperlunna entah pepuasken sura-sura saja. Labo bas toko ngenca ia nukur barang, aplikasi online pe rusur pesanna. Sada paksa, rugi perusahaan inganna erdahin, termasuk ia, ikut i PHK. Rempet ia pengangguren. Kelang sada wari, reh *si nagih utang* ku rumahna. Sengget kal ia perban melala kal utangna, janah ersenggetna ka ia perban tabungenna bas Bank pe enggo lawah-lawahen. E maka rumah ras barang-barangna isita guna ngalar utangna. Situasi erbahan ia arus mulih kuta ndahi orangtuana. Sada wari i kuta, ijemakna HP nandena, ibukana aplikasi Tukur Aku, e maka inenna jam tangan si mejile, la sadar minter i teldukna COD. *Pakettttt, pakettttt, Holic!*

1. Uga nge si akap kerna kegeluhen Holic enda. Kai nge si perlu ras si la perlu iusih i bas ia nari!
2. Kai nge silakokenndu adina kam i bas posisi: a. kam si Holic; b. kam nandena!
3. Tonton alur cerita film "*Confessions of a Shopaholic*" i YouTube. Bereken pendapatndu kerna film e.

*Pdt. S. Jonathan Meliala, M.Th*

*"Kendalilaken dirinta, pebias banta alu kai si liP"*

*Wari enda si pepulung kolekte extra guna nampati LAI*

**SI MAN OGEN** : 1 Korinti 6:12-13

**TEMA** : KULA GUNA TUHAN

**TUJUN** : Gelah Moria:

- Nuriken maka kulanta enda pemere Tuhan dengen guna Tuhan.
- Pentar ngaturken pangan ras waktu istirahat guna kesejahtranna ras isi jabu.

**METODE PA** : Aksi (berbagi makanan sehat)



**Kata Penaruh.**

Sada bagin si la terpesirang bas kegeluhen e me pangan. Pangan e mereken ngaruh si mbelin nandangi kegeluhen. Ann Wigmore; sekalak si madan i bas pinakit nari arah pangan ngatakan "*Makanan yang anda makan bisa menjadi bentuk obat paling aman dan paling kuat, atau menjadi bentuk racun yang paling lambat.*" Si akui maka teptep jelma ngarapkan nggeluh sehat ras mejuah-juah. Kesehaten e jadi erta si mehergana i bas geluh. Cara si mesinteng guna ndatkenca e me ngatur pola hidup arah ngatur pangan sinipanken, istirahat ras cara rukur si payo. Kerina kiniliten bas doni; erta, jabaten, gelar ras sidebanna jadi sia-sia kune sakit nderpa kegeluhen. PA-nta minggu enda mabai kita ngidah pentingna nggeluh sehat.

### **Mpebagesi Pengangkan Kerna Ogen.**

Perukuren jore maka geluh jore, janah pengangkan lepak mabai perbahanen si papak. Bagi si ikatakan Paulus man perpulungen Korinti si enterem erbagena. I je lit kalak Jahudi ras la Jahudi. Melala pemeteh si mbar tupung sie (Stoa, Genostik ras sidebanna). Lit pengajaren si ngatakan maka manusia e erbagin-bagin; lit kula, tendi ras kesah. Kerina enda serap-serap janah labo erkawiten sada ras sidebanna. Kula e labo tahan rasa lalap, sada paksa mate jadi taneh, e maka tendi ras roh nge si tahan rasa lalap. E me pagi si ipekeke Dibata bas kegeluhen seh ku Surga. Perukuren si bagenda seh ku perpulungen. Piah dungna kegeluhen si tep-tep warina lanai piga si mperdiateken kula. Paulus nuriangi pengangkan si bage.

*Ayat 12*, "Bebas kap aku ngelakoken kai pe," perukuren si bagenda semal dingen mbar i bas kegeluhen kalak Korinti (Bd. 10:23). Bebas ngelakoken kai pe, ertina banci ngelakoken perbahanen-perbahanen si la uli. Alu tangkas Paulus nulak perukuren si bage rupana. Banci jadi si enda jadi erpalasken pengajarena kerna kebebasan i bas dosa, kematen (maut) ras Taurat (Galati 5:1). Kalak Kristen bebas tapi kune labo erguna man pembangunen kiniteken perpulungen, si e labo mehuli. Erguna ertina bagi Kristus, ngelakoken kerina alu palas kekelengen. Enterem kalak makeken kebebasan e seh maka jadi budak (ikuasai) sura-sura dagingna. Nggeluh i bas sura-sura daging la pernah mereken kepuasan. Emaka kebebasan e la banci jadi alasan bas ngelakoken kejahatan. Kebebasen adi la ipalasi alu kekelengen e me perbahanen si la ertanggungjabap.

*Ayat 13*, Pengangkan sidebanna ngatakan maka "pangan guna beltek, janah beltek guna pangan." Kalak Kristen ibebasken arah pantangen-pantangen bas padan si ndekah nari (Markus 7:18-23), sabap labo arah pangan maka

manusia mehuli i bas mata Dibata. Perpulangan salah ngantusi kerna si enda emaka nina sada paksa daging/kula enda macik bas taneh (kuburen). Si man pekena-kenan e me tendi ras roh. Kai salahna aminna kai pe ibahan nandangi kula enda sabap perbahanen-perbahanen kempaksa labo mere ngaruh ku bas keterkelinen pagin. Paulus nulak si e teridah arah ayat 13-21 lit 8 kali ia ngerana kerna kula. Iturikenna maka Dibata erbahan kula enda labo terjeng mpebesar (memuaskan) beltek saja. Erti kula enda ndauh mulian asangkan terjeng keperluan jasmani saja. Kula e guna Tuhan, janah Tuhan e guna kula. Kula e guna Tuhan erkiteken alu kulaNa jine mate guna nebusi dosa manusia. Kristus mate guna kerina jelma, labo terjeng tendi ras roh. Arah si enda iajuk perpulangan makeken kulana bagi kula Kristus, e me ngelai, ersaksi dingin erkorban guna kiniulin kalak si enterem.

### **Pengkenaina.**

Nande si pentar; nande si maba kesehatan man se-isi jabu. Kemalemen ate dingin perayaken nande si pemenana e me kesehatan dingin kejuah-juahen perbulangen ras anak-anak. Bas perukurena rusur kai ka nge ndia kuban man se-isi jabuku. Tupung tayang tengah berngi e, anak-anak perbulangen enggo tunduh nande rukur denga "kai ndia pagi ku tanggerken segelah entabeh niakap anak jabuku mankenca." Emaka kegeluhenna la terpersirang bas nikapken pangan, inemen man jabu. Keluarga si sehat la terlepas i bas tan nande. Tapi lit ka erkiteken melala pendahin si arus idahiken, maun lupa nikapken pangan si sehat. Tambah ka buena genduari jajanen si mesunah ndatkenca, la pe kita ndarat bas rumah nari enggo lit aplikasi ingan mesan pangan sue ras selera. Banci itaruhkenna ku rumah lanai latih, tading nikapken sen saja. Lanai bo iperneh nilai gizi, nutrisi pangan e, si jelas entabeh bas babah. E jadi pangan man se-isi jabu. Si e erbahansa kula mesunah sakit. Ula min sempat kita lepas kontrol si mahan bana peturah si la uli.

Kita bebas man kai pe, saja perlu pentar i bas milih pangan si sehat guna kesehatan jabunta. Kita bebas nentukan kai pe subuk i bas perukuren bage pe perbahanen, kebebasan e oratna min si erguna. Erguna mbangun kesehatan, erguna guna majekken kula Kristus. Sura-surata maka se-isi jabu banci mereken diri i bas pelayanen, si ibereken jadi persembahen man Dibata e me diri si sehat ras paguh. Erdandanken si e mari sibiasaken nggeluh sehat arah ngatur perpan, ngatur jam istirahat, bage pe cara rukur si mehuli. Ukurilah kerina si mehuli; si bujur, mulia, benar bersih, mejile ras

patut ipuji, dingan dalankenlah segelah kesehaten e jadi sekerajangenta ras se-isi jabunta.

### **Aksi.**

Moria mendata pangan si sehat guna kula. Kenca si e tep-tep Moria milih sada pangan si itangerkenna, ibahan sada wari guna pepulungsa janah ibaba ku bas PA kategorial sidebanna (subuk KAKR, Permata, Mamre entah saitun) guna ipanken ras-ras jadi snack bas PA.

*Pdt. Rosani Sembiring,STh*

*Mbelang sabah i kuta Munte  
Njoler-njoler si batang Jambe  
Jabu sehat ras ermalem ate  
sabap nande tetap erkeleng ate*



**SI MAN OGEN** : Heber 13:17-19  
**T E M A** : MUAT BAGIN GUNA KINIULIN GEREJA

**T U J U N** : Gelah Moria:  
• Nuratken tanggungjabap perpulungen nandangi peminpin Gereja.  
• Ertoto ras mpepulung dana guna kiniulin perdalinen Sidang Sinode.

**METODE PA** : Diskusi ras Aksi

### **Kata Penaruh.**

Labo si gejap perdalinen waktu erdalan, seh maka tahun si reh enggo ka kita seh ku bas Sidang Sinode i tengah-tengah gerejanta GBKP si pe-37 kaliken. Tentu enda pe sada keriahen i bas gerejanta, seh kita ku bas pesta iman gerejanta i ja persidangen e encakapken perdalinen gerejanta 5 tahun ku lebe, kai ras uga si arus silakoken guna kemajun ras kiniulin gerejanta GBKP. Siniarapken tetap kita muat bagin selaku ngawan ni perpulungen, lit deba ikut i bas kepanitian, lit deba numpak-numpak dana guna persidangen sinilakoken dekahna 1 minggu. Si la terlibat langsung, iarapken gelah muat bagin i bas pertoton gelah mehuli perdalinen Sidang Sinode GBKP i bas tahun 2025. Perpulungen muat bagin i bas dahin si mehuli ras ilakoken guna kiniulin Gereja Tuhan.

### **Mpebagesi Pengangkan Kerna Ogen.**

Ogenta enda e me bagin perpudi kitab Heber si melala ngerana menaken i bas jabu, uga kin arusna ngelakoken si ngena ate Tuhan. Bage pe selaku kalak si erkiniteken arus patuh man pemimpin janah ngikutken kataNa. Lit dua pengajaren pengajaren i je e me: si pemena uga arusna masyarakat e patuh man pemimpinna sabap enggo ilakoken pemimpin e si jadi tanggungjawabna ngepkep pertendin perpulungen. Si peduaken, uga arusna masyarakat e numpak-numpak pemimpinna janah ngikutken katana sabap la ia erlatih latih ngepkep pertendin, janah ia ertanggungjawab man Dibata. Adi patuh kam man bana meriah ukurna erdahin. Patuh e termasuk notoken ras ndukung ia ras muat bagin gelah ia pe meriah akapna ndahiken dahin e. Biasana kalak si meriah akapna ndahiken dahin e ulihna pe mehuli. 'Tetaplah ertoto kerna kami,' enda sada pengajuk man perpulungen gelahna notoken dahin pemimpin subuk si meterukna seh ku si meganjangna radu ras numpak-numpak dahin pelayanenna. Igejapna labo lit kebeluhen ras kepentaren ndahiken dahin e adi la ipengasup Dibata. E maka pertoton perpulungen e seh kal perluna. Ulih peroton perpulungen e, pemimpin e pe bersih ukurna ndalanken dahinna janah tetap nge lit sura-sura ndalanken si mehuli. Patuh nandangi pemimpin e me persuruhan Dibata guna ngepkep ras mabai perpulungen nggeluh setia ras erkemalengen man baNa.

I bas 1 Johanes 4:20, isingetken maka 'Ise si la engkelengi seninana si iidahna labo mungkin ia engkelengi seninana si la iidahna.' Mpraktekken kekelengen e alu nuduhkan kepatuhen dengen kesetian ngelakoken teladan, bagi Kristus enggo engkelengi manusia si labo itandaiNa tapi ikelengiNa. I je me kerina kalak muat bagin alu ngendesken geluhna ipake Dibata guna

dahin si mehuli. Salah sada arah ertoto. I bas dampar sideban tentuna ndukung alu ngelakoken si isehken peminpin e.

### **Pengkenaina.**

Kai dage tanggungjabap ngawan ni perpulungen guna mpekena kena dahin pelayanen kususna i bas Sidang Sinode-nta tahun 2025 enda? Tentu saja arah kolekte si pepulung kita, ikut notoken ras numpak-numpak dahin pelayanen, ntah ikut i bas kepanitian guna kiniulin sidang sinode-nta enda. Dage kerina kita muat bagin, adi ipilih kita jadi panitia, meriahlah ukurta ndahikensa, adi lit dana si banci sibereken, endesken e alu ukur meriah, e salah sada persembahen dirinta man Dibata guna pekenaken dahin Sidang Sinode-nta enda. Banci pe ipindoken ka runggunta nehken snack, kue ras cimpa guna ncukupi kesehaten peserta sidang, berekenlah alu ukur meriah, cakapken e i bas Sidang Runggun ntah perbeliten Moria banci nambahisa. Adi ipindoken panitia runggunta rende nehken puji-pujin man Tuhan, sikapkenlah! Bahan waktunta latihan ras reh ku acara persidangen e, gelah kerina ratur ras mehuli. Bage pe silakoken pertoton sapaat i bas jabunta i bas 1 bulan e, tentuken warina ras jamna katawari kita notoken dahin e sabap pesta iman nandangi kerina jemaat GBKP. I bas paksa Sidang Sinode e pe ilakoken ka kebaktin sehna Berita Si Meriah ku kalak Karo pe 135 tahunken 18 April 2025, e maka si sikapken pe i je waktunta guna radu ras kita erkebaktin i bas penutupan Sidang Sinode enda sekaligus ras pelantiken Moderamen GBKP si terpilih.

### **Diskusi ras aksi:**

1. Kai nge si banci silakoken guna numpak-numpak pelaksanan Sidang Sinode GBKP? Turiken.
2. Sitotokenlah kerna pelaksanan Sidang Sinode-nta i bas pertoton sapaatta gelah kerina ngawan ni perpulungen muat bagin notokensa:
  - Wari Senin : kerina peserta Sidang Sinode
  - Wari Selasa : kerina Panitia Sidang Sinode
  - Wari Rabu : kerina fasilitas guna Sidang Sinode-nta
  - Wari Kamis : pelaksanaan acara i bas Sidang Sinode-nta
  - Wari Jumat : kerna Moderamen ras pimpinen sidang i bas pelaksanaan Sidang Sinode-nta
  - Wari Sabtu : kerna pemilihan Moderamen GBKP
  - Wari minggu : kerina ngawan ni perpulungen si mendukung Sidang Sinode-nta

Tiga Binanga melala tualah  
Tanjung Barus melala markisah  
Pesta Iman gerejanta lanai  
ndekah  
Buat bagin bas kai pe la ndobah



**SI MAN OGEN** : Hakim-Hakim 4:17-24

**TEMA** : MORIA SI VISIONER

**TUJUN** : Gelah Moria:

- Niksiki sura-sura Jael nandangi bangsa Israel.
- Pentar i bas muat keputusan guna masa depan.

**METODE PA** : Erbahan Visi Pribadi

## **Kata Penaruh.**

Teptep jelma pasti nenganami telu masa kegeluhen e me masa kegeluhen si enggo lepas, masa kegeluhen genduari ras masa kegeluhen si nandangi reh. Masa kegeluhen si enggo lepas e me masa kegeluhen si enggo ibentasi kita janah lanai banci si pekena. Masa kegeluhen si genduari e me masa kegeluhen si paksana si perjuangkan janah banci denga si aturken maka sikap dingin mehuli ulihna. Masa kegeluhen si nandangi reh e me masa kegeluhen si jadi arapen. Selaku kalak si erkiniteken man Tuhan, si akui maka masa depanta enggo ijamini Tuhan gelah mehuli si kerajangenta (Jesaya 55:8-9). Amin bage gia, kita tetap perlu erbahan perencanaan dingin pentar makeken kesempatan i bas kerina situasi. Arah PA-nta wari enda, erlajar kita kerna sekalak diberu si tergelar Jael i bas ngidah ras makeken peluang si lit guna kemulian gelar Tuhan.

## **Mpebagesi Pengangkan Kerna Ogen.**

Kitab Hakim-Hakim e me turi-turin i bas jaman sejarah Israel tupung bangsa e nggeluh la lit penguluna si sah. Sejarah enda jadi i bas paksa kelang-kelang tupung ngerebut Tanah Kanaan ras pajekna Kerajaan Israel. Periode Hakim-hakim enda ibenaken sekitar tahun 1375-1050 SM.

Kenca Ehud mate, kalak Israel ngelakoken si jahat i mata Tuhan. Erkiteken si e, iendesken Tuhan kalak enda man Jabin, raja Kanaan si merentah i Hazor. Puanglima tentera raja Kanaan enda gelarna Sisera. Paksa e, Debora, ndehara Lapidot, jadi hakim man bangsa Israel. Debora merentahkan Barak anak Abinoam i bas suku Naftali nari guna erperang ngelawan pasukan Sisera i deleng Tabor. I bas peperangan e, Tuhan mereken kemenangan man kalak Israel. Kerina tentera kalak Kanan si ipimpin Sisera mate seakatan Sisera. Sisera nusur i bas gereta perangna nari janah kiam ia ku kemah Jael, ndehara Heber kalak Keni erkiteken i bas masa si e, Jabin selaku raja Kanan erteman ras keluarga Heber.

Kalak Keni e me salah sada suku *nomaden* (berpindah-pindah) si nggeluh ndeher ras kalak Israel. Ialo-alo Jael Sisera i bas kemahna janah ibunikenna Sisera i balik kire-kire. Tupung Sisera mindo lau erkiteken muas kal akapna, ibuat Jael sada kantong kulit jenari iberekenna susu man inemen Sisera. Tupung Sisera tunduh erkiteken latih kal akapna, ibuat Jael martel ras pantuk-pantuk kemah jenari ibunuhna Sisera alu mekpek pantuk-pantuk ndai alu martel arah pipi Sisera pultak ku tanah. Kenca si e, ituduhken Jael

man Barak maka kalak si idaramina enggo mate. Kedungenna kernep Jabin, raja kalak Kanan.

I bas sada dampar kai si lakoken Jael banci iakap payo. Tapi i bas dampar si deban, la payo secara etis erkiteken ilanggarna hukum *hospitalitas* ntah pe *keramahtamahan* i bas konteks Padan Si Ndekah. Kalak si reh ku kemah arusna ialo-alo alu mehuli, ijagai dengen isikapken si mehulina man bana segelah banci sikap kegeluhenna. Enda banci si idah i bas perbahanen silakoken Abraham ras Lut (Kejadin 18:1-15; Kejadin 19:1-11). Lit piga-piga alasan engkai maka Jael arus munuh Sisera. Sipemena, Sisera arus ibunuh erkiteken ia paksana iayak-ayak Barak. La mehuli adi sempat i bas kemahna kari Sisera enda itangkap Barak. Kerehen Sisera ku kemahna situhuna jadi sada perbeben. I bas sada dampar, Sisera arus ialo-alo janah ikawali. Tapi i bas dampar si deban kalak enda pe banci ianggap jadi musuh Israel erkiteken ijagaina musuh kalak Israel. Kai silakoken Jael e me guna njagai sukuna gelah ula sempat ikernepen kalak Israel. Sipeduaken, Jael munuh Sisera jadi sada kesempatan guna munuh musuh kalak Israel. Kai silakokenna e banci saja erbahansa turah masalah i bas dirina ras sukuna erkiteken iakap ia enggo berkhianat nandangi raja Kanan. Tapi, Jael nggit ipake Tuhan guna naluken musuh kalak Israel e me Sisera. Sipeteluken, adi Jael la munuh Sisera, selaku puanglima perang ia pasti munuh nterem jelma sideban. Sisera pasti ngelakoken pembunuhan, perampasan ras kiniseran. Jael munuh labo guna kepentingenna pribadi tapi guna kepentingan sosial ras politis e me alasan pembebasan arah penindasan. Kai silakokenna la saja mbebaskan kalak Israel i bas kalak Kanan nari tapi pe mbebaskan bangsana.

### **Pengkenaina.**

I bas KBBI, erti visioner e me "*orang yang memiliki pandangan atau wawasan ke masa depan.*" Kalak si visioner e me kalak si ngasup ngidah ras makeken peluang guna kiniulin kegeluhen i bas masa si reh. Visioner enda erkawiten ras uga cara sekalak jelma ngenehen sada keadan. Kalak si visioner biasana lit strategina si tepat nandangi dahin-dahin si atena ilakokenna, ngasup ngidah potensi-potensi si lit dengen makeken kerina potensi e guna kiniulin i bas masa si reh. Selaku Moria, kita pe arusna ngasup ngidah ras makeken peluang alu mehuli gelah banci reh sikapna kegeluhenta. Ula min buen kita kelsehen i bas keadan si man alanken, seh maka kai pe la silakoken seakatan nalahken keadan ras nalahken kalak sideban. Kita nggo erlajar arah pandemi covid-19 si nggo si bentasi. Kalak si

ngasup ngidah ras makeken peluang ngenca si banci ertahan i bas ngalaken pandemi e. Kebijakan-kebijakan pemerintah guna njagai kita gelah ula terparar virus erbahansa lit guncangan i bas sektor ekonomi. Tapi kalak si visioner ngidah kebijakan e jadi sada peluang guna meningkatkan ekonomina alu make jaringan internet mbuka bisnis online. Tentuna, melala denga dampar si deban si banci si bahan jadi usihen kerna cara pandang si visioner. Si pasti, kalak si erkiniteken man Tuhan la pernah ngadi i bas keadan sulit tapi tetap ngendesken dirina man Tuhan dingen makeken kerina peluang si lit gelah banci reh ulina kegeluhen.

### **Erbahan Visi Pribadi.**

Kenca dung PA enda, teptep Moria nuratken kerna uga atena perdalanan keluargana kususna i bas hubungenna ras perbulangen ntah anak-anakna i bas tahun si reh. Suratken pe langkah-langkah si jelas si atendu ibahanndu gelah banci tersehi kai si jadi sura-surandu e:

---

---

---

---

---

*Pdt. Wesly Pinem*



**SI MAN OGEN** : Galati 3:26-29

**TEMA** : SADA I BAS KRISTUS JESUS

**TUJUN** : Gelah Moria:

- Nuriken maka kerina manusia, amin pe erbage-bage tapi sada i bas Kristus.
- Ngkuhi kinierbagen i bas agama, suku, pendahin, tingkat perekonomin ras sideban.

**METODE PA** : Studi Kasus.

## **Kata Penaruh.**

Ngergai kinierbagen seh kal perluna i bas kegeluhen enda. Dibata alu kepentaren ras kuasaNa njadikan doni ras isina alu erbage-bage. Kepentaren iberekenNa man manusia erbahansa manusia ngasup ngaturken kegeluhenna rikutken situasi alam, bage pe situasi sosial si ijumpaina. Ingan si pelain-lain, kuta si pedauh-dauh erbahansa cara geluh manusia e pe labo seri. Cara rukur ras cara ncibalken ranan pe pelain-lain. Teridah melala erbagen tinea Dibata e, saja kinierbagen e jadi kebayaken. Si perlu i je e me kap ngergai kinierbagen e. I bas kita ngergai kinierbagen e kita enggo mpermuliaen Dibata si nepa kita ras kerina isi doni enda.

Perkembangan jaman ras tambah erbagen dinamika kegeluhen manusia, tambah ka caranta ngidah kegeluhen kalak si deban ras berinteraksi ras ia. Lit kelompok radikal si la ngasup ngaloken kalak si la seri ras ia e maka jadi me penulaken, kekerasen ras pe 'ujaren kebencian' si ilakoken sekalak jelma ntah pe sada kelompok man sidebanna, si erpalasken suku, agama, ras ntah pe antar golongan (SARA). Arah bahan PA minggu enda ibabai kita guna mengketi tahun 2025 si reh, i ja perayaken gerejanta e me 'dewasa menerima perbedaan' janah buku PA-nta alu tema belinna 'si ergan.'

## **Mpebagesi Pengangkan Kerna Ogen.**

Rasul Paulus megati ikataken erberita man kalak si la Jahudi (non Jahudi). Keterbukanna kerna suku ras bangsa si deban erbahan ia ngasup mereken perukuren-perukuren si erbage man perpulungen, gelah perpulungen la rukur alu sempit kerna geluhna ras kalak sideban. Rikutken si e Paulus tetap menaken kai si ngiket kalak Jahudi e me undang-undang ras sunat. Iturikenna kai guna undang-undang e me desken pengawas ras si mabai kalak si tek kempak guruna. Dingen lanai lit si menjaraken ia, erkiteken kiniteken man guru e me Kristus. Erkiniten man Kristus njadikan ia jadi anak-anak Dibata. E maka kerina anak-anak Dibata seri hakna sabap ipersada ia i bas persadan ras Kristus. Lakon peridin si mpersadasa. Jadi biak Kristus ndai nggo ersada ras kalak si nggo iperidiken. Kalak si nggo iperidiken ngasup:

- Ngidah kinierbagen i bas kegeluhen subuk masyarakat bage pe gereja, ntah e kalak Jahudi ntah Junani e maka suku lanai jadi sukat-sukat kalak ialoken Kristus jadi anak-anakNa. Lanai lit kelas si nirangken kalak

bebas nta h budak. Adi nai budak banci itukur ras idayakan desken barang, jenari ia sikerajangen tuanna dengen ndigan pe la banci seri statusna. Gundari kerina enggo seri, kerina anak Dibata, perbedan gender lanai erbahanca diberu ras dilaki si ganjang teruken ras beda pengergai man bana. Tradisi Jahudi, ngidah diberu la meherga ibandingken dilaki. Seh maka lit pertoton erpagi pagi paksa e `ngataken bujur sabap la ipetubuh selaku diberu.' Si enda kerina megati erbahan kelas, si ganjang teruken i bas perpulungen. Erkiteken enggo seri i lebe-lebe Dibata, kalak Kristen iajuk gelah nggit ngergai erbage-bage kecibal ras status kegeluhen.

- I bas Kristus lanai lit perbedan ras pengkotak-kotaken, kerina seri ergana iadepenNa. Sabap radu ras sikerajangen Kristus kerinana. Radu ersada i bas lau peridin, radu ras itebus i bas dosa-dosa nari. Jadi sada kula i bas Kristus dengen radu ras ngaloken kai si ipadanken Dibata man bana kerina.

Bage me Rasul Paulus mabai perpulungen Galati gelah lanai ipengaruhi ukur meganjang erkiteken status sosialna i bas masyarakat. I bas kiniteken kinierbagen e enggo ibuka Jesus batas-batas si megati ibahan manusia jadi sukat-sukat mpehaga sekalak jelma lebih asa sideban.

## **Pengkenaina.**

`Perbedan' e tangkas teridah i bas kegeluhen. Jenis kelamin manusia jelas la seri, rupata pe kerina pelain-lain, kebeluhen rikut talenta pe erbage termasuk pendahin rikut buatenta lit. Si perlu e me kuga kita ngidah kinierbagen enda sada kebayaken seh maka sada ras sidebanna siergan. Perayaken gerejanta gelah dewasa caranta ngidah ras `ngergaken' teptep jelma rikut kecibalna. Kuga kin si ikataken kalak dewasa? Kamus besar bahasa Indonesia nina maka dewasa e me kalak si enggo beluh rukur apai si mehuli guna idalanken, apai si la mehuli si man tadingenken. Iukurika mbages alu erbahan erbage-bage pertimbangan e maka ibahanna keputusan em si la ncedai ukur kalak si deban. Lanai egois tapi rukur guna kepentingan nterem jelma. I bas kekurangan temanta e kita ngkuhisa, bas kekurangenta temanta e ka si ngkuhisa.

Alu bage, enggo ngasup kita ngidah, ngaloken ras `ngergaken' kalak sideban alu mehuli, uga ia litna alu la maksaken sura-sura ras kepentingenta. Kuga kita ngidah ras ngakui kerina tinepa Dibata enda mehuli e maka kerina lit gunana. Rikutken si e maka enggo arusna lanai lit ncekuraki, nokohi

(membully) kalak sideban, nirangi biak ngelakoken kekerasen, maksaken sura-suranta nandangi kalak. Nggit erteman ras ise pe em tanda kita ngergai ia rikutken kecibalna. Sada me kita i bas Kristus, IA me kula, batang ras ulu kerinana. Dikune la siergai tinepa e, la siergai Dibata sinepasa.

### **Studi Kasus.**

I bas sada kuta masyarakatna sanga masa-masa produktif. Nterem anak-anak si sangana ngerehken belinna. Teptep wari kenca sekolah, anak-anak e main-main i bas tanah lapang, erbage permmainan si lit i je . I bas sada wari, lit reh sekalak anak dilaki si atena ikut radu rasa anak si nterem. Ia mbaru denga ringan ikuta e, tapi la lit anak si nggit erteman ras ia. Iuru-uru sabap ia labo suku si seri ras anak sideban, orangtuana reh dinggen tading i kuta e, dahinna si ngemo. Janah uisna pe labo sikap ibandingkan anak-anak sideban. Perbahanen anak-anak e kerina mbelin erkiteken pengaruh orangtuana si la mere anakna erteman ras kalak si bage rupana.

### **Diskusi:**

1. Rikutken kasus enda kuga nge menurutta perbahanen orangtua e nandangi biak ras perukuren anak-anakna ku lebe wari enda?
2. Kai-kai saja nge si banci si bahan programta i bas tahun si reh guna ngasup siergan rikutken oratenta sendah?

*Pdt. Suenita Simulingga, M.Th.*